

**NATIONAL ASSEMBLY OF
SEYCHELLES**

Tuesday 02nd December 2025

The Assembly met at 09am

National Anthem

Moment of Reflection

Mr Deputy Speaker in the

Chair

MR DEPUTY SPEAKER

Bon, mon a dir bonzour tou bann Manm Onorab e osi bonzour tou nou bann telespektater ki pou swiv Lasanble ozordi.

Devan nou, nou annan en *Revised Order Paper. Communication from the Chair*. Zis pou enform Lasanble e osi Manm piblik ki nou Speaker Lasanble, Madanm Speaker i lo en Misyon Ofisyel SADC PF.

Anliny avek Lazournen Mondyal VIH/SIDA ki ti le 1er Desanm yer, Lasanble malgre ki nou pa ankor form sa Komite Lasante ki pou vini lannen prosen, nou reste angaze anver sa koz.

E sa lannen son tenm se "*Overcoming disruption, transforming the AIDS response*." Avek sa, nou pou annan en Manm lo kote US

Onorab Balisa ki pou fer en pti mansyon.

E osi an vi ki nou pe form part "*Deaf Week*" sa semenn e ki Lasanble osi i angaze. E ki apartir Zedi 1er apre midi dan *lobby*, i annan en mansyon dan en sans, anver sa koz, e sa pou annan en Manm lo kote LDS ki pou fer en mansyon.

Avek sa mon pou donn laparol Onorab Balisa pou fer ou pti mansyon. Mersi.

HON NELSIA LEPATHY

Mersi Mr Speaker. Mr Speaker, bann koleg e tou dimoun a lekout, bonzour. Yer Lendi le 1er Desanm ti Lazournen Mondyal pour SIDA. E ozordi i en loner pour mwan lo non Lasanble Nasyonal pou vin partaz en refleksyon avek Lepep Seselwa.

Sesel i zwenn ansanm avek Komite Enternasyonal pou selebre Lazournen Mondyal pour SIDA anba tenm "*Overcoming disruption, transforming the AIDS response*." Sa pa zis en tenm, me en manda pour bann dirizan pou azir avek solidarite e lazistis.

Mondyalman, 38milyon dimoun pe viv avek sa viris ki donn SIDA, e lannen pase ti annan 1.3milyon nouvo ka. Nou rekonnet ki lemonn in fer progre. Me nou osi rekonnet ki nou annan bann retar dan

nou progre pour bann rezon parey kriz ekonomik e konfli ant bann pei. An konsekans, sa bann eleman in kontribye pou agrandi inegalite e met plis presyon lo Sistenn Lasante.

Mr Speaker, nou pei Sesel i annan en epidemik *HIV* konsantre avek en prevalans pli ba ki 1poursan nasyonalman. Me enn ki o parmi bann popilasyon kle, tel ki parmi, bann travayer sex, bann zonm ki annan relasyon sex avek zonm e dimoun ki servi drog par pikir ek sereng.

An 2020 ti annan 934 dimoun ki ti pe viv avek *HIV*. E nivo ka i ogmante par 53poursan, e sa i an 2016 ek 2020.

Ant zenn 15 a 24an, ti fer 15poursan nouvo ka. E stigmatizasyon i reste en gran baryer ki'n anpes bann ki krwar zot in kapab ganny afekte pou al fer zot tes. E pour bann ki'n ganny afekte pou swiv zot tretman.

Ozordi i annan anviron 1572 dimoun enfekte. E zis sa lannen, in annan 95 nouvo ka ki'n ganny rikorde. Sa ler ozordi lenfeksyon *HIV* i pa en santans lanmor. I kapab ganny trete e en dimoun enfekte i kapab viv en lavi normal.

Minis pour Lasante in koz fortman dan son mesaz ki

Gouvernman pou asire ki nou bann zannfan e nou bann zenn i ganny edike byen boner lo *HIV/SIDA*.

E parey Prezidan osi in dir, nou zenn i reste vilnerab. E stigmatizasyon e diskriminasyon i kontinyen fer baryer pou akse bann servis enportan. I responsabilite kolektiv nou tou pou retir sa bann baryer, protez nou zenn e asire ki zot kapab ganny swen san lafreder oubyen prezidis.

Mr Speaker, koman bann Manm Lasanble Nasyonal e osi bann reprezantan Lepep Seselwa nou, nou reste angaze dan sa lalit atraver nou sipor pour sa plan stratejik nasyonal pou konbat *HIV* e lezot maladi ki osi transmisib par sex.

E sa i osi ganny siporte par en Komite pour Maladi Transmisib ki pou ganny met an plas lannen prosenn. Me mon santi ki i annan ankor bokou plis pou fer.

Nou bezwen premyerman koman en Lasanble Nasyonal demann Gouvernman pou ranforsi finansman e entegre Servis *HIV* dan kouvveraz lasante iniversel. E donn sipor psikososyal pour bann ki aret zot tretman.

Sesel i osi zve en rol aktiv dan bann linisyativ rezyonal SADC ek Losean Endyen, enkli Proze *SRHR*,

HIV and AIDS avek sipor bann partner parey *UNAIDS*.

Bann partenarya in ed nou retir baryer legal, lager kont stigmatizasyon e protez drwa bann group vilnerab. Nou bezwen kontinyen servi sa bann lalyans pou ganny resours e pou partaz bann bon pratik.

Mr Speaker, stigmatizasyon ek diskriminasyon i ankor reste parmi bann pli gro lobstak. Nou Lalwa i bezwen protez e promouvwar drwa imen, asire ki personn pa ganny refiz swen e nenport ki servis. Prensipalman, servis finansyel.

Plandaksyon nasyonal pou retir baryer legal i en bon pa, me son lenplimantasyon i bezwen ganny akselere. Lasante i en drwa tou imen e personn pa devret ganny kit deryer.

Mr Speaker, pou fini oubyen pou fer disparet *SIDA* pa zis en bi lasante, me i en devwar moral. Tou lavi ki'n ganny sove i ranforsi nou sosyete. Tou baryer ki ganny retire i anmenn nou pli pre avek lazistis.

Annou transform sa retar dan rezilyans, inegalite dan lekite e dezespwar dan lespwar. Antan ki Sesel pe travay pour en zenerasyon san *SIDA*, mon lans en lapel avek tou bann partener

Gouvernman, sektor prive ek lakominote pou fer zot par.

Ansanm nou kapab asire ki personn pa ganny kit deryer. Ganny afekte avek sa viris ki donn *SIDA* i pa en santans lanmor.

SIDA i en maladi avek tretman ki pei i pare pou depanse pou sonny nou bann ser ek frer ki ganny *SIDA*. Nou kapab viv en lavi normal. E ansanm nou kapab fer 2030 vin en lannen kot Sesel osi i zwenn lemonn pou fer disparet viris *SIDA*. Mersi Mr Speaker.

(APPLAUSE)

MR DEPUTY SPEAKER

Mersi Onorab Balisa-Lepathy. Nou ava prezan donn laparol Onorab Valdana Sultan.

HON VALDANA SULTAN

Bonzour Mr Deputy Speaker. Bonzour tou mon bann koleg. Bonzour tou dimoun a lekout. En bonzour spesyal pour bann sourd.

Ozordi nou pe selebre sa lasemenn pour bann dimoun sourd. Sa i rapel nou ki enklizyon i pa en lasarite ki nou donn lezot, me i en drwa.

Sa lannen, Sesel nou pe selebre li anba tenm “Fer Sesel vin en pei kot tou sourd i kapab servi lalang siny partou kote”.

Mon bann frer ek ser koleg, sa i anmenn nou

konman bann Lezislater pou realize ki nou bezwen, koman en pei, fer bokou plis. Fer ki bokou plis dimoun i konpran lalang siny pou fasilite kominikasyon avek bann sourd.

Mr Speaker, si ou permet mon, mwan menm koman en ansennyen dan lepase mon ti'n fer li enn mon devwar pour mwan sey aprann lalang sourd, aköz toutan mon ti mazine en zour mon kapab ganny enn sa zafan dan mon laklas. Me erezman apre zot in nobou annan en leköl pour zot.

Me, ler ou pa pratik li souvan ou oublie. Alor nou, nou bezwen pran kont ki i enportan pour nou tou fer zefor pou kapab omwen kominik de pti mo avek bann sourd.

Nou pou bezwen pran kont ki egalite i komans avek kominikasyon e ki silans i osi annan son prop lanmizik.

Pou demilye dimoun avek sa kondisyon sourd, lalang siny i pa zis en zouti ki zot kapab servi, me i plito zot lavwa, zot idantite e osi sa fron ki konekte zot avek lasosyete.

Me souvan nou oublie pou enkli zot. Zot lavwa pa ganny tande. Pourtan nou bann ki tande nou annan pouvwar pou tir sa bann baryer. Kan laplipar nou bann servis i depan lo parol selman,

nou endirekteman vyol sa sourd son dinyite ek sa loportinite ki i merite.

Fodre ki nou pran kont ki sak dimoun i annan en lavwa, menm si sa lavwa i ganny eksprimen dan en diferan fason. Nou responsabilite alor i se asire ki personn pa ganny kit deryer.

Ozordi mon dir nou bezwen fer pli byen e nou kapab fer pli byen. Nou rekonnet ki dan bokou pei atraver lemonn bann sourd pa ganny akse avek bokou servis aköz en mank konesans lalang siny par lezot endividi. E sa i enkli isi Sesel osi.

Me i en plezir pour mwan rapel zot ki sa travay in deza komanse an Septanm 2024 isi dan sa Lasanble atraver en Mosyon anmennen par Onorab Regina Esparon lo lapar *Women's Caucus* pou koensid avek Lasemenn pour bann Sourd.

Mosyon ti demande ki lalang siny Seselwa i vin en lalang nasyonal ofisyel. E sa Mosyon ti ganny sipor tou Manm Lasanble.

Mon lapel ozordi se ki Gouvernman i kontiny sa travay pou asire ki i met an plas bann stratezi konpreansiv pou adres bann mankman dan bann Polisi e menm dan bann kad legal.

Nou bezwen asire ki lalang siny i ganny rekonnet,

respekte e entegre dan tou kours posib nou sosyete aköz enklizyon i ranforsi demokrasi.

Kan tou nou sitwayen i santi li enkli, nou en nasyon ris pa zis an diversite, me dan linite. Nou bezwen fer pli byen. Fer ki enklizyon i vin en norm, me pa en leksepsyon.

An terminan Mr Speaker, permet mwan pou adres bann sourd direkteman. Mersi.

Mr Speaker, nou senpleman dir avek bann sourd, tou bann sourd Sesel, nou war zot. Zot koze nou tandé. Nou promot e siport zot. Mersi.

(APPLAUSE)

MR DEPUTY SPEAKER

Mon a dir mersi Onorab Sultan – Valdana Sultan pour ou mansyon. E zis pou *remind* Manm poudir Zedi nou ti a kontan envit zot tou pou partisipe dan sa pti aktivite organize par *National Assembly Services*.

Avek sa, mon'n resevwar en *matter of privilege* ki pou ganny *raised* par *Leader* Lopozisyon, Onorab Bernard Georges lo size *Order 35* kot i konsern *PNQ*. Onorab Georges mon pou donn ou laparol lo size *Order 35*.

HON BERNARD GEORGES

Mersi Mr Speaker. Bonzour Mr Speaker. Bonzour tou bann Manm Onorab. Tou bann dimoun ki pe swiv nou dan lakour.

E en mansyon spesyal pour bann dimoun ki pe viv avek *HIV/AIDS* ki ti zot lazournen yer. E bann dimoun sourd.

E permet mwan Mr Speaker, pou remersye sa 2 Manm Onorab ki'n koze bomaten. Zot in koz dan en fason tre kler e tre *nette*. E zot dan lafason ki zot in abord sa size, zot fer nou Lasanble tre fyer.

Mr Speaker, mersi pou akord mwan sa laparol bomaten pou *raise en matter of privilege*. Parey ou konnen mon ti'n anvoy en *PNQ* yer 09er31 bomaten e sa *PNQ* ti pou diskrit en size nasyonal irzan.

E sa se size sa bann nouvo mouvman dan servis piblik kot in annan serten dimoun ki'n ganny transfer. I annan en bann ki'n perdi zot lanplwa. I annan nouvo pozisyon ki'n ganny kree e i annan – yer nou'n konpran ki en seri sa bann nouvo pozisyon ki'n ganny kree, pou ganny ranpli par bann siporter *United Seychelles*.

Ou pa'n aksepte sa *Private Notice Question*, sa *PNQ* e mon santi ki sa in afekte mon privez, non selman

konman en Manm Lasanble Nasyonal, me privez *Leader* Lopoziyon pou demann en *PNQ*.

Sa size parey mon'n dir Mr Speaker, i en size nasyonal e ki'n anmenn bokou lenkyetid e lensertitid dan en seri, en gran porsyon nou popilasyon. Non selman bann dimoun ki travay dan servis piblik. Me osi zot fanmir.

E an zeneral, i soulev bokou kestyon e bokou lensertitid. E mon ti konfyan ki i ti ava dan lentere nasyonal pour ki Minis i kapab vin devan Lasanble e eksplik rezon deryer tou sa bann mouvman.

Me i paret mwan Mr Speaker, ki nou pa'n – nou privez konman en Lopoziyon e mon privez konman *Leader* Lopoziyon pa'n ganny war dan sa lizye ki mon ti ekspekte anba sa nouvo Lasanble.

Mon ava fer ou rapel Mr Speaker ki dan Lasanble Presedan, sa size pa les *PNQ* vin devan Lasanble Nasyonal ti en size ki ganny souleve souvan par sa dimoun ki ti asiz dan sa sez. E i ti ganny siporte par zot e enkli ou menm ou Mr Speaker, ler sa bann keksoz ti arive.

E mon trouv li inakseptab ki la dan en nouvo Lasanble, avek en nouvo lespri, avek en nouvo latitid ki nou pa pou les Lopoziyon fer

son travay e eksplik avek Lepep Seselwa egzakteman kisisa ki pe arive.

E dezyenm lenkyetid pour mwan se ki i paret ki se sa dimoun ki ti asiz dan sa sez kot mon asize ozordi, ki li menm li i ti sipoze vin reponn sa kestyon la bomaten in deside ki la prezan ki i nepli asiz dan sa sez e in vin Minis, lareg in sanze e keksoz in baskile.

Pour tou sa rezon Mr Speaker, mon pe dir ki mon – mon privez konman *Leader* Lopoziyon dan Lasanble Nasyonal in ganny afekte par en desizyon. Me plis ki sa, Lepep Seselwa i reste dan lensertitid ek dan fernwar lo sa size.

Pour sa rezon Mr Speaker, mon pe demann ou *rule* ki mon privez in ganny aksepte dan en fason ki mon a kapab *move to the next step*. Mon remersye ou.

MR DEPUTY SPEAKER

Mersi Onorab *Leader* Lopoziyon. Onorab *Leader* Lopoziyon, i pa lentansyon Lasanble pou anpes ou soumet ou *PNQ*, ki ou'n fer li.

Ou'n soumet ou *PNQ* parey *Order 35* i permet ou. Me selman kot nou'n pri ladan se ki *Order 35* i kler, *ok*, e nou annan presedans ki mwan mon santi osi ki nou bezwen revwar.

Order 35 i fer ki *PNQ* i merit ganny pran avan *Question Time*. *Question Time*, pour bann manm piblik ki a lekout, se letan bann Minis i vin reponn kestyon bann Manm ki'n ganny soumet lo *Order Paper*.

E anvi ki nou napa en *Question Time*, *Order 35* ki ganny stipile i kler ki nou pa pou kapab pran en *PNQ*.

An menm tan, letan Onorab *Leader* Lopozisyon ou'n soumet ou *PNQ*, e mon'n osi met devan ou anba *Order 34* posibilite ki ou kapab anmenn en *Urgent Question* lo sa size. Me selman i osi i annan son dele letan ki akorde, ki 24er pour ou kapab soumet sa kestyon.

So sa size ki ou'n trete dan ou *PNQ* i *still* kapab ganny vin reponn si ou an dezir swiv Lord 34 pour ou kapab fer sa soumisyon.

Me selman ou'n fer mwan konpran poudir ou santi poudir si ou servi Lord 34 i kapab abes ou pozisyon konman *Leader* Lopozisyon anba *Order 35* pour ou kapab soumet en *PNQ*, ki *Order 34* nenport ki Manm osi i kapab servi si i annan en *urgency* pour li anmenn en kestyon.

So avek sa, i annan en travay ki mon santi *Standing Orders* ki dayer nou'n diskite dan *past ABC* ki nou devret revwar *Order 35*. Kot si

zanmen napa en *Question Time*, ki privez *Leader* Lopozisyon i pa a ganny afekte.

So Madanm Speaker in fini donn en direktiv pou fer sa travay *for the next* – avan 6 mwan, ki i ava annan en *complete review of the Standing Orders itself* pou regard tou bann *Orders* ki nou santi pa pe reflekte realite konteks modern politik ki nou ladan e fer li vin pli relevan. Parey nou dir, fer li sa Lasanble pour Sesel.

So avek sa mon regrete ki mon pa pou *breach the Standing Orders*, me travay i a kontinyen. E si demen nou war poudir i annan letan pou met kestyon lo *Order Paper*, sa i devwar tou bann Manm tou le de *Caucus* pou fer li. E la nou ava kapab annan en *PNQ*.

Me selman Onorab Georges, ou annan *Order 34* ki si ou anvi anmenn sa size devan, ou lib pou fer li anba *Standing Order 34*. So sa i mon *ruling* lo sa. Mersi.

HON SANDY ARISSOL

(Off-Mic)

MR DEPUTY SPEAKER

Ou annan en *point of order*? Ale Onorab.

HON SANDY ARISSOL

Mersi Mr Speaker, bonzour. Bonzour tou bann Manm.

Bonzour tou dimoun ki a lekout.

Mon ti anvi senpleman demann ou gidans an relasyon avek *Order Paper*. Parske lo *Order Paper – Revised Order Paper* i annan *First Reading*. Mon war i annan 3 *Bill*. *Employment (Amendment) Bill*, *Mental Health, Prevention of Drug Abuse*.

Mon ti pe zis demande si presedans ki nou ti servi pour Lasanble Nasyonal in sanze? Parske avan, bann *Bill* letan i ganny Gazete, *Bills Committee* i zwenn avek bann *stakeholders*. Parey nou apel sa, bann *sponsors*. Then apre ki nou fer *First Reading*.

Be la mon pa – lo mon kote bann Manm *Bills* pa'n zwenn. Mon pa konn lo zot kote. Be mon war tou bann *Bills* in ganny – pe al fer *First Reading*.

So mon pe gete si nou'n sanze sa, oubyen kekfwa lo kote *US* bann *Bills Committee* zot in zwenn avek *sponsors* zot in kot nou ater, parey letan zot in al kot Sinwan. Me mon ti a kontan ganny en leksplikasyon lo la, Mr Speaker.

E dezyenmman, mon ti a kontan letan ou'n koz an relasyon avek lo sa travay ki Madanm Clerk pou fer, mon krwar nou lo nou kote mon krwar i enportan, letan nou pe get *Order of Business* apre

Standing Orders 25, mon war *Private Notice Question* i *standalone*. Apre tou bann larestan kestyon i vin par anba; *Question of which notice has been given*; *Question Without Notice*; *Statement by Minister*. So, mon mazine sa osi i en travay parey ou'n dir ki mon krwar i ava enportan pour nou fer en keksoz, pour ki *Leader* Lopozisyon i ganny son privez konman en Manm pour li kapab demann son kestyon dan Lasanble Nasyonal. Mersi bokou Mr Speaker pou akord mwan sa pti letan.

MR DEPUTY SPEAKER

Mersi Onorab Arissol. Lo ou dezyenm pwen, wi i annakor pou annan sa bann *revised review* ki pou fer anba *Standing Orders*.

Lo ou premye pwen, napa naryen ki'n sanze an term prosedir. An vi ki nou dan serten lirezans letan pour nou vwar serten bann *Bill* ki Gouvernman pou anmennen, an menm tan nou konnen poudir Lasanble i annan en kalandriye ki'n ganny set. E mwan mon pou napa problem si nou anvi kontinyen fer *Sitting* ziska apre le 20 ouswa apre lannen.

Bills ki nou pe fer *First Reading*, *Chairman* Komite *Bills Committee* in ganny

enformen pou li zwenn pou fer diskisyon lo *Bill*.

First Reading li menm li i zis en mansyon. I pa pou sanz naryen. I zis en mansyon i pa pou sanz naryen. I zis en mansyon ki pou vin devan Lasanble an term formalite.

E apre sa, *before the Second Reading* nou konnen poudir i bezwen annan *scrutiny of Bills* ki ganny fer par *Bills Committee* avek *the sponsors of the Bills*. E osi pou anmenn okenn bann lezot lamannman ki pou ganny fer.

So rezon ki nou'n akord pou met sa *Revised Order Paper* e enkli sa bann *Bill* aköz son *time sensitivity* pour li ganny son *7 days' notice by next week*, ki bann *Bills* i ava kapab bouz lo staz *Second Reading*.

E si nou ti pou fer li *by next week*, ki fer ki i reste nou forse 2 semenn edmi, nou pou bezwen kontiny nou *Sitting* ziska pre lafen lannen.

So avek sa, nou pran en desizyon e ki *ABC* pou zwenn taler pou diskite avek le 2 *Leaders' the order* ki sa bann *Bills* pou ganny diskite devan Lasanble.

So, nou pou zwenn ler en kar pour nou ratifye *the matter itself*. E yer swar osi mon'n koz avek Onorab *LGB* pou konpran lan konzonktiv ki nou ladan. E mon krwar sa ki nou pe fer i pa en *breach of*

regulation, me i plito en fason fer pour nou kapab fer nou travay bouz de lavan. Mersi. Onorab Gill, ou annan –

HON CHURCHILL GILL

Mersi Mr Speaker. Bonzour tou Manm. Mon ti le zis met lo rikord konman Vis-Chair *Bills Committee* ki *Bills Committee* pa ankor zwenn. Manm *United Seychelles* pa'n zwenn a okenn moman pour sa 3 *Bill*. Mon le zis met lo rikord. Mersi.

MR DEPUTY SPEAKER

Mersi pour sa klarifikasyon Onorab Gill. Nou ava bouz lo nou 4enm pwen. Onorab Georges?

HON BERNARD GEORGES

Mersi Mr Speaker. Mr Speaker, an koneksyon avek sa bann zafer *Bills* la, i kler, mon konpran egzakteman direksyon kot ou pe ale e ki aköz nou napa bokou letan, sa bann *Bills* in vini pour *First Reading*. Nou napa okenn problem avek sa. E ki *ABC* ava decide dan ki lord bann *Bills* pou ganny pran isi dan Lasanble.

Me mon ti a kontan *urge* avek *Bills Committee* pour zot zwenn o pli vit posibil, aköz nou'n ganny dir zot pa ankor zwenn. Me i pou enportan pour zot zwenn *ASAP*, pour ki ler nou retournen sa bann *Bills* nou kapab pran zot apre

ki *ABC* in fini regard ladan.

Akoz si nou pou les sa semenn glise san ki *ABC* i zwenn, nou pou pe dir menm keksoz semenn prosenn e taler nou term pou'n fini e nou pa pou'n travay lo sa bann *Bills*. Alor avek ou permisyon mon ti ava demann avek *Bills Committee meet ASAP* e regard sa bann *Bills*. Mersi.

MR DEPUTY SPEAKER

Mersi Onorab *Leader* Lopoziyon. Sa komunikasyon in deza ganny fer, *ok* e mon a pas laparol Onorab *LGB* ou annan - aköz nou ti annan en konversasyon lo sa size.

HON SYLVANNE LEMIEL

Bonzour Mr Speaker. Tou mon bann koleg Manm Onorab, tou dimoun a lekout.

Mon'n pran kontak avek bann Minis konsernen kot nou pe demann zot sirtou par egzanp Minis Alexander nou ti pe demann li si zot kapab vini demen, apre nou ava komunik ek Madanm Clerk pou fer an lezot laranzman.

So nou pe zis esper son larepons aköz i enn Minis ki ti pe dir son *Bill* Trezyenm Mwan Saler i enn ki *time sensitive* e *VP* ki sipoze pe vin prezant sa 2 lezot *Bill* aköz i annan 2 *Cabinet meeting* enn i ek enn demen e i pou dan sa 2 *Cabinet meeting*.

So, i ti pe demande ki nou zwenn Zedi i ti pou pli apropiye pou li, me selman i reste pou nou konfirman si nou zwenn li Zedi nou zwenn enn demen e *Mental Health Bill* ek sa lot *Bill* pou mon pas lo la Zedi. Sa i reste a konfirman pandan lazournen ozordi. Mersi.

MR DEPUTY SPEAKER

Mersi Onorab *LGB*. Mon mazin en ki taler nou ava ganny plis detay letan nou pou diskite lo *ABC* osi. Apre midi. Madanm Clerk ou kapab prezant nou bann papye?

MADAM CLERK

Mersi Mr Speaker. Bonzour Mr Speaker, bonzour tou bann manm, tou bann *staff* Lasanble e tou dimoun a lekout. Bann papye ki pe ganny prezante bomaten; -

S.I. 86 of 2025, International Bank for Reconstruction and Development-Renewable Energy Acceleration Project-Phase I of the Multiphase Programmatic Approach, Debt Guarantee Order, 2025.

S.I. 87 of 2025 International Bank for Reconstruction and Development-Renewable Energy Acceleration Project-Phase I of the Multiphase Programmatic Approach, Debt Guarantee Order (No. 2), 2025.

S.I. 88 of 2025 Financial Institutions (Foreign Currency Exposure) (Amendment) Regulations, 2025.

S.I. 89 of 2025 Social Security (Retirement Age) Regulations, 2025.

S.I. 90 of 2025 Environment Protection (Tourism Environmental Sustainability Levy) (Amendment) Regulations, 2025. Mersi Mr Speaker.

MR DEPUTY SPEAKER

Mersi Madanm Clerk. Nou ava bouz prezan lo *First Reading the Public Bills*.

MADAM CLERK

Mersi Mr Speaker. I annan 3 *Bill* ki pe ganny mete pou *First Reading*; -

Employment (Amendment) Bill, 2025. Mental Health Care Agency Bill, 2025 e Prevention of Drug Abuse and Rehabilitation Agency Bill, 2025.

This Act may be cited as the Employment (Amendment) Act, 2025.

This Act may be cited as the Mental Health Care Agency Act, 2025 and shall come into operation on such date as the Minister may by notice in the Gazette appoint.

This Act may be cited as the Prevention of Drug Abuse and Rehabilitation Agency Act, 2025 and shall come into

operation on such date as the President may by notice in the Gazette appoint. Mersi Mr Speaker.

MR DEPUTY SPEAKER

Mersi Madanm Clerk. Nou ava prezan bouz lo Mosyon anliny avek Lartik 154(6) pou laprouvasyon Bidze siplemanter. Mon a donn laparol Onorab LGB pou ou fer prezantasyon *the Motion itself*. Mersi.

HON SYLVANNE LEMIEL

Mersi Mr Speaker. Bonzour ankor en fwa tou dimoun a lekout. Mr Speaker Mosyon i lir *comme swivan*; -

The National Assembly resolves to approve a supplementary estimate of SR452,246,772.64, a budget cut of (SR969,431,988.73) resulting to a net budget cut of (SR517,185,216.08) for the year 2025 laid before the Assembly in accordance with Article 154(6)(b) of the Constitution. Mersi.

MR DEPUTY SPEAKER

Segonde? Onorab Gill.

HON CHURCHILL GILL

Mersi Mr Speaker. Mosyon i ganny segonde. Mersi.

MR DEPUTY SPEAKER

Mersi Onorab Gill. Nou ava prezan, Onorab.

HON SYLVANNE LEMIEL

Mersi Mr Speaker. Mr Speaker, Koleg Manm Onorab, tou dimoun a lekout bonzour.

Mosyon table ozordi devan Lasanble Nasyonal pou aprouv en Bidze siplemanter R492milyon, 246mil.77 e osi en sonm R969milyon, 431mil.99, larzan ki'n pa'n depanse depi Zanvye ziska Zen 2025 e sa pou fer ki larzan ki ti'n orizinalman ganny bidzete pou depanse pou ganny redwir par 517milyon, 185mil.22sou.

Mr Speaker, Gouvernman pe demann sa Bidze Siplemanter pou ki i kapab kouver depans pou bann proze e lezot byen e servis ki ansyen ladministrasyon in fer letan ki zot ti ankor dan lofis.

Mr Speaker, nou Gouvernman i ganny gide par en senp prensip, larzan Lepep Seselwa i bezwen ganny zere avek responsabilite, dan latransparans e toultan avek lobzektif pou amelyor lavi nou bann dimoun.

Sa revni milye lannen prezante par Minis Pierre Laporte Mardi le 25 Novanm 2025, in donn nou en portre tre kler lo leta finansyel nou pei ozordi. I mon responsabilite pou eksplik sa Lasanble e nou pep aköz laprouvasyon sa Mosyon i

neseser e i dan lentere nou pei?

Mr Speaker, Minis Laporte atraver son prezantasyon in montre ki pandan premye 6mwan 2025 nou lekonomi in perform pli byen ki i ti'n ganny espekte. Olye en sirplis 6milyon, ki ti'n ganny prozekte pei in ganny en sirplis fiskal R692milyon.

Det koman en poursantaz nou prodwi domestik brit oubyen koman nou konn li *GDP* in desann pou ariv 55.2poursan e sa i montre ki nou pozisyon finansyel i reste soutenab.

Koleksyon reveni *tax* sirtou *tax* valer azoute ki nou konnen li koman *VAT*, *tax* biznes koni koman *business tax* e *tax* lo reveni personnel ki nou'n dir li *personal income tax* in osi perform tre byen, ki vedir ki *tax* ki'n ganny kolekte, sa premye 6mwan i plis ki menm peryod 2024 par apepre R500milyon. Sa rezilta i bann siny pozitif e zot merit ganny mentenir.

Me Mr Speaker, sa revni i osi montre plizyer febles ki nou pa kapab inyore, bokou Proze Kapital pa'n materyalize enkli program lakaz ki ti ekspekte ganny finanse par Gouvernman Lasin e *l'Arabie Saoudite*. Sa bann proze i enkli 69 *unit* lakaz Anse Royale e 72 *unit* Béolière Port Glaud. *IDC* pa'n kapab pey son *dividend*

\$20milyon ki ti'n ganny prevwar e sa i montre ki i anba serten presyon finansyel.

Reveni ki pa ti sorti dan *tax* ki nou dir *non-tax* in perform bokou pli ba, pres par lanmwatye. Retar dan lenplimantasyon plizyer proze e osi rekritman atraver plizyer Minister i kontinyen reste en problem. Sa bann realite i vedir ki Bidze inisyale 2025 i bezwen ganny re alinyen avek realite ozordi e non pa avek bann prozeksyon ki ti ganny fer boner lannen pase.

Mr Speaker, sa bann re alinyman pou ganny fer atraver aprouvasyon ki sa Mosyon pe demande. Ki i en Bidze Siplemanter R452milyon, 246mil.77 ki pe ganny finanse dan sa R969milyon, 431.77 ki pa'n ganny depanse. Sa Bidze Siplemanter i osi reflekte en *savings* 517milyon, 185mil.22sou, 517milyon, 185mil.22sou, dan Bidze nasyonal 2025.

Mr Speaker, sa i en pwenn enportan. Malgre ki Gouvènmman i bezwen finansman adisyonnèl dan serten domenn, nou pe kapab fer sa avek mwens larzan ki ti'n orizinalman ganny bidzete par ansyen administrasyon.

Sa i montre disiplin fiskal, setadir en zefor konsyan pou kontrol depans, evit gaspiyaz e asire ki larzan

piblik i ganny zere dan en fason soutenab e responsab.

A sa pwenn, mon konsey Gouvènmman pou pa ezite koup Bidze kot keksoz pa pe marse, pou pran aksyon kot i annan retar oubyen aziste kot i nesesser. Sa bann larzan adisyonnèl ki mon pe demann Lasanble pou aprouve pou kouver bann depans ki enkli; -

Finansman pou *server ICT* e *laysenns software* ;

servis pou zafan ek sipor pou bann program *daycare*,

finansman pou Lazans Transpor lo Later pou kouver serten defisit dan son loperasyon,

kou lasante ki relye avek tretman dyaliz,

bezwen bann loperasyon Komisyon Anti-Koripsyon,

lenfrastruktir ki ti'n ganny fer pou *FIFA Beach Soccer* e osi *CJSOI*.

Bann Minister, Departman e Lazans ki'n fer bann proze e depans ki pa ti'n ti'n prevwar pe esper larzan dan sa Bidze Siplemanter pou kouver sa bann depans.

An menm tan Gouvènmman pe propoz bann rediksyon mazer dan plizyer domenn tel ki bann Proze Lakaz ki ti espekte ganny finanse par bann partenarya etranze, lenfrastruktir lo Ile Aurore, proze devlopman ki ti ou ganny finanse par *IDC*,

lenfrastruktir *PUC*, *savings* lo saler aköz retar dan rekritman, depans pli ba dan byen e servis, rediksyon dan serten benefis sosyal baze lo depans reel.

Mr Speaker, sa bann rediksyon zot reflekte senpleman realite ki bokou proze pa'n ganny konplete ouswa ganny delivre sa lannen. Nou pa kapab kit larzan ki'n ganny atribye pou bann proze ki nou konnen pa pou materyalize, oubyen esper reveni ki nou konnen pa pou vini. Sa Mr Speaker, i bon gouvèmans e iresponsab.

Mesaz kler ki sa Bidze Siplemanter i anvoy avek Lepep, i ki nou en Gouvènmman ki pou eksplike e dir Seselwa ki mannyer son larzan pe ganny depanse, si i annan keksoz ki pa kapab ganny delivre nou pou dir, nou pa'n kapab e aköz. Nou en Gouvènmman ki pare pou pran aksyon kot i nesaser.

Si Bidze i bezwen ganny re aziste, nou pa pou ezite pou fer li. Kot nou vwar defayans dan lenplimantasyon, Gouvènmman pou bezwen pran aksyon pou mentenir disiplin. Mr Speaker, nou Gouvènmman pe prepar en fondasyon pou en pli bon performans ekonomik an 2026, e bann lannen ki pe vini.

Me i enportan pou nou realize ki pou nou batir en

lekonomi ki pli solid, nou bezwen stabiliz sityasyon aktyel. Sa Mosyon Mr Speaker, i pa zis en legzersis teknik, i premye legzanp nou filozofi ekonomik.

Zer larzan piblik dan en fason transparans avek pridans e kot lentere nasyonal i pas premye. Mr Speaker, mon oule dir avek manm piblik ki pe ekoute, ki pe ekout nou, sa Mosyon i vedir ki Gouvènmman pe pran kontrol depans piblik. I pe ferm lespas kot i annan gaspiyaz e asire ki resours nasyonal pe byen- pe ganny byen servi.

Mosyon pa vedir koupir dan bann servis esansyel. I vedir senpleman ki nou pe aziste Bidze lo realite ki devan nou ozordi. Lobzektif se antre dan lannen 2026 avek en lekonomi pli solid.

Mon osi oule rapel Lasanble ki lo kote det piblik a lafen Zen 2025, ti R18.15bilyon, oubyen 52-R55.2poursan prodwi domestik brit ki nou dir *GDP*. Sa i pli ba ki milye lannen 2024 kot det ti 59poursan prodwi domestik brit *GDP*. Sa i montre ki nou pe reste anliny avek plan bidzeter e nou pe kontinyen mentenir en pozisyon finansyel soutenab.

Mr Speaker, Mosyon ki devan sa Lasanble i pa zis en demann legal, i osi en lobligasyon moral pou asire ki

Bidze Nasyonal i reflekte bann bon pratik finansyel tel ki disiplin, responsabilite fiskal ek latransparans.

I reasir bann investiser e i donn konfyans nou bann partner lokal e enternasyonal. E pli enportan i montre pep Seselwa ki Gouvernman i reste an kontrol, i vizilan e i determinen pou zer larzan sa pei dan en fason responsab e pridan.

Se pour sa rezon ki mon pe demann nou Lasanble pou aprouv en Bidze Siplemanter R492milyon, 246mil.77sou e osi en sonm R969milyon, 431mil.99sou larzan ki pa'n depanse pou sa premye 6mwan 2025. E osi larzan ki pe ganny koupe a en sonm R517milyon, 185mil.22sou. Mersi Mr Speaker.

(APPLAUSE)

MR DEPUTY SPEAKER

Mon a dir mersi Onorab *Leader* Zafer Gouvernman. Mosyon in ganny soumet devan Lasanble e nou ava aprezan ouver deba pou bann Manm ki anvi koz lo Mosyon. Mersi. Onorab Larsen.

HON CECILE LARSEN

Mersi Mr Speaker. Bonzour a tous espesyalman zabitan Au Cap ki a lekout.

Mr Speaker, mon remersye Minis Finans pou sa

prezantasyon ki'n met an perspektiv bann febles ki annan dan Bidze 2025 ki ti ganny prepare par ansyen ladministrasyon.

Mr Speaker, si nou pe koz lo laverite ozordi, se ki Bidze 2025 ti en Bidze san direksyon par en Gouvernman *wishful thinking*, san vizyon e pli grav ankor en Bidze ki pa'n anmenn okenn mezir konkret pou soulaz lavi Lepep Seselwa enkli zabitan mon distrik Au Cap.

An vre dir, Bidze 2025 ti kre en ilizyon sirplis, me sa ti senpleman rezilta retar lo lenplimantasyon. Mr Speaker, Ansyen Gouvernman ti prezant en sirplis frimer 1.1poursan *GDP*, me realite parey Minis in montre sirplis ki nou pe vwar ozordi i pa aköz bon planifikasyon ansyen Gouvernman, me plito rezilta retar dan depans defayans ek lenplimantasyon ek mank kapasite bann *MDAs* pou delivre.

Apré tou, sa gro kozman bann ti fer an 2024 e 2025 nou trouv nou dan en sityasyon kot bann proze pa'n ganny egzekite, bann rekritman pa'n ganny fer e bann servis pa'n ganny ranforsi. Letan nou pe get bann Proze Kapital nou kapab vwar li koman bann gro promes me kot i konsern delivre, zero.

Nou kapab dir ki bann gro Proze Kapital ti ganny anonse avek bann gran lafanfar, me ki'n arive - febles kapasite Gouvernman pou egzekit tou proze ki ti previ.

Proze nou konstriksyon lakaz ki pe ganny finanse par Gouvernman Lasin rediksyon 209.7milyon.

Proze *Social Housing* anba finansman Saudi rediksyon 56.6milyon, Ile Aurore rediksyon total plis ki 85milyon. Les mwan tous en pti pe dan Au Cap, nou tou nou konn bann problem ki egziste e kot zabitan ki ankor pe soufer. Mankman lozman, sityasyon trafik e semen sirtou la kot laplenn St Andre ki bokou Seselwa i servi pou ariv dan zot destinasyon e en mank lenvestisman dan lenfrastruktir kominoter. Eski Bidze 2025 ti adrese okenn parmi sa bann problem? Larepons i senp, non !

En lot laspe ki nou vwar se reveni ti for, me ki benefis sa i anmennen pou Lepep Seselwa? Mr Speaker, VAT, *business tax*, *personal income tax* tou ti perform pli byen, sa i vedir biznes ti travay, pep ti kontribye. Me eski ansyen Gouvernman ti servi larzan sa pep pou ed son pep?

Alor i bon note ki ozordi nou pe rikord plis ki R500mil-R500 milyon an plis konpare avek 2024. Me eski nou Kapab

dir sa Gouvernman in met lord? In annan disiplin fiskal e in travay avek efikasite? Oubyen zot in plito travay pou *the few but not the many*?

Mr Speaker, en lot problem mon oule soulinyen se kot ansyen Gouvernman ti pe diriz bann lantrepriz piblik, desizyon ti ganny pran pou fer IDC pa pey son *dividend* \$20milyon, san okenn plan alternativ, e pou mwan sa ti en desizyon iresponsab. Apre sa nou'n ganny oblize reviz *non-tax revenue* pou anba R293milyon.

E sa osi zabitan Au Cap in santi, parski sa bann reveni in kapab ganny servi pou amelyor lasante, prepar semen e drenaz, donn nouvo semen kot zabitan ankor pe mars ek konmisyon lo latet, adres bann problem delo ki sirtou bann zabitan Au Cap ki reste dan montanny pe fer fas avek.

Nou kapab get osi bann program *welfare* kot bann dimoun pli vilnerab in ganny negliz. Mr Speaker, ozordi nou vwar en rediksyon R40milyon dan benefis sosyal, sa i montre ki bann prozeksyon swa pa ti baze lo la realite, oubyen Seselwa pli vilnerab pa'n war okenn soutyen.

Nou pa'n vwar okenn nouvo linisyativ pou siport zabitan, bann dimoun aze e bann fanmir ki pe soufer me

ozordi avek nouvo direksyon nou Gouvernman, Minis in met lanfaz lo sa bann benefis, sa se gouvrenans responsab, sa se en Gouvernman *for the many not the few*.

Mon a tous ankor dan distrik Au Cap kot zabitan ti'n ganny oubliye pou bokou lannen. Nou'n tann promes ki lakaz pou vini, lenfrastruktir pou ganny konstrir, zanfann pou ganny plis fasilite, me Bidze 2025 pa'n met ni R1 dan domenn proze spesifik pou Au Cap, peser ek fermye ankor pe vann obor semen.

Zabitan Au Cap in dir mwan plizyer fwa nou'n vote, nou'n espere me nou pa'n vwar naryen. Alors se pour sa rezon ki sa 764 zabitan ki ti fer konfyans sa ansyen Gouvernman an 2020, ti deside vot pou e meyer demen pou zot zanfann e se sa konfyans ki zabitan in donn mwan ki pou motiv mwan pou fer en diferans. Mersi Mr Speaker.

(APPLAUSE)

MR DEPUTY SPEAKER

Mersi Onorab Larsen. Mon a donn laparol Onorab Gabriel.

HON CONRAD GABRIEL

Mersi Mr Speaker. Dabor mon a dir bonzour tou dimoun a

lekout espesyalman bann zabitan la Pointe Larue.

Mr Speaker, nou sikse ziska prezan in ganny garanti par nou stabilite politik lape, limite antre nou e osi nou devouman kolektiv pou fer Sesel avans pli devan. Nou *manifesto* i eksplik sa an detay e mon ankouraz tou dimoun rod en kopi e lir byen. I paret senp me ranpli ek keksoz ki pou ede soulaz soufrans nou pep.

Dabor mon ti a kontan remersye Minis Finans, Minis Laporte pou vin fran e dir laverite ek sa pep. Apre ki nou ti ganny prezante avek pli gro Bidze ki Sesel zanmen in deza annan, nou ti konnen poudir sa ti en Bidze Eleksyon. Minis, mon konnen i pa pou en travay fasil sirtou e mon garanti ki sa lekip ki ou annan pou delivre e nou bezwen zis *trust the process*.

Bokou dezord in ganny fer, e bokou domaz in arive partou, partou. I pou pran nou ladministrasyon en pe letan pou repar serten domaz pou finalman remet sa pei lo sa nivo ki ti vremen ete e merit arive. Fodre nou fer atansyon mannyer nou depans larzan pei e an dizon sa Mr Speaker, mon ti a kontan tous sa Antite ki apel ACCS.

ACCS dapre konpran ti sipoze anmas R3.5bilyon e ti napa en dele letan kan

egzakteman sa pou arive. Eski nou'n ganny *value for money* pou sa kantite depans ki nou'n fer pandan sa 5an? Mon panse ki Onorab Georges dan ou kapasite koman Chairman Komite FPAC ou a donn nou koudmen kler sa tors lo tou sa ki'n pase dan ou Gouvernman.

Mr Speaker, nou'n depanse e byensir nou bezwen peye e regalis nou bann depans. Par kont i annan serten depans in ganny fer e la nou pou bezwen esper Rapor Oditer pou vreman konnen ki'n arive. E mon panse ki i annan serten *investigation*, lenvestigasyon ki devret ganny frer deswit. Sa zafer *Beach Soccer* i en size ki merit vreman ganny pran- pa ganny pran alalezer.

Nou bezwen osi fer mansyon sa fame devlopman lo Assomption e san oubliy sa zafer CCCL. Mon profit lokazyon pou asir zabitan Pointe Larue ki mon pou fer sir ki a proze distrik i ganny enplimante, tel parey semen, lakaz, drenaz e lezot ankor.

Aktivite dan distrik pou anmenn sa zwa de viv ki ti egziste oparavan, mon kapab dir fortman ki nou'n ganny kit ater pandan sa dernyen 5an, bokou promes dan vid kot bokou zabitan in soufer. Legzanp sa fame Proze Trwazyenm Lane ki pa ankor

ni menm ariv kot *ex-Minister Derjaques* ti dir i pou arive.

Bokou febles dan lenplimantasyon bann proze e sa in koz bokou fristrasyon parmi popilasyon. I remarkab ki SIA napa sa kapasite pou delivre e sa in koz retar dan lenplimantasyon. Mon swete ki avek sa nouvo Gouvernman nou a met nide e zefor ansanm pou ed nou sitwayen.

Mon profite pou remerisi Minis Ledikasyon Mr David Pierre ki ti resaman vizit Lekol Segonder Pointe Larue osi Minis Pamela Charlette pou son vizit kot lakour bann dimoun aze. Mon asire ki sa sistenm travay pou sirman anmenn bokou lavantaz pou dekouver vre problem ki pe afekte nou bann zenn e osi nou bann dimoun aze.

Mr Speaker, si nou ladministrasyon i ganny son *formula* byen, pa pou tire *United Seychelles* o pouvwar. 2030 *sorry* mon pa pou war zot, zot ankor feb manrmay! Sa Ladministrasyon US in deza fini komans montre Lepep Seselwa ki nou sel opsyon pou Sesel.

Ler mon get sa *lineup* dan sa *Cabinet* i montre nou ki nou annan sa pep aker. Nou'n lager pandan 5an pou ariv kot no ete e nou bezwen delivre. Nou'n arive e nou pou reste san vyolans dan linite. Mon swete ki nou a travay ansanm

pou benefis Sesel e tou son zanfán, bliy politik partizan e kot i byen annou dir i byen e kot i mal annou rod solisyon ansanm dan lape e larmoni.

Mon profite pou felisit tou nou bann PSs, nou bann SS, nou bann *Special Advisors* e swet zot bonn sans dan zot parkour.

E lo sa not mon ti a fer- ti a fer mon en gran loner pou egalman dir en felisitasyon spesyal pou nou *ex-MNA* Jeniffer Vel pou son lapwentman dan Biro Prezidan, en zabitan nou zoli distrik Pointe Larue ki ankor zenn e i annan bokou pou ofer. *Congratulations and all the best* de lapar bann zabitan Pointe Larue.

Mr Speaker, sa i montre ou ki bann madanm pe komans pran bann pozisyon kle dan nou sosyete. Mr Speaker, an terminan, ankor enn fwa mon swet Minis ek son lekip bonn sans, ki Bondye i donn zot lafors ek kouraz pou fer fas ek sa latas difisil devan nou.

Mon pa bliye dir mersi tou mon bann zabitan Pointe Larue ki'n met sa konfyans dan mwan pou vin zot lavwa dan sa wityenm Lasanble Nasyonal. Bondye beni zot tou. Mersi.

(APPLAUSE)

MR DEPUTY SPEAKER

Mersi Onorab Gabriel. Nou a donn laparol Onorab David.

HON ROBERT DAVID

Bonzour Mr Speaker. Bonzour tou Manm Onorab. Mersi Mr Speaker, osi bonzour tou dimoun ki pe swiv nou lo bann rezo sosyal e partou. Mr Speaker letan nou pe debat lo Mosyon pour aprouv Bidze Siplemanter ki'n ganny prezante devan Lasanble, Minis Finans Mr Pierre Laporte, i montre prensipalman bann depans ki'n fini fer e lezot ki pa'n ganny fer e ki bezwen ganny regularize.

Sa Bidze i fer mwan realize ki bokou dimoun dan mon distrik Mont Buxton ki ti pe rod en lanplwa Mr Speaker pandan sa bann letan, ti a fasilman ganny en louvraz dan sektor piblik.

Ler mon konsilte avek lenformasyon ki aparet lo sa Bidze Siplemanter, i anmenn mwan ver sa size ki konsern resours imen. Resours imen Mr Speaker mon rekonnet ki resours pli enportan dan okenn lorganizasyon ki kapab egziste.

En kantite larzan ki pa'n servi koman saler Mr Speaker, i fer mwan poz ankor kestyon; eski prosedir pour rekrit dimoun pour travay dan

Gouvernman ti tro long? Dezyenmman eski ti annan defi pour idantifye dimoun konpetan pour travay dan bann pos ki ti disponib?

E trwazyenmman Mr Speaker, eski Gouvernman ti seryezman annan lentansyon pour anploy ankor dimoun pour travay dan sekter piblik? E a sa letan mazorite sitwayen Seselwa ti pe fer fas avek difikilte lavi e plizyer fanmir ti pe war li preski enposib pour fer de bout zwenn. Pri komodite ki ti pe monte, bann pri litilite osi ti pe fer pour zot, Seselwa ti pe monte desann pour rod en travay, fer laplikasyon lo laplikasyon, *interview* apre *interview*, vir an ron me anven.

Mr Speaker preski R27milyon pa'n ganny depanse ki ti a kapab ganny servi pour pey saler. Mon napa dout Mr Speaker, en kantite Seselwa ti a kapab ganny en plas travay e sa ti a ede amelyor kalite lavi zot fanmir.

Annou pa oubliy bann paran tousel, bann zenn ki'n fek fini lekòl post segonder, zenn ki pe rod en lanplwa pour premye fwa, bann *graduates* ek bann profesyonnel ki ankor pe rod en lanplwa. Be mwan Mr Speaker mon annan lespwar pour zot, Prezidan Dokter Patrick Herminie in reasir nou ki personn pa pour ganny kit deryer. Gouvernman

in revwar program *Long Service Allowance* ki pour ankouraz plis dimoun pour zwenn e reste dan sekter piblik. Sa i avek bi pour ogmant prodiktivite, reste motive e asir en o nivo servis efikas dan sekter piblik. Se sa ki nou bezwen Mr Speaker.

E mwan, mon pour donn mon sipor sa Bidze akòz nou pei i bezwen fonksyonnen e prospere. E mon demann Lasanble Nasyonal pour zwenn ansanm ini e sipòt sa Bidze ki devan nou. Mr Speaker mon dir ou mersi.

(APPLAUSE)

MR DEPUTY SPEAKER

Mersi Onorab David. Nou a donn laparol Onorab Alvin Grandcourt.

HON ALVIN GRANDCOURT

Mersi Mr Speaker, bonzour tou dimoun ki a lekout, tou bann Manm Lasanble. Mr Speaker mon la ozordi pa zis pour soutenir sa Mosyon me pour reprezant lavwa Seselwa e zabitan Grand Anse Praslin.

Bann manman, papa, zenn, ki poz en sel kestyon. Kote tou in ale? Wi, nou pour aprouv sa Mosyon parske Lalwa i demande, sa Lalwa *Supplementary Appropriation Act 2024* en kantite larzan, R452.2milyon, i bezwen ganny

regilarize dapre Lartik 154 dan nou Konstitisyon, sa i nou devwar.

Me devwar pa permet nou reste trankil, laverite i bezwen ganny dir e laverite i sa.

Sa bann sif pa rakont en zistwar progre, zot rekont en zistwar defayans. Sif i koze me ki zot pe dir, pour Seselwa? Lo papye i paret prop, i paret disiplin fiskal me mon demann zot eski sa bann *savings* in met manze lo latap pour bann fanmir ki ti pe soufer? Eski zot in fer pri lavi desann? Eski zot in kree travay pour nou bann zenn?

Non! Deputy Speaker, larepons i non! En loportinite ki'n ganny rate, lavi dimoun ki'n ganny ignore, mazin en si menm 10poursan sa 452.2milyon, savedir 45.2milyon ti ganny mete dan lakaz abondab fanmir Grand Anse Praslin ti kapab annan zot prop lakaz olye esper ankore plizye lannen.

Mazin en si enn pti bout larzan ti ganny servi pour repar nou semen ek drenaz biznes ti kapab prospere, zabitan ti kapab deplase, e sirkile e inondasyon pa ti pour met lavi ferme e sitwayen dan difikilte. Si sa larzan ti ganny met dan proze lakot, nou problem erozyon ti kapab ganny en solisyon lonterm, reflesir, si nou ti ranforsi sistenm lasante lo Praslin,

klinik byen ekipe, lazans dirzans, ki ti kapab reponn pli vit, sov lavi e gard dinyite nou bann sitwayen.

Ladministrasyon presedan in mansyonnen ki'n fer *saving* 609.7milyon dan son bann Proze Kapital ki i pa'n enplimante. Pour lannen 20-25 eski ti napa planifikasyon avan zot ti prepar sa Bidze? Zot in fer en *savings* R69.7milyon kot saler, Seselwa i konsernen.

Pou premye 6 mwan 20-25 en *savings*, mon demande si zabitan Grand Anse Praslin ti kapab ganny zis enn de pti milyon pour kapab ganny anploye e soulaz problem lanplwa dan mon distrik. Pa ti pour fer byen? Ansyen Minis Finans ti dir ki son Bidze 2025, i pli gro Bidze ki Gouvernman ti'n deza anmennen, apre ti taye an Zanvye 2025 pour al dan sektè prive.

La dan milye lannen zot in koup Proze Kapital par R609.5milyon e si sa ki nou apel en Gouvernman responsab? Lepep i kontinyen demann kestyon, me ki nou'n gannye? Rediksyon, retar avek en ta leskiz.

Realite i fermal, mon rekonnet ki pandan sa bann desizyon ti pe ganny pran, det ti desann sorti 59.6poursan an 2024, pour ariv 55poursan lafen Zen 2025, lekonmi pe

grandi par 3.9poursan, me kestyon i reste touzour eski sa bann sif i reel pour pep Seselwa?

Zot ti rapel sa, “disiplin fiskal”, mwan mon apel sa “desizyon finansyel aveg”, aveg anver bezwen pep Seselwa, sourd lo leokri ordiner Seselwa.

Deputy Speaker ozordi nou aprouv sa Mosyon parske nou respekte Lalwa, me sa i bezwen vin en pwen tournan. Annou dir for e kler zanmen ankor sif pour pli enportan ki lavi dimoun. Anba sa Gouvernman *United Seychelles* sa ki sak Roupie pour vin en promes, en promes pour amelyor lavi Seselwa, pour konstrir lakaz, pour kree lanplwa, pour fer Seselwa vin e Sesel vin en pei kot prosperite pa zis en statistik, me en realite pour sak san bann fanmir Seselwa.

Zabitan Grand Anse Praslin i merit pli byen, Sesel i merit pli byen, ansanm nou pour fer li pli byen preski bon gouvrenans pa konsern liv kont, i konsern balans lavi e sa balans nou pour touzour lager pour li. Mersi Mr Speaker.

(APPLAUSE)

MR DEPUTY SPEAKER

Mersi Onorab Grandcourt. Okenn Manm ki’n eksprim son lentere pour koze *otherwise*

mon pour donn *Leader* Zafer Gouvernman pour fer son *reply*? Onorab Arissol.

HON SANDY ARISSOL

Mersi Mr Speaker. Bonzour ankor enn fwa e bonzour tou dimoun ki a lekout. Mon ti anvi plis Manm *US*, zot koze parske sa i zot Mosyon ki zot in vin avek, e nou annan Manm depi i vin antre dan Lasanble pa ankor dir nanryen, so mon ti anvi zot koze, zot dir en keksoz pour zot dimoun deor tann zot.

Ou konnen mon kontan parol ki Onorab Pointe Larue – Onorab Gabriel. Onorab Gabriel in dir en keksoz enportan, ‘letan i byen nou dir i byen, letan i mal, nou bezwen dir i mal’. Mon kontan sa parol ki Onorab Gabriel in dir me selman an menm tan sanmenm Onorab Gabriel in vini i pa’n rekonnet poudir in annan nanryen ki byen, ki’n pase dan nou pei, in koz zis lo sa *third lane* ki li i ankor pe mazine i ava arive mon swete anba son Gouvernman i ava gannyen sa *third lane* ki li pe rode. Me sa ki mon osi konsyan, anba Bidze *LDS* Onorab Gabriel sorti dan distrik Pointe Larue in ganny proze lakaz li ...

(APPLAUSE)

HON SANDY ARISSOL

...gannyen proze lakaz. Masiv proze lakaz in gannyen Pointe Larue e mon asire i ganny lalimyer, in ganny en pe *crash barriers*, in ganny en resirfas semen nef, koltare byen, e mon asire ki tou bann dimoun ki ti travay dan Gouvernman ki reste Pointe Larue, tou le mwan zot in ganny zot saler, bann ki'n kite in ganny zot gratwite zot in ganny zot tandservis, zot in ganny tou zot benefis parey tou bann travayer i devret gannyen.

Sa osi i form parti Bidze ki Gouvernman *LDS* ti pe zere, sa osi. Letan mon tann Onorab Larsen i vini i dir ek nou poudir zabitan Au Cap in ganny abandonnen pour plizyer lannen, e la granmersi li sa gran sover ki'n vini pour sov zabitan Au Cap. Me Onorab Larsen i bliye Mr Speaker anba Bidze *LDS*, dimoun Au Cap bann dimoun aze zot in fek en zoli renovasyon lo *Old People Home* e zot in retournen dan zot distrik ozordi.

(APPLAUSE)

HON SANDY ARISSOL

Onorab Larsen i bliye poudir letan nou pe koze la, i annan en *seawall* ki'n komanse ki pour protez nou lakot, ziska anba *Reef Hotel* pour ki Au Cap pa degrade. Tousala Bidze (*claps back of hand*) –

HON SANDY ARISSOL

En disiplin fiskal ki nou Gouvernman anmennen pour ki tou distrik i ganny enn pti keksoz dan sa Bidze ki nou, nou'n anmennen.

E pa bliye Mr Speaker letan nou, nou ti dan Gouvernman, nou ti pe koz lo Bidze distrik ou konnen lekel ki ti dir koup tou Bidze distrik, pa fer okenn Bidze? Sete Minis Wallace Cosgrow ozordi ki ti en Manm Lopozisyon sa letan.

E ler, nou, nou ti pe vot Bidze letan nou, nou ti pe propoz bann keksoz konkret lo kote *LDS*, ou konnen ki *US* ti fer sa bann letan zot? Zot ti *walk out* antre sorti pa konnen ki zot anvi, pa konnen kwa ki zot pour vote. Nou sa letan Mr Speaker e ou a rapel byen parske ou osi ou ti dan sa group *walkout* antre sorti, ou a rapel byen poudir nou sa letan nou, nou ti pe asire poudir pei i bouze. Ki mannyer nou ti fer pei bouze sa letan nou? Letan nou dan *LDS*, nou ti pe ankouraz tou dimoun pour leve pour al travay.

Letan mon tann onorab David vini dir poudir, *ah* plizyer dimoun Mont Buxton ti ava ganny en plas travay. Me onorab David i bliye poudir travay la, ou pa asiz anba laboutik Devin, kot pye mang e travay i sorti Victoria i pran en bis 3er i vin kot ou. Non!

Onorab David i bliye – i devret konnen poudir travay la, ler ou asiz lo glasi anler Mont Buxton, avan Greenwich, travay pa pran en pirat e i monte i vin kot ou e i dir ek ou ‘e i annan plas travay’. Si dimoun i anvi travay dan nou pei, menm anba zot Ladministrasyon zot pour ganny sa problemn.

Si Seselwa i anvi travay, fodre Seselwa i desann, i al rod en lanplwa parey tou dimoun ki dan lanplwa ozordi Mr Speaker. Zot desann e zot a ganny en lanplwa, lanplwa pa vin otomatik li. Nou Gouvernman i annan bann defayans, me selman sa ki enportan sa ki pli enportan ladan, se bann depans ki'n reste aköz nou pa'n kapab *recruit* nouvo dimoun. Sa larzan in retournen li, larzan pa'n ganny al en lot landrwa, oubyen pa'n ganny fer lezot keksoz avek, sa ki enportan pour nou koz lo la letan nou pe koz lo Bidze.

Letan nou dan Gouvernman LDS atraver nou Bidze ki nou, nou'n vote nou'n asiste plizyer dimoun Mr Speaker. Kot nou'n sey donn enn pti logmantasyon nou trwazyenm-az ler pei ti pe fer byen, kot nou'n donn logmantasyon nou bann travayer 7-10poursan, isi dan Lasanble Nasyonal.

Letan nou koman en Gouvernman nou'n vini nou'n asiste nou bann zanfan kot bann lekol avek en *breakfast* bomaten, letan nou'n sey partaz tou distrik, partaz tou proze pei refer renovasyon lo nou bann letablisman ki nou ti annan nouvo proze.

Letan mon tann zot dir napa nanryen ki'n arive be pa – Patrick Herminie koman Prezidan ozordi pa i fek al ouver en seri *condominium*, mon krwar 32 *unit*. Be sa pe laverti kwa sa? Be pa laverti travay ki LDS in fer avek en responsabilite finansyel serye kot okenn larzan pa'n perdi me in retourn lo bann proze pei Mr Speaker.

Konmsi nou bezwen realis parey Onorab Gabriel in dir. Ler i byen nou bezwen dir i byen nou bezwen dir i byen ler i mal nou ava dir i mal be selman pandan sa 5an oule dir mwan napa okenn proze ki'n arive okenn par dan okenn distrik? Napa nanryen ki LDS in fer pandan sa dernyen 5an? Me mwan Mr Speaker mon anvi ozordi la, felisit mon Gouvernman dirize par Wavel Ramkalawan pour travay, pour disiplin fiskal ki in annan dan nou pei ziska la.

(APPLAUSE)

HON SANDY ARISSOL

Nou bezwen, nou bezwen rekonnet sa. E ozordi sa ki *US* ti dir avek nou, zot, zot ti anvi en Gouvèrnman ouver tiyo, enn zot aktivis ti kriye ti dir “ouver tiyo nou abitye ganny en keksoz, nou pa gannye”. Nou nou'n vini, sa ki nou'n anvi fer e dimoun in pini nou pour sa, nou'n ankouraz dimoun pour leve, pour travay, ankouraz zot bann zanfan pour etidye byen lekòl, annan zot en bon rezilta, pour ki zot a kapab ganny en bon sètifika, pour zot kapab ganny en bon lanplwa, pour zot kapab ganny en reveni pour zot ed zot papa ek zot manman ozordi.

Se sa ki nou, nou'n krwar ladan dan *LDS* nou, nou, nou pa'n krwar ou asiz kot ou e lafen dimwan ler ou desann ou desann kot nimero 12 laba e ou ganny en lanvlop akòz ou ti byen vote, oubyen ou ti byen partaz papye. Nou, nou pa krwar ladan nou, nou, nou'n krwar dan sa disiplin fiskal ki zisteman Onorab Lemiel in fer resorti, e Onorab Lemiel in avoue poudir ki'n annan serten keksoz disiplin kot pei al byen e ozordi mwan mon kontan sa ki *US* in vin zwenn ozordi i pa nesèserman ki nou, nou ti vin zwenn an 2020.

Nou pa ti zwenn sa nou, an 2020 nou, nou'n sey triyange. Akòz? Pa bliye ti annan *COVID*, *COVID* nou'n

zwenn *COVID* e pandan 2an Gouvèrnman *LDS* in sey son mye pour nou akomod dimoun, repar pei, remet li lo en bon semen, e ozordi ler zot in vin zwenn nou Mr Speaker zot in zwenn Sesel avek en rezerv for.

E letan ou annan en rezerv ki for dan ou pei ki i vèdir? I vèdir ou larzan ou bann likidite etranzer Ero, Dolar, Liv Sterlen i stab. Sa i fer ki ozordi letan nou pe koze bann dimoun get byen ozordi, Dolar avek Ero i ankòr stab parske nou annan en rezerv ki solid e i stab. Ler ou Dolar avek Ero i ankòr stab parske nou annan en rezerv ki solid, e i stab. Ler ou Dolar i stab ki i fer? I fer ki pri lavi osi i stab, ler nou pour komans zwe dan nou rezerv sa i fer ki pri deviz i debalanse e ler pri deviz i debalanse otomatikman pri lavi i komans vin ser e sa nou pour bezwen komans aksepté.

Me ozordi ki nou'n war? Letan bann Bidze Siplemanter bann Manm pe dir i annan en pe i pa konnen lot i dir i pa pou dir nanryen lot pa apesye, lot i dir nou bezwen rekonnet e apesye, mwan mon'n dir mon rekonnet mon apesye.

Be letan nou pe koz lo lanplwa mon'n tann Onorab Larsen dir, “*for the many not the few*” be zisteman ozordi ler nou pe koze la Mr Speaker, avek nou *PNQ* ki ou pa'n pran

- ki nou'n mete dan rikord kontrè Mr Speaker ou pa'n pran nou PNQ en! - Premye PNQ pa'n ganny aksepté.

E letan nou pe koze ozordi, an relasyon avek zisteman lanplwa ki mon'n tann Onorab David koz lo la, Onorab Larsen in koz lo la, *for the many not the few*. Be ler nou get bann lapwentman ki'n arive ozordi la. Eski Bidze pe fer provizyon pour sa par egzanp? Ler mon get zis kot *State House*, annou get zis lakantite SS ki annan. Eski Bidze Siplemanter pe fer provizyon pour sa?

Ler zot ti asiz sa kote latab zot ti sant en sanson larzan palto, larzan palto, larzan palto, larzan palto, larzan palto ! Zot ti dir ek Lepep Seselwa ler zot vin o pouvwar larzan palto pou ganny aboli. Larzan palto, larzan linet, larzan seve, zot ki ti dir sa lalis, larzan ledan, larzan sepa kisisa. Ozordi sa Manm ki ti koz lo larzan palto pli zoli garson dan palto an Angola...

(laughter)

HON SANDY ARISSOL

...pe rod tou zoli portre pour li tire avek tou Prezidan Larepublik dan lemonn. Be ki'n arive ek larzan palto be Bidze Siplemanter pe fer provizyon pour larzan palto?

Ozordi Mr Speaker larzan palto anba Gouvernman Patrick Herminie in double, triple! Zis annou konte, zis annou konte konbyen Minis zot annan; 14 Minis, annou get zis bann SS ozordi Mr Speaker, SS zis *State House* zot annan zot 7 SS, ozordi SS mon krwar zot pe ganny R70mil an montan. En! Zot a dir mwan si mon mal zot a koriz mwan. Ler nou kalkil zot *ok*, zot sekretarya, sekreter, drayver, zot larzan palto, zot larzan ledan, zot larzan linet, letan nou pe kalkil 7 zot par 77mil i tonm zot 539mil par mwan, par mwan, eski Bidze Siplemanter pe fer provizyon?

Ler ou fer li par 1an - zis SS sa en pa met Minis ansanm i tonm R6.4milyon par an. Eski larzan palto in desann, in regrese, in gonfle in ganny aboli? Non! Eski Bidze Siplemanter pe fer provizyon pour larzan palto, larzan SS, ek tou bann lapwentman ki zot in fer ozordi?

Bann *advisor* la ki zot in mete, mon kontan zot in met apwentman bann *advisor* Patrick Herminie koman Prezidan anmas tou son zanfan parey zisteman Onorab Gabriel in dir, "kontan tou nou zanfan," in anmas tou son zanfan".

Eski i mal in anmas tou son zanfan? Eski i mal sa bann Seselwa pe ganny en

saler? Non Mr Speaker ou konnen kote i mal, sa bann pozisyon pa'n ganny *advertise*. Sa bann pozisyon pa'n ganny fer piblik pour ki lezot siporter *US* ki'n siport zot ti a kapab *apply*, ti a kapab ganny sa pozisyon. Olye ris zot dalon, ris zot fanmir, ris sa enn ki mon pa ava dir, ris sa lot ki mon pa mansyonnen, met sa enn o bor zot, zis pour ganny saler, zis pour ganny alawenns, zis pour ganny larzan linet zis pour ganny larzan ledan zis pour ganny larzan palto. *For the few for the many* sa oubyen *for the many for the few*? Ki mannyer in vini la sey dir mwan?

(laughter)

HON SANDY ARISSOL

I enportan pour nou konnen sa, eski Bidze Siplemanter pe fer provizyon? Mon dezyenm Bidze Siplemanter, eski Bidze Siplemanter pe fer provizyon pour sa logmantasyon ki nou'n donn bann dimoun aze? R800 tou le mwan, mon *happy*, tou bann dimoun aze zot pe ganny en logmantasyon e zot pe eksite pour ganny zot logmantasyon me Gouvernman i bezwen vini dir avek nou kote zot pour ganny sa larzan pour donn logmantasyon nou bann dimoun aze? Eski sa logmantasyon i pour zis pour

en mwan pour fer bann dimoun aze kontan? Eski i pour tou le 6 mwan? Eski i pour tou le 1an? I enportan pour nou konnen.

Bann dimoun aze la i pour enportan pour zot konnen. La bann ki pour ganny – ki'n fini ariv 65an ti pe esper 65an in ganny 63an e Zanvye i sipoze *clock* son kart. Kote i ale pour fer son lanrezistremant pour li fer konnen pour li ganny son sekirite – son larzan e pour li ganny son logmantasyon?

Konbyen pour ariv nou par mwan? Konbyen pour ariv nou par an? Kote nou gannyen sa larzan? Sa osi i enportan, pour Lepep Seselwa konnen pour bann *taxpayers*, bann biznes konnen Mr Speaker.

Me letan nou'n get pansyoner ki mon dakor, i annan en lot group dimoun ki travay ek pansyoner. Son *carer* ki travay avek li eski la otomatikman sa pansyoner i get plis ki son *carer*? Ki arive avek bann *carer* letan nou pe koze? Eski group *carer* kan zot pour ganny en logmantasyon? Parey nou ler nou'n la nou'n organiz zot e ozordi nou'n asire ki nou bann *carer* zot kapab ganny en *loan* atraver labank ozordi. Be eski *US* in kit sa group *carer* ater?

Eski Bidze Siplemanter pe fer provizyon pour sa group *carer*? Me si *US* in war delwil,

mon pe swete ki lannen prosen dan Bidze sa group *carers* zot osi zot ganny en keksoz zisteman pour ankouraz li pour travay avek sa trwazyenm-az.

Mon ti a kontan sa i arive, parske dan tou distrik ki bann Manm ki'n koze i annan bann *carers* e zot en group spesyal parske en group ki ti ganny kree alors en zour pour en rezon politik, apre zot in ganny kit ater gran mersi nou *LDS* nou'n vini, nou'n sey organiz zot pour asire ki zot osi zot kapab ganny en keksoz.

Trwazyenm e mon dernyen pwen final an relasyon avek Bidze Siplemanter. Mr Speaker eski Bidze Siplemanter in fer provizyon pour sa *trip* ki Prezidan in fer la avek Vis-Prezidan Assumption? Konbyen in koute sa *trip* la? Ler zot ti asiz la, ler zot ti asiz la, zot ti dir enn pti 3milyon, la mon'n aprann ariv 5.7milyon, 5.7milyon zis sa pti bouze la. Konbyen avyon zot al avek?

(*comments off-mic*)

HON SANDY ARISSOL

Lekel ki ti dan zot delegasyon? Tousala i enportan pour nou konnen mon bann zanmi. Bidze Siplemanter pe fer provizyon la?

5.7milyon – konmsi Onorab Uranie zis enn pti

5.7milyon la in depanse. Kwa ki nou'n gannyen? Prezan sa ki enteresan lo Assumption, sa ki dimoun pe espere ti annan *stop notice*, sa bann etranze pour arete servi nou later zot ava al kot zot, nou zil pa pour vann.

La i ava enportan pour nou konnen la, ki negosyasyon arive laba, ler zot in monte apre zot in desann trankil ni *interview* pa'n donner la, ki'n arive la? Mon aprann i annan en *villa* spesyal ki'n ganny enkli dan proze, pour ki sa villa spesyal, zot ti dir Prezidan Ramkalawan ti al *Maldives*, ti al war 2 frer ti *shake hands* avek zot, la ki'n arive la? Lanvlop pe sanz lanmen. I annan koze la, la deor poudir sa proze pour kontinyen, pa sa ki zot ti dir zot bann siporter ki ti desann la ki zot ti mobilize le 14, le 15 pour desann le 16, pa sa ki zot ti dir, “proze pour arete, sa bann dimoun a rann nou, nou zil, e Baz Militer Endyen pour fer”.

Eski Bidze Siplemanter pe fer provizyon la pour sa 5.7milyon la, mon pe demande la eski i annan oubyen nou pe ganny dir pour lannen prosen? Lo sa pwen la mon aprann la poudir i annan en *villa* la, *Eden Island*, mon a donn zot nimeron la enn pti kou la, 106 – *villa* 106. Mon aprann, dan Bidze Siplemanter mon ti a

kontan demande eski Prezidan Larepiblik Mr Patrick Herminie, in arete reste Mont Buxton e i pe reste *Eden Island* parske travayer pe *text* nou, zot war li rantre aswar granmaten i sorti. I ava enportan pour nou konnen Mr Speaker.

Eski sa i en depans an plis ki pei pour bezwen *cater*? Lekel ki pour peye son *villa Eden Island*? Eski bann dimoun aze. Ti annan en madanm La Digue ti dir, “*arh la mwan mon annan 68an, zot ti promet mwan R10mil zot pa'n donn mwan, mon bezwen al carer ek mon manman pour mwan ganny en lot pti keksoz*”. Eski sa madanm ki *carer* la ki pa'n ganny nanryen la, eski li ki pour al pey sa *villa* numero 106 *Eden Island*? Tousala i enportan, pour nou konnen.

Parske zot, zot anbet Lepep Seselwa e ozordi zot in war zot dan Gouvernman ki fantastik e Onorab Gabriel in dir la pa pour tir zot kot zot ete, mannyer zot pe ale la si zot byen ariv 2an edmi zot byen arive *ok*? Ler mon pe get zot la mannyer zot pe ale, napa standar, napa standar, parske Gouvernman pa stab, Gouvernman pa tro konnen ki i anvi fer. Nou'n asize preski 1 semenn, napa nanryen lo *Order Paper*, la nou ganny dir kekfwa *Bills Committee* ava

zwenn e nou, nou pe esper Gouvernman pour nou fer en travay.

Annou get *UAE*, *UAE* napa standar, Prezidan i vini dan en palto, napa kravats, enn son Minis semiz an deor lanmans long tou debraye, son lot Minis byen kravate *gentleman* pe reprezant Sesel. Doub standar, i annan i vini toultan son kannson i mank 25sou, doub standar.

Nou bezwen kit Sesel lo sa letap kot *LDS* in kite mon bann zanmi, annou anmenn pei byen parey Onorab Lemiel in dir, avek rezerv ki nou'n donn zot, avek disiplin fiskal e pour nou depans larzan Lepep Seselwa byen.

Nou pa kapab al pey *villa* numero 106, nou pa kapab pey tou sa bann dimoun ki zot in rise gos, drwat ki plas travay pa'n ganny *advertise*, e bann aktivis *US* i ankoler e ler zot ankoler laba lo rezo sosyal zot ganny dir, “*ahhh, trust the process, les li travay!*”. Se sa ki zot ti ganny eleksyon lo la zot? Se sa?

Mr Speaker, mwan mon ankor en fwa mon dir parey Onorab Lemiel in dir, nou bezwen depans larzan piblik avek soutenabilite, avek responsabilite, sa ki nou, nou'n krwar ladan koman *LDS*.

Alors zot, zot in vini zot in promet tou sa bann keksoz

Lepep Seselwa e mwan mon *happy* avek tousala, mwan mon sel problem mon demande eski nou pour kapab soutenir tou sa bann depans? Nou pour ganny larzan pour nou kapab fer sa? As *long* ki nou kapab ganny eksplike pour bann dimoun ki'n vot pour zot, ava war poudir vre parey Onorab Conrad Gabriel in dir zot pour la pour leternite *vitam aeternam* e person pa pou tir zot parske zot, zot konn zis ouver tiyo, ouver tiyo.

Me nou pa pe ankouraz dimoun pour travay pour met larzan dan fon pour ki nou kapab soutenir pei e nou swete la, dan sa 100 zou sa rezerv ki nou'n donn zot i reste stab, dan sa 100 zour, Ero, Dolar i reste stab e dan sa 100 zour pri lavi i reste stab.

E nou swete ki dan sa 100 zour zot a kapab annan standar zot ava konpran ki zot anvi fer pour nou pei, e zot a kapab eksplik Lepep Seselwa ki arive Assumption? Proze pour kontinyen pa pour kontinyen? Lotel pour fer pa pour fer? Tasyon mon war zot pe al koup riban lotel, tasyon mon war zot pe al dan louvertir lotel, pe pran avyon pe ale dan louvertir lotel. Sa osi nou pour get zot, lepep Seselwa osi pour get zot lo la sa, parske la in vin 2 keksoz dir arete, la apre zot ale, ni en *interview* zot pa donner aköz zot anvi siport

proze avek lezot keksoz ki pe vin avek ki zot pa pe dir nou. I enportan zot dir nou tou laverite Mr Speaker.

Alor mon a les zot Mosyon, nou ava ekoute ki lezot Manm, i annan bann Manm nou pa ankor tann ditou Mr Speaker, mon krwar i en - i en keksoz dan *Standing Orders* osi nou bezwen amande sa.

Ler ou vin Manm Lasanble Nasyonal ou pa kapab zis asize pa dir nanryen, ou bezwen dir en keksoz kantmenm *good morning* dir *ok*. I ava enportan pour nou kapab swiv e gete mannyer keksoz i ale. Mersi bokou Mr Speaker.

(APPLAUSE)

MR DEPUTY SPEAKER

Nou a dir mersi Onorab Arissol, Sandy Arissol. Bon nou pour pran e poz nou ava retournen ller.

(BREAK)

MR DEPUTY SPEAKER

Bon, avan nou repran deba lo Mosyon Bidze Siplemanter. Mon le zis gid Manm lo *Order 59*, kot i koncern *Content of Speeches*. I annan detrwa repriz ki non Prezidan in ganny servi, e 59(5) i fer resorti ki *Conduct of the President itself*, i kapab ganny diskite

dan sa Lasanble, eksepte letan nou annan en Mosyon. So, annou reste nou anliny avek nou *Standing Orders*.

Dezyenmman, i lo size travay Lasanble ki'n ganny fer resorti anvi ki volim travay pandan sa komansman Lasanble mon kapab dir, e si mon memwar i bon in sak fwa i annan en sanzman en Gouvernman Oktob 2020, ti preski parey Oktob, apre Novanm.

Byensir, sak Gouvernman letan i vini i pou annan son azanda ki pou sanze, e byensir i pou annan serten pti retar mon kapab dir dan *Calendar of Lezislatif* kot Gouvernman i kapab soumet son bann sanzman ki le fer regilasyon, *Bill* tou sa.

So, nou pran kont sa. Me Lasanble i pou touzour annan travay pou li fer. So, avek sa i zis en pwen ki mon le re fer sorti, e pour Manm piblik osi konpran.

Avek sa nou pou retourn lo deba ki la devan nou. Mon pou donn laparol Onorab Sopha, ou ti annan en pe lentansyon pou koze? Wi.

HON GERRY SOPHA

Mersi Mr Speaker. Bonzour Mr Speaker. Bonzour bann koleg Onorab. Bonzour tou dimoun ki a lekout. Mr Speaker, avan mon al lo mon pwen konsernan sa Bidze

Siplemanter, mon ti ava annan serten remark petet ki mon ti a kontan pase.

Si ozordi Mr Speaker, *Unites Seychelles* i dan ladministrasyon se aköz *United Seychelles* in montre Lepep Seselwa i pe travay pou Lepep Seselwa. E dan dernyen eleksyon Seselwa in pran en desizyon.

Seselwa in deside met *LDS* dan lopozisyon kot zot ti ete, aköz avek sa mazorite absolli ki zot ti annan dan 7enm Lasanble zot ti dan ladministrasyon, zot pa'n delivre pou reflekte lo lavi Lepep Seselwa.

E Seselwa in pran en desizyon in met zot kot zot ti devret ete dan lopozisyon ki mon krwar parey en Onorab, in koze avan mwan zot pou bezwen reste laba menm.

Mr Speaker, mon'n ekout bann Onorab, ki'n fer zot lentervansyon, e zot in koz lo plizyer size. Lot kote latab Onorab Arissol, in sorti lo lozik Mosyon son lentervansyon in plito al personnel ouswa ranpli ek larogans, sanmenm dimoun Au Cap ti swazir en lot dimoun pou met reprezant zot.

Onorab Arissol, in fer sorti en pwen Mr Speaker. I dir "*LDS* in kit en rezerv solid." Fodre nou realize Mr Speaker, nenport ki ladministrasyon ki ganny lofis pou administre sa

pei i pa pe rann faver, i en lobligasyon.

Kantmenm en lot ladministrasyon ki ti pou la, ti pou bezwen diriz pei dan en direksyon kot rezerv ti pou bezwen solid.

Me menm rezerv in solid zot pe sant laglwar, i annan en kestyon Mr Speaker, bomaten mon le met avek Lepep Seselwa. Eski zot in amelyor lavi Seselwa avek sa rezerv solid ki zot pe sant laglwar? Akoz sa ti enn zot lobzekatif se nou pe vin amelyor lavi Seselwa, nou pe vin met larzan dan zot pos.

Alors si ou pe dir rezerv i solid, ki ou pou fer ek sa rezerv ler ou annan en pep pour ou kapab amelyor zot lavi? Sa kestyon mon poz la pour Onorab Arissol, reflesir lo la.

Onorab Arissol, in osi dir Mr Speaker, ki “*United Seychelles* in anbet dimoun pou vin o pouvwar.” Si nou ava retourn par deryer, nou regard lo sa mo anbete. Lekel ki'n vreman anbet dimoun depi 2020 pour zot ariv o pouvwar?

E ler Seselwa in war pandan 2020 ziska 2025 ki zot in ganny anbete Seselwa in pran en lot desizyon, e sa pou met zot ater. In osi koz lo *carer*. Eski aprezan ki zot konnen *carer* i egziste? Zot bliye poudir zot Prezidan, Prezidan sortan Prezidan Ramkalawan i dir, si nou kapab *run* pei avek *carer*.

Ozordi nou tann Onorab Arissol, ki vin dir nou, i pe le koz lo *carer*. Mr Speaker, mwan mon pa pou al dan tou sa detay ki Onorab Arissol, in koz lo la akoz i pa pou anmenn mon okenn par.

Me ki mon'n fer? Mon'n fer sorti enn de pwen enportan pour Lepep Seselwa vwar poudir Onorab Arissol, in dir bokou, me selman i pa vedir nanryen.

Mr Speaker, mon pou koz en kou lo sa zafer Bidze Siplemanter. En size ki mon po adrese, se sa zafer *Beach Soccer* ki mon pa'n tann koz preski ditou lo la bomaten.

Sa zafer *Beach Soccer* in annan en kantite *misleading*. *Beach Soccer* Sesel ti *host* an 2025, me Sesel ti konnen depi 2021, nou ti pou host sa *World Beach Soccer Tournament*.

Tou sa lannen Ladministrasyon LDS pa'n fer nanryen, nek an 2025 ki pe komans preparasyon pou fer en tel zwe. Sa i en manifestasyon enternasyonal ki annan bokou presiz. E letan zot in war zot pa pe kapab zot in taye, zot in al rod partou kote pou fer sa vin en realite akoz nou ti dan en letan eleksyon.

Mr Speaker, nou tou nou konnen poudir SS Payet, ti fer sorti ki ti ganny dir ki, Federasyon Foutbol pou *raise* en larzan.

Ki mannyer Federasyon Foutbol i kapab *raise* larzan pou *Beach Soccer Tournament*, kan zot ti deza annan en komite ki ti'n ganny kree?

Son *CEO* ti en Sidafriken Mr Chetty ki ti *Chairman* Federasyon Foutbol ti *Chairman* sa Komite, epi ti annan lezot dimoun ki ti dan Gouvènmman.

Ki nou ti war apre sa? *Blame game* ti komans annan, Prezidan ti akiz – Prezidan sortan ti akiz Mr Chetty me Federasyon Foutbol i en manm *FIFA* li, pa Leta, Leta ti la pour li donn bann lozistik, me non pa Federasyon Foutbol.

Alors Mr Speaker i montre nou poudir sa zafer *beach soccer* la, in annan en *misleading* kot Seselwa pa'n ganny bon lenformasyon. I annan en bout enportan ki tou Mr Speaker, i annan sa zafer kot ti bezwen met sa *stadium* lo en later me Gouvènmman in pran linisyativ in met sa *Beach Soccer Arena* lo en teren san demann lotorizasyon avek Federasyon Foutbol ki'n *lease* sa teren pour 30an.

E li in komans en negosyasyon avek *Etihad* pour donn *naming rights* san konsiltasyon avek Federasyon Foutbol e vwala kot keksoz in ganny mal dirize, in ganny \$3milyon e 2milyon pa ti ankor donnen Mr Speaker.

Si Federasyon Foutbol in *lease* sa bout teren pour 30an Federasyon Foutbol ti merit osi dan sa demars e li osi i ti bezwen pe benefisye avek sa larzan ki Gouvènmman ti pe gannnen parske si li i propriyeter sa teren ki'n *lease*, byensir Federasyon Foutbol i erit tou sa lenfrastruktir ki lo sa teren legalman.

I paret ki ladministrasyon sortan in zwe avek sa zafer *Beach Soccer Tournament*, zis aköz i ti dan peryod eleksyon e sa in ganny *micromanage* pour ganny *political mileage*.

Mr Speaker a mon avi letan mon pe get sityasyon ladministrasyon dirize par Prezidan Herminie, in vin avek en lapros kot i pe vin fer sir i amelyor lavi Seselwa ki'n ganny neglize pandan sa 5an.

Alors si nou bezwen vin prezant sa Bidze Siplemanter e diskite lo la, nou bezwen fer sir ki nou diskite lo la avek tou son bann defayans ki in annan. Fodre pa nou bliye, ki i pour annan Bidze Siplemanter ankor ki pour vini devan Lasanble. Pa bezwen demann kekyon kote pour ganny larzan pour pey sa bann nouvo PSs, ek lezot zofisye ki ladministrasyon Prezidan Herminie in deside *bring* zot *on board* pour fer delivre servis pour sa nasyon e pou fer sa pei bouz devan.

Mr Speaker an konklizyon mon annan sa pour mwan dir. Pep Seselwa laba deor nou pa kapab ekout tou sord kalite keksoz konmsi nou dan teat, isi anndan Mr Speaker nou vin fer biznes pour fer sa pei marse e pep Seselwa nou war nou lavi amelyore. Parey Onorab Georges ki ozordi i *Leader* Lopoziyon in deza prononse ki wi – atraver ou Mr Speaker mon dir – wi nou bezwen aksepte pandan sa 43an zot amelyor lavi en kantite Seselwa e sa Mr Speaker i enkli lavi mon bann frer ek ser Onorab ki lot kote latab.

Alors Ladministrasyon Prezidan Herminie se sa ki pe vin fer pour amelyor lavi tou Seselwa. Mon remerci ou Mr Speaker.

(APPLAUSE)

MR DEPUTY SPEAKER

Mersi Onorab Sopha. Mon a donn laparol Onorab Wavel Woodcock.

HON WAVEL WOODCOCK

Mersi Mr Speaker. Mr Speaker i kler ozordi bomaten ki *United Seychelles US* pe sey fer zot mye pour zot efas sa bon travay ki Ladministrasyon *LDS* in fer pandan sa dernyen 5an. I enportan note Mr Speaker, e fodre pa ki nou bliye kot nou sorti, kot nou pei ti ete 5an

pase e kote nou'n arive ozordi koman en pei.

Se gras a bon zesyon nou lekonomi, par bon zesyon nou ekonomi par en Ladministrasyon *LDS* sa dernyen 5an, ki nou pei in ariv kot i ete ozordi. Nou pei ti lo son zenou e 5an pli tar nou lekonomi pe fer vremen, vremen byen e Minis Finans menm in admet poudir ekonomikman nou pei pe fer vremen byen.

2020 nou ti dan en kriz, en kriz lasante, en kriz ekonomik, fodre pa zanmen bliye e annou pa sey fer krwar avek sa pep ki ler nou ladministrasyon ti pran sa pei tou keksoz ti *ok*, nou ti dan en gro problem, nou ti dan en fernwanr Mr Speaker.

E erport ti'n fermen, lotel ti vid, biznes ti ater, *arrival* ti selman 114mil touris an 2020 e sa lannen Mr Speaker nou pour kas rikord. Si tou keksoz i al byen, dapre prozeksyon nou pour kas rikord 2019 e nou pe war poudir i annan bokou plis vol pe vin Sesel pandan sa dernyen 5an.

An 2020 Mr Speaker nou ti dan *deficit*, *public debt-to-GDP ratio* an 2020 ti 85.8poursan dapre *IMF*. E dapre *mid-year review* nou *debt-to-GDP ratio* i 55poursan sa lannen ki en gran rediksyon konpare avek ler nou ti pran sa pei an 2020.

Lenflasyon ti pe pet plafon, lenflasyon ti pe pet plafon e Dolar ti'n ariv plis ki R20 - zot rapel? Nou ti pe manz dan nou rezerv e Mr Speaker *figures* pa koz manti, statistik pa koz manti. Mon pa konnen ki *Mid-Year Economic and Fiscal Outlook* zot in lir lot kote latab ouswa ki Bidze Siplemanter ki zot pe lir akòz si ou pour get statistik i montre ki nou lekonomi in fer vremen byen anba Ladministrasyon LDS.

Ler nou get nou *Economic Fiscal Outlook* pandan sa dernyen 6 mwan 2025, i kler ki Sesel pe fer vremen byen. Lekonomi Sesel in fer vremen byen anba en Ladministrasyon LDS. *GDP growth* Sesel i 3.9poursan pli o ki *World GDP growth* ki 2.9poursan, lenflasyon i 0.3poursan.

Premye 6 mwan nou'n war logmantasyon dan koleksyon *Value Added Tax*, en logmantasyon R500milyon dan premye 6 mwan.

Eski nou pa pe fer byen nou pe kolekte plis *tax*, plis reveni ki pour ganny servi pour depanse pour fer bann proze? Pou amelyor lavi nou sitwayen, met larzan dan plis proze lenfrastruktir, lakaz tout sa.

In annan bon zesyon nou lekonomi, larzan ti ganny depanse byen anba

Ladministrasyon LDS e an mezir ki nou lekonomi in progrese, bann benefis in ganny pase lo nou pep, nou'n war logmantasyon 17poursan saler dan sekter piblik, dan zis 3an sirtou apre ki nou'n fer fas avek en sityasyon ekonomik.

Nou'n war *increase* dan plizyer bann lasistans sosyal ki ganny donnen e nou'n war bokou larzan in ganny depanse dan bann lenfrastruktir enportan pour nou pei Sesel.

Bokou bann proze enportan in ganny fer, e zisteman Mr Speaker sa *weekend* pase in annan bokou bann vizit ki bann Minis in fer lo Praslin e depi ki nouvo ladministrasyon in antre bann Minis in pas partou pour al get bann diferan lofis, bann diferan proze.

E *statement* ki preski tou bann Minis in fer Mr Speaker dan *interview* ki zot in donnen, se ki zot satisfè avek leta bann Minister e zot pour kontinyen avek bann proze, bann proze ki'n komanse. Zisteman nou ti annan Minis Desaubin Praslin nou'n al vizit ansanm avek bann lezot koleg Onorab lo Praslin, nou'n vizit plizyer bann fasilite e i annan *statement* ki'n ganny fer par bann Minis ki zot pour kontinyen sa bann proze ki'n komanse anba Ladministrasyon LDS.

Yet i annan zot ki pe dir poudir nou Gouvernman pa'n fer nanryen, kan zot Minis menm pe admet ki kantite bon travay ki'n ganny fer anba Ladministrasyon LDS.

Bokou renovasyon in ganny fer lo bann fasilite ki ti dan bann move leta, kantite fasilite sport Roche Caiman nou konn byen Onorab Gabriel ou'n al vizit avek mwan, ou ti war son leta manner ti ete avan e son leta ozordi, nou bezwen admet.

Ozordi zot pe koz kont *FIFA Beach Soccer World Cup*, selman ler *match* ti pe ganny zwe Sesel ti pe zwe, be pa msye Herminie - Prezidan Herminie pa ti la pe selebre li osi ansanm avek VP, pe sot anler byen *enjoy* en! Si zot pa ti dakor zot pa ti a vini. Zot ti la dan stad ansanm pe selebre avek Lepep Seselwa, la ozordi zot vin koz kont sa zis pour vin fer bann politik bon marse.

Msye Herminie ozordi mon rapel pandan letan COVID mon krwar pour 2an, 3an 4an nou'n tann bann MNA US Leader Lopozisyon ki VP ozordi ti dir, “pa fer proze kapital” Msye Herminie menm ti dir, “pa fer proze kapital annou pran larzan annou donn Lepep Seselwa”. Selman ozordi li ki pe koup riban bann proze ki'n konmanse anba Ladministrasyon LDS ki fek fini la li ki pe koup riban.

Ler nou ti koup riban zot ti konplent la i fek koup riban en proze *condominium 32-unit* e i koze konmsi li – zot ladministrasyon ki'n fer sa proze. Be sa i ipokrizi dan tou son lanpler, zot ti dir “pa fer Proze Kapital”, si nou ti'n ekout zot Mr Speaker en kantite proze ki ozordi sa ladministrasyon pe servi en kantite proze ki ozordi pe benefisye Lepep Seselwa nou ti napa ozordi, Onorab Grandcourt i vini i dir koumsa napa nanryen Praslin, nanryen pa'n ganny fer Praslin.

Annou get Zil Pros, Praslin La Digue pandan sa dernyen 5an, zis Praslin li menm - nou a komans premye, avek proze *Ero Passenger Terminal*, ki dayer in ganny apele apre son gran papa, ek son papa Mr Luc Grandcourt, ki pour bokou lannen Lepep Pralinwa pe espere, in ganny fer, i pe benefisye. Ler i mont lo *Cat Cocos* pour al sers parsel pour DHL Mr Speaker, be pa i war sa fasilite ki in ganny fer, i bezwen war Mr Speaker.

En kantite proze ki *for so many years (VTS) Vehicle Testing Station*, proze lapes bazar *ice plant, gear store*, nou fek ansanm nou al fer en vizit Amitié kot sa proze sa vilaz pe al ganny fer artizanal nou ti – i ti pe koz sa zoli soley kouse, pe

dir Minis sa proze pour fantastik la i pour siport sa proze, i pour donn son *full* siport, fodre kontinyen aköz trwazyenm, nou trwazyenm konsep plan in fini pare, in fini drafte zis pour komanse.

Sant Mikroenterpriz nou'n ale, en pour 15 *unit* pour bann *small, micro and medium enterprise*, proze in komanse pe kontinyen. Be i pour la pour koup riban li, selman i dir napa proze. Napa proze Praslin? Proze lakaz, Amitié ariv en zoli oter ozordi, proze *coastal management* ti la ler nou pe diskite i konnen poudir ti annan alokasyon bidzeter sa lannen in ganny koupe, aköz proze in ganny anmennen pour komanse lannen prosen. Tou sa bann proze in finalize, i annan ki'n komanse e i pour konplete. La ozordi i vin dir napa nanryen, nanryen, nanryen Praslin ki'n ganny fer.

Be Mr Speaker, konmsi i montre ou enn ler sa bann kalite ipokrizi, nou'n al Ile Eve, Ile Eve sa kantite proze lenfrastriktir ki'n ganny fer semen partou, 15 morso later fek al lo *tender*, kot nou ti donn 25 la 15 al lo *tender* Minis in met *on hold* pour li gete avan ler i large, nou annan ankör en dizenn pe vini ankör aköz bann lenfrastriktir ki nou met an plas Ile Eve aköz nou'n anpes sa bann spekilasyon later ki ti pe

ganny deroule laba kot sa ki ti pe ganny later pour 40mil apre ti pe revann pour milyon, bann lord ki'n ganny mete. In annan en kantite promes 100 zour ki'n ganny fer, ki pa pe ganny onore e i annan bokou lenkyetid lo lafason ki Gouvernman anba US pe ganny zere.

E Bidze Siplemanter ki nou pe gete ozordi i fer nou demann en kantite kestyön Mr Speaker, parey Onorab Sandy Arissol in dir, zot ti pe koz, zot ti koz gro labous, zot pour koup larzan palto, zot pour koup -larzan palto se li menm li *clothing allowance*, ki tou Manm Lasanble osi i gannyen ki tou Minis i gannyen, zot pour koup *clothing allowance* bann Minis.

Be ler mon get dan Bidze Siplemanter, mon'n rode dan Bidze Siplemanter mwan Mr Speaker mon pa war okenn landrwa kot *clothing allowance, allowance* palto, in ganny koupe.

Sesel Vis-Prezidan avek Prezidan zot met lenz *Chairman Mao* zot met lenz *Kim Jong Un*, me selman ler zot al aletranze Mr Speaker zot met sa pli zoli palto pli ser, pli *chic* ki annan, napa problem - Sesel zot met lenz *Chairman Mao* sa i montre sa bann kalite ipokrizi.

Kote zot in koupe sa *clothing allowances*? Dayer Mr

Speaker sa *clothing allowances* pour bann Minis i R270mil pour 13 Minis, R270mil ki zot in koz sitan bon labous lo la. VP mon rapel Mr Pillay, ler i ti *LOTO* i ti dir, ki sa larzan palto pour ganny servi pour *top up* larzan pansyon. R270mil pour *top up* larzan pansyon?

Ou war poudir ki mannyer zot ti pe sey bat latet sa pep? Ki mannyer ou kapab servi R270mil pour *top up* larzan pansyon? Zot ti dir zot pour donn R10mil koman zot antre zot pour donn R10mil pansyoner. La enn pti kou *triple lock*, pour donn selman 800, e sepa si pour arive sa R10mil parey zot in dir, zis bann promes dan vid.

Ler nou, nou apwent 13 Minis zot ti sot anler, tro bokou Minis, manman en bann lafanfar dan Lasanble. La zot in apwent 14 Minis ki fer plis larzan palto ankor, plis larzan ledan ankor e pa bliye Mr Speaker saler en Minis pour en lannen i environ R800mil Mr Speaker. R800mil pres 3 fwa plis ki sa larzan palto ki zot ti pe koz lo la pour sa dernyen 5an.

R800mil pour en 14enm Minis son saler par lannen, *plus* son sekretarya, drayver, transpor, sekirite, *allowances* e lezot ankor. Nou pe koz nou en kou adisyonnèl plis ki R5milyon anplis Mr Speaker,

pour sa 14enm Minis. Zot pa koz lo la.

Mon rapel Mr De Commarmond Mr Speaker dan Lasanble ler i ti dir, ler i ti *LGB* sa letan, bann letan, bann letan Prezidan Faure, ki *US* - i ti dir - nou kapab get lo verbatim - *MNA LGB* sa letan Mr De Commarmond ti dir ki '*US* i annan en *top heavy government* e fodre koupe, fodre *streamline*, tro bokou sef i ti dir.

Me mon pa konnen kantite dimoun ki Prezidan ti'n promet Minis, Prezidan i annan zis 14 Minis alor Prezidan i bezwen - i pa kapab donn pozisyon Minis, prezan nou ava donn pozisyon *advisors*, nou a donn pozisyon *SS* e ou kapab krwar ozordi Sesel 9 *special advisors*, 9 *special advisors*, rikord Sesel ! Ki mon prezimen sakenn pe ganny environ R60 - R70mil, menm saler ek Minis, 8 *Secretary of State*, 8 *Secretary of State*, (*SS*) ankor ki mon pe prezimen zot dan zot, zot pe ganny zot R70mil e anba Ladministrasyon *LDS* i annan selman 2 *SS*. 2 *SS* pour vin 6 *SS*. Zot pe fer faver lekel Mr Speaker? Zot pe fer faver lekel? Sa en kestyon mon zis poz la, la. 36 *PS*, 36 *PS* Mr Speaker, 11 *PS* an plis ki ladministrasyon avan.

Kote? Kote larzan pour ganny tire pour pey tou sa

bann PS, tou sa bann SS, tou sa bann *advisors*? Kantite i pour kout, i pour kout nou pei Mr Speaker pour fer faver sa bann dimoun?

Kot pour tire larzan pour tou sa bann pozisyon? Vre ozordi Gouvernman *in top heavy*, pozisyon pe ganny donnen *left right and center* zis avek bann siporter *United Seychelles*, bann ansyen *MNA* aktivis, zanfan *former president*, *nepotism*, zanfan entel, dalon, galan zis pour fer zot kontan pangar demen zot mont lo *Facebook* zot kritike aköz bann ki mont lo *Facebook* in kritike zot in ganny apele *State House*, zot in ganny pozisyon.

Bokou nou bann frer ek ser pe ganny viktimize, pe ganny met deor ozordi, nou bann frer ek ser kalifye viktimizasyon in retournen Sesel dan tou son splander zot pe koz lo anmenn Lalwa Ek nou pa ek nou, be premye dimoun ki merit ganny zize se Prezidan Herminie aköz nou pe war “ek nou pa ek nou.”

Bokou nou bann frer pe ganny met deor e legzanp i la nou'n war Komisyoner Prizon-get ki zot in fer ek li i pa byen, Seselwa pa kontan PS Ledikasyon kot ASP, nou – zot pe koz lo *inclusivity* annou pran ka avek nou bann dimoun avek dezabilite, zot in fou koudpye nou frer Naddy

Zialor laba anler *State House* pour ranplas li avek en zanfan en *former* Prezidan.

Nepotism, viktimizasyon ek nou pa ek nou in retourn Sesel dan tou son splander. E en remark ki Lepep Seselwa in fer resorti zot dir ou konnen, tou sa letan ki Komisyoner Lapolis i la, madanm Georges ti napa prizonnyen sove, koman ladministrasyon i sove en sel kou nou tandé prizonnyen pe sove, pa bliye lontan prizonnyen ti ganny servi pou fer bann misyon sal. Zis koman ladministrasyon i sanze prizonnyen i komans sove zot tir sa madanm.

‘*Delay in recruitment*’, zot in koz lo *delay in recruitment* ler nou ti pe diskrit sa *Fiscal*, *Mid-Year Fiscal Analysis*, ‘*delay in recruitment*’ zot pa enterese avek profesyonnèl, zot pa pour enterese avek zenn zot, tou sa bann pozisyon ki mon pe mansyonnen la *advisor* isi, PS direkter, *State House*, partou dan bann Minister, napa enn sa bann post ki'n ganny *advertise* e zis bann dalon siporter e aktivis US ki'n ganny sa bann post. Oli - aköz LDS, bann siporter LDS nou pa Seselwa nou? Eski zis en group Seselwa ki merit ganny pozisyon dan sa pei ki apel Sesel?

Ler Prezidan Ramkalawan ti la i pa ti i pa ti get zot kouler politik, plizyer

bann dimoun ki ti siport *United Seychelles* ti ganny bann pozisyon, bann o pozisyon dan Gouvènmman, nou pa ti pini person. Mon kapab donn lalis menm bann manm Komite Santral ti ganny pozisyon dan Gouvènmman bann bon pozisyon. Person pa ti ganny met deor ouswa ti ganny fer pas par lafnet.

Ozordi koman zot antre zot pini e viktimiz bokou nou bann frer ek ser ki la deor, zis akòz zot pa siport *United Seychelles*. Sanmenm sa *for the – mannyer? For the many not for the few*, be la i kler, in fini vin *for the few and not for the many*. Akòz zot pe target en kantite nou bann frer ek ser Seselwa ki pa siport zot.

Mon bann frer ek ser mwan mon kapab dir ki mon vreman, vreman sagren avek sa ki pe arive avek bokou, bokou nou bann frer ek nou bann ser dan sa pei Sesel.

Mon pa pour zanmen bliye ler Onorab Sebastien Pillay ti *LOTO*, i ti dir ki nou pa bezwen sa kantite rezerv, rezerv tro bokou \$800milyon e nou target ti \$1bilyon i tro bokou e Onorab Sopha ankor in vini in koz lo la, lo rezerv. R800milyon rezerv ozordi target ti 1bilyon pa nou ladministrasyon.

Mr Speaker mon krwar i enportan pour Lepep Seselwa e nou bann frer lo sa kote, lot

kote latab konpran akòz ki nou bezwen en bon rezerv.

Se sa rezerv ki pour protez valer nou Roup, nou depan bokou lo lenportasyon *fuel*, manze, latizann, materyo konstriksyon, nou rezerv *foreign exchange* i ed Labank Santral siport valer nou Roup, pou anpes nou Roup devalye, pou anpes lenflasyon.

Apre nou bezwen pare, nou bezwen prepar nou pei an ka okenn sok ekonomik. Nou'n pas ladan dan lepase, nou bezwen *être* vizilan, nou bezwen *manage* nou larzan byen, bann sityasyon fors mazer ki kapab arive, kriz ekonomik parey *COVID* nou'n fer fas avek. Nou bezwen en rezerv pour enport bann komodite esansyel pour *avoid shortage* dan nou pei.

Nou bezwen en bon rezerv pour pey nou bann det enternasyonal, nou bezwen en rezerv pour nou *encourage foreign direct investment*, ler ou annan en bon rezerv i montre ki ou pei i stab, ki ou pei pe byen ganny *manage*, i *build investor confidence*, mon bann frer ek ser sanmenm sa ki nou bezwen en bon rezerv.

E i pou ede kree plis lenvestisman, plis travay e ede fer grandi nou lekonomi sanmenm sa ki nou annan en rezerv, i bon pour nou annan en bon rezerv. Si nou lekonomi Mr Speaker i stab ozordi se

gras a *LDS*, si i annan larzan dan kof Leta pour Ladministrasyon *US* ozordi depanse se gras a *LDS*.

Selman Mr Speaker mon bezwen dir sa ki nou dan *LDS* nou pour fer, se nou pour vey zot, nou pour vey Ladministrasyon *US*. Nou pa pour les *US* donn bal dan nou larzan ankor aköz deza zot in komanse ek sa Assomption la, 3 avyon Assomption parey Onorab Arissol in dir R5.7milyon sa kantite larzan in depanse pour 3 avyon, 3 avyon, pour al Assomption Mr Speaker.

Nou pe get zot aköz Mr Speaker, nou pa fye sa ladministrasyon aköz zot in fer dan lepase, zot in bour zot lanmen dan kof dan lepase nou pa fye zot. E deza Mr Speaker kan nou pe koze la, semenn prosen Prezidan Herminie i pe al get *Formula 1*, i pe al get *Formula 1*, semenn prosen.

Selman - ou konpran sa bann kalite ipokrizi Lepep Seselwa pe get zot, nou atantiv. La nou pe diskrit Bidze Siplemanter lannen prosen Bidze pe vini pour 2026, nou pe get zot e nou pa pour les zot fer gaspiyaz e donn bal dan larzan Lepep Seselwa ankor. Avek sa de mo mon dir ou mersi Mr Speaker.

(APPLAUSE)

MR DEPUTY SPEAKER

Mersi Onorab Woodcock nou ava donn laparol Onorab Trevor Louise.

HON TREVOR LOUISE

Mersi Mr Speaker. Bonzour tou Manm a lekout. Mr Speaker, lafason ki mannier sa Mosyon ozordi pe ganny deliber lo la i reman enkyetan.

I enkyetan parski, nou pe vwar en tandans kot en serten Manm en parti politik pe fer pep Seselwa krwar ki sa larzan pei, larzan Bidze i larzan zot parti politik, e non pa larzan Lepep Seselwa.

Sesel i pou Seselwa. Sesel pa pou *US* ni *LDS*. In ler pou arete dir ki sa zafer sa larzan ki nou'n kit la se nou larzan ki *US* pe depanse. Zot pa'n kit larzan la pou zot, larzan Lepep Seselwa ki zot in kit dan Kof.

Zot pa'n fer Seselwa en faver zot, zot in fer zot devwar koman en Gouvernman ki ti ganny elekte pou travay pour pep Seselwa. Ki zot pa'n fer tou dayer. Ki zot pa'n fer.

Parski si nou pou retourn lo sa Bidze, nou pou trouve ki annan en kantite bann proze ki ti sipoze ganny fer, pa'n ganny fer. *Ok*, en kantite ki ti sipoze ganny fer pa'n ganny fer.

E nou nou'n ganny dir konmkwa i annan keksoz ki ti

pou ganny fer, sa larzan ti la, nou pe al fer isi nou pe al fer laba. Proze lakaz, in ganny fer pou donn dimoun anba nou ladministrasyon.

Be sa Proze Lakaz ki ti ganny fer la i pour pep Seselwa, pa pou LDS, pour Lepep Seselwa. E Seselwa in pran zot *loan*, pa en nenport ki avek en labank, in pey Gouvernman atraver sistenm Gouvernman ki an plas, ki'n ganny etabli dayer par sa ki ti la 43an pase ki zot in zis swiv lo la, e zot in fer zot lakaz.

Zot pa'n fer Seselwa en faver zot, zot in fer zot devwar koman en parti politik ki ti o pouvwar sa letan. In ler pou arete sa zafer dir ki nou'n kit larzan, nou larzan ki ti la. Non, aköz i annan en tandans ki pe ganny pran pou dir konm kwa Bidze Fiskal, responsab lot, lot, lot lo papye i zoli. Me selman pa'n zanmen dekoult dann pos Seselwa, zanmen in arive dan pos Seselwa.

Ki nou ti war depi byen boner? Nou ti war en group Minis ki ti al danse dan lotel Dubai, sa nou ti war. Nou ti war en group Minis ki letan ti vin devan sa menm sa Lasanble kot en bon pe zot ti pe asize, ti vin maltret e koz mirak Seselwa, e pa ni menm kapab rann kont parski zot ti donn lanmen pour zot tenny *micro* e koupe.

Seselwa zanmen in konnen ki'n pase avek *COVID fund*. Nou pe koz lo *nepotism*, en letan nou ti war Vis Prezidan son ser i CEO SEYPEC, kouzin i CEO sepa ki bor lot kouzin i *Chairman Board* sepa ki bor, Minis son frer i CEO, *Deputy CEO* pa *nepotism* sa? Zot pa'n kre en sosyete *nepotism* zot osi dan sa letan?

Ozordi letan nou vwar enn nou frer ouswa nou ser Seselwa i pran en pozisyon dan nenport ki landrwa dan Legzekitiv nou kriye poudir i annan *nepotism*. Be Sesel pa i pour Seselwa? Sesel pa i pour tou son zanan.

Sa bann lapwentman, sa bann dimoun pa zanan Sesel? Zot pa devret manze aköz i pa dapre zot *liking*? I pa sorti dan zot parti, i pa'n fer zot travay?

Sa bann *post* in ganny kree i pa sipoze ganny kree aköz Seselwa pa sipoze pe ganny en *better source of life*? Mwan mon kapab dir zot pandan letan ki zot ladministrasyon ti o pouvwar in annan en bon pe *bottleneck*.

Dimoun in vir an ron, dimoun pa'n ganny servis ki ti sipoze gannye. Lasistans ki ti sipoze ariv kot zot zanmen in arive, *Ok*. E dimoun zis vir an ron, vir an ron, vir an ron, vir an ron.

Kwa ki mal si ozordi i annan detrwa *PS, Secretary of*

State i ganny mete la pou fasilite travay Gouvènmman pou asire ki Sesel e Seselwa i ganny en servis ki pli efektiv e pli o nivo? Ki annan ki mal ek sa?

Napa nanryen ki mal ek sa. Nou pe koz lo Bidze, demann zot lekòr pandan sa letan ki sa Bidze ti zoli lo papye, kantite dimoun ki'n bezwen ferm zot biznes parski zot pa'n kapab soutenir sa kalite lanvironnman ekonomik ki *LDS*, ki ti o pouvwar sa letan ti kree?

Kantite dimoun ki pa'n kapab soutenir zot biznes? Kantite biznes ki'n fermen? Kantite dimoun ki pa'n ganny lanplwa? Ki pa'n ganny asiste? Les mon koze ou.

Ki pa'n ganny asiste a sa letan, kantite dimoun ki'n perdi loubraz, ki ti al kot *welfare* in demann *welfare*, e i ti ganny refize akòz ti dir ou get lo ou kont, get lo kont ou manman, kont ou papa, kont ou piti konbyen larzan i annan. "*Mhm?*"

Kantite *carers* ki ozordi zot pe koz lo la ki a sa letan, letan zot, zot ti lamazorite zanmen zot deza koz lo la. Me letan sa lopozisyon a sa letan ti koze zot ti riye, ki'n sey demann zot en pti logmantasyon, demann en apwèntman avek zot pour demann zot pou koz lo zot lapar, zot pa ti enterese.

Ozordi zot pe koz lo *carers*? Kantite *cleaners* ki ti ganny maltrete? Fodre pa ki nou bliy vitman en. Parski Seselwa pa en nasyon ki bet li, Seselwa pa en nasyon ki bet.

E zis parey Seselwa pe get nou, Seselwa osi pe get zot. E pe get zot aksyon dan zot sez par lafason ki mannyer zot pe fer.

Ozordi en Mosyon i vin devan zot, dan plas koz lo zot distrik ankor enn fwa koz lo lapar pep Seselwa zot vin balbise, zot maltrete, zot asasin karakter dimoun. I annan en rezon akòz zot in ariv laba ozordi, e i kler.

Si mon pou pran distrik Bel Air, nou get lo lakantite proze ozordi ki annan en *budget cut*, depi 2020 napa okenn Proze Lakaz ki'n ganny fer dan distrik Bel Air.

Nou ti tandè dan letan kanpanny, dan *PPB* en ansyen *MNA* ki pou annan en Proze *Carpark* ki pe ganny fer, e sa in *go on* sa i ankor pe kontinyen sa.

E en semenn avan dezyenm eleksyon dezyenm *round* eleksyon, nou ti tandè par Prezidan Larepublik a sa letan ki annan Proze Lakaz ler in fer inogirasyon Proze St Louis ki pe al ganny fer Bel Air.

Me ziska ozordi ni menm dan Bidze napa, i pa aparet. Ni menm en pyer fondasyon pa ti ganny mete Bel Air, e zot pe

koz lo progre, lo stabilite lekonomi kan a sa letan zot pa'n zanmen pran pep Seselwa pou zot met o sant devlopman, zot pa ti enterese ek Seselwa zot.

E i kler sa. Nou koman en part responsab, en parti politik ki responsab nou konn tre byen bezwen sa pep. Parski letan ki zot, zot ti dekonekte ek pep Seselwa nou, nou ti lo teren pe ekout soufrans sa pep, nou ti pe angaz nou avek zot.

Letan ki zot pa ti enterese avek soufrans sa pep, nou tou le Sanmdi nou ti devan zot laport nou ti pe koz ek zot, nou ti pe ekout zot.

E ozordi tou sa bann pa e mezir ki pe ganny pran par Gouvernman *United Seychelles* i en refleksyon demann Lepep Seselwa.

E se pour sa rezon ki malgre tou defayans ki nou annan dan sa sistenm ki ti an plas nou pou aprouve sa Bidze nou, parski nou konsyan pou dir Seselwa i bezwen manze, e pei i bezwen bouze. Me sa vre Bidze *United Seychelles* la, zot pou war li tre byento. Mersi Mr Speaker.

MR DEPUTY SPEAKER

Mersi Onorab Louise. Zis mon anvi dir ek bann Manm Onorab, ler zot pe fer zot deliberasyon *address the Chair please*. Nou ava donn

laparol aprezan avek Onorab Sathya Naidu.

HON SATHYA NAIDU

Mersi Mr Speaker. Zisteman bokou in ganny dir, e i enportan pour mwan osi fer resorti pwennvi lo lapar mon bann zabitan.

Dabor, premyerman mon remersye zot pou met konfyans dan mwan, e mon osi pran lafyerte ki *score* ki mon'n gannye St Louis mon pa'n bezwen pey person, dimoun in desann e zot in donn zot sipor aköz lafason ki mwan mon krwar eleksyon i dwatet ganny deroule i pa dwatet baze dapre lo lekel ki pe donn plis larzan, ki pou determinen ki mannyer eski en eleksyon i dwatet deroule, ouswa ki lezot fason materyalis tik, eski en politisyen i kapab eksplwate pour li ganny vot, pa dwatet lafason ki nou la demokrasi i dwatet pe bouze.

Zisteman, Lepep Seselwa wi, zot in pran en desizyon, en desizyon ki'n plas nou dan lopozisyon e zot lo lot kote sa parti ki apel *US* in vin o pouvwar.

Me a lafen dizour, zot pou realize pou dir ki “a kekfw mon ti'n dwatet pran en lot desizyon.” Aköz ler zot pe dir zot pe vin fer diferaman, nou bezwen rekonnet pou dir ki dan lenstans ki ou pe vin pres

linite isi dan sa Lasanble Prezidan Herminie, ti'n vini, ti'n fer en diskour 25 minit, e i ti pe pres linite.

E de zour pli tar dan *rally* i ti pe dir *LDS* in mor, e i ti pe *attack* nou koman bann siporter ki'n vot pour *LDS*, e alors mon pe demande, ler ou pe pres linite eski i annan senserite Dokter Prezidan Herminie?

Zisteman, lo size senserite eski zot vreman senser ler zot in koz en kantite lo vwayaz, me selman sa Minis ki ti'n vin isi 14enm Minis son premye *travel* ti *Business Class* pros R100mil.

Ler zot pe dir zot pe vin fer diferaman lo lapar Lepep Seselwa. Eski zot a pe fer diferaman? Ler zot in vin avek lanons a sa ki konsern bann Minis.

Dan 14 i annan en bon pe resiklaz dan en serten sans. Mon ti krwar zot pe vin fer diferaman ler in annan bann dimoun ki'n *fail* dan bann pozisyon dan lepase.

Ler zot pa annan en bon *track record*, be ki mannyer eski ou fer re antre sa bann dimoun pou ede dan zesyon nou pei? Wi, i anba Konstitisyon i annan provizyon pou en 14enm Minis e zot in itiliz sa provizyon.

Me a lafen dizour, ler zot in koz en kantite lo palto, me selman son saler i bokou plis

ki sa palto ki zot ti pe koz lo la pandan 5an atraver ki zot in anbet en poursantaz Lepep Seselwa.

Me nou swe, se ki sa bann dimoun ki'n ganny anbete zot a konmans reflesir analiz en pe pli for ler nou pe koz lo sa size ki la.

Ler ou annan bann SS ki ganny apwente, e ou annan bann saler ki ekivalan si non plis ki en Minis. Eski pa vedir ki nou annan apepre 20 zot antou, e enkli bann lanons ki'n ganny fer yer? I fer ki nou annan en Legzekitiv ki *bloated*.

Annefe, ler nou pe koz lo resours imen atraver *mid-year review* nou'n war pou dir ki *vacancies* i annan en bon pe, pa pe ganny dimoun. I annan bann rezon aköz.

Nou annan en problem lalkol, nou annan en problem drog, nou annan en problem avek nou lafors travayer ki fer ki nou pe depan en bon pe lo etranze, e sa i zwe en gran rol non selman dan sekter piblik, dan prive osi.

Alors i annan en posibilite ki ler ou pe sours lakantite travayer nou pa pe neserman gannyen dan nou konteks lokalize.

Si ti annan *proper manpower planning* 43an zot ti la zot, *if there was such* nou pa ti pou'n annan mankman travayer dan bann diferan

domenn, sa i akoz *national manpower planning* pa'n ganny egzekite dan en fason ki efikas, e kot in ganny santre lo bann diferan nesesite lo baz nou resours imen.

Zisteman, lo sa size ki la nou bezwen rekonnet pou dir ki sa *manpower planning* i pa en keksoz ki ou kapab fer dan lan, 2an i pran en *destiny* pou ou kapab vreman asire ki ou annan sifizan resours imen pou zwenn bezwen marse lanplwa ozordi.

E an menm tan nou annan 11mil dimoun dan nou *civil service* ozordi, ki pe deservi bezwen 60mil dimoun. Be si nou ti annan en *civil service* ki ti efikas, nou ti pou war poudir lakantite dimoun ki pe travay dan *civil service* i mwens e nou pe rann en servis a la oter.

Me ankore en fwa, baze lo bann desizyon ki'n fek ganny pran yer nou war pou dir ki nou annan en *top heavy executive*. Wi, parey in ganny resorti si zot pou delivre, oli problemn?

Me nou bezwen rekonnet pou dir ki komansman pa'n bon, e ler i pa bon fodre ki nou dir, aköz i annan konsekans ki atase avek ki pou afekte Lepep Seselwa.

Alors zisteman, ler zot pe koz lo resours imen i annan en kantite *deadwood* dan *civil service*, dan plas rod en

mwayen stratezik pou adres li zot pa vini, zot vini zot vin avek en Legzekitiv ki *top heavy*.

Me zisteman, relasyon avek sa size ki la nou bezwen rekonnet pou dir ki ler nou pe fer referans avek sa lo kote bann *dress code* bann dimoun ki pe okip sa bann pozisyon lo sa Legzekitiv la, i paret zot en pe konfize.

Konfizyon total, ouswa sa safari suit ki sorti *made in India* i pou fer ki nou pou annan en Bidze osi an 2026 ki pou *made in India*?

Rezon mon pe dir sa, se aköz pour bann ki war kler ki analiz keksoz byen la, ler i annan bann promes pou dir ki nou pe al ganny 2,500 lakaz la in desann par 500 in vin 2mil, kote eski nou pou gannnen?

Mwan mon fyer pou dir ki ler nou pe fer referans avek bann Proze Kapital ki ladministrasyon dizour dan lepase LDS ler nou ti la, la mazorite ti anba '*locally financed*'.

Par legzanp, lekol La Rosière in sorti dan kof ki Lepep Seselwa atraver *tax* ki zot in peye, in annan plizyer lezot proze ki ladministrasyon dizour dan lepase, dizour pe vin ouver *condominium* 32 *unit*, be lekel si non Minis Rangasamy ek son lekip teknik ki ti'n vin avek sa konsep, e apre pli tar zot in vin ouver.

Wi, byensir ler nou ti pe fer dan en serten konteks parey i ti irit zot. E zisteman, mon le fer referans avek serten lanons ki'n ganny fer an relasyon avek proze, be ler nou'n ekout *mid-year review* ler zot ti pe koz lo don ki Lasin ti'n sipoze donner ouswa Larabi *Saudi* ti sipoze donner.

Me pou en rezon ou lot in annan bann birokrasi lo en baz entern ki pa'n permet nou resevwar sa led. Eski zot koman ladministrasyon dizour, zot pa pou avans sa?

Me selman i baze lo travay ki Minis Billy Rangasamy, ki Prezidan Larepiblik sa letan Wavel Ramkalawan ti fer.

Alors, ladan menm zot pe ganny pros 300 *unit*. Me ler zour sa bann proze pou ouver, eski zot pou pare pou annan lonnekte pou admet devan avek Lepep Seselwa pou dir in annan en travay ki'n komanse kek par?

Ou konnen, parfwa ler nou pe vin fer en keksoz e ler nou pe fer li byen dan en serten sans, si nou dwatet donn kredi pou sa dimoun ki'n inisye i egalman enportan, se la kot mon dir zot mank senserite.

Zisteman, ler i annan en *carpark* anba zanblon, ki en bon pe dimoun Bel Air pa ti'n vreman kontan, selman zot ti fer kanpanny kont sa proze

ozordi zour ler ou poste lo rezo sosyal pe debout a kote *DA* pou dir ou pe vin get proze, i *ok*.

Ler i annan Proze *Mid-Range Condo* ki sa letan Onorab Norbert Loizeau, Sans Soucis ti pe pous en proze ler ti pe ganny fer ler ti annan bann problemn teknik, zot ti fer en ta politik avek zot ti fer politik bonmarse dan plas rod en fason pou adres sa bann problemn teknik pou asire ki nou annan en proze ki ler in ganny finalize, ler in ganny prodwi i asire ki enn ki stab, dan plas fer sa, ki zot ti pe fer? zot ti pe eksplwat sa sityasyon pou fer politik bonmarse, be byento byensir avek sa Proze *STP* ki pe konekte bann lozman *mid-range condo* ki Onorab Norbert Loizeau, ansanm avek Minis Rangasamy, sa letan ti'n inisye nou war *tender* la, *ok*.

Tender i la li, pandan nou letan sa. Le 7 Oktob 2024, zot ti'n met devan sa propozisyon. Alors nou bezwen rekonnet ler i annan travay ki'n ganny fer, pa bezwen zis vin pran kredi lo travay en lot dimoun, i enportan pou onnet e senser avek Lepep Seselwa.

E alors, mon'n dir pli boner mon ti pe fer referans avek bann don ki nou Gouvernman in travay pou asire ki nou pou kapab zourir sa benefis.

Me ler mon pe koz lo size 2mil lakaz e mon'n osi fer referans avek Lenn, nou bezwen analiz keksoz byen menm.

I enportan pour Lepep Seselwa analiz sa tre pre, aköz napa okenn pei ki pou vin donn sepa konbyen lakaz ouswa bann diferan proze ki pa pou ekspekte nanryen pour Lepep Seselwa pour bann zenn ki entelizan la deor, analiz keksoz lo en baz pli larz kot zot pou war i annan bann pei ki le servi Sesel pou avans lo lentere.

E Ramkalawan, sa letan ti'n dir non i pa pou les sa arive, e in debout a kote Lepep Seselwa. Alors, i pou enteresan pou regarde mannyer sa sityasyon Assomption pou deroule, e Lepep Seselwa i bezwen analiz sa de pre, i enportan pou fer sa.

Zisteman, nou'n war Minis Barry Faure, zot in koz en kantite lo Proze *West Coast*, selman ki nou'n war dan Nouvel 8er i pe rekonnet pou dir in annan korperasyon bilateral ki'n permet sa proze arive, alors ti en bon keksoz.

Be sa menm msye ti vin isi dan sa Lasanble dan son *interview*, kot i ti pe ensiste pou dir “non, non, non, non pa krwar dan en baz”. Selman se li menm a en serten pwen ti'n siny en dokiman an 2018

pandan ladministrasyon son frer kot i ti'n sinyen.

Selman ozordi nou koman en Lasanble nou ti pe kestyonn sa i pa ni ti'n annan senserite parey mon ti'n dir pli boner la, i ti napa sa li ler ti'n vin devan ler ti pe vin koz lo sa size.

Alors, si Lenn i *back in the picture* i bezwen annan en rezon aköz, nou bezwen regard sa pli profon ler i konsern lenplimantasyon nou bann proze in annan en kantite, kekfw sanmenm nou war ki annan en propozisyon pou tir sa laspe tranzisyon pandan en peryod 1 Mwan aköz Ramkalawan ki ti pe koup, koup riban Bel Ombre.

Ramkalawan ki ti pe koup riban Cascade ansanm avek Onorab Monthy, e Onorab Denise Clarisse. Se li ki ti pe fer *West Coast Project* bann nouvo plak nou'n travay ki Ladministrasyon LDS ti'n fer la i ti pe ouver bann proze.

Alors mon panse in bezwen en kantite iritasyon, aköz si ti'n rantre i ti pou'n ouver kat proze aköz sa Proze *Mid Range Condo* malgre ki nou ladministrasyon in fer li in al met en plak lo la in koz en kantite lo plak li, selman i enportan pou regarde kot i annan senserite.

Zisteman, lo sa baz nou'n osi nou pe koz lo laspe finansyel, aköz i annan en

bann manev politik pou fer antre bann dimoun ki'n *fail* dan eleksyon pou fer desann poursantaz *proportionality* pou sorti 10 pou ariv lo 5.

Be ki kalite konsekans eski sa i pou annan lo Bidze pei? Deza malerezman i annan en bann mankman an term konprenezon a sa ki koncern benefis ki *MNA* i gannnen la deor.

E dimoun i malparl saler *MNA* zot, dimoun i malparl sa aköz i annan en mankman konprenezon a sa ki koncern benefis aköz zot, zot krwar i en serten nivo.

Be zisteman, si annan dis sez proporsyonnel isi dan sa Lasanble konbyen eski pou kout Lepep Seselwa? Lekel nou pe sey rann en faver Mr Ralf Volcere?

Sa bann lezot parti politik ki zot ti'n sey kree pou zisteman zot in zwenn zot lobzektif felisitasyon, me selman nou lo nou kote nou pou anmenn bann lamannman dan Lalwa Eleksyon pou fer sir ki nou annan bann kandida ki kredib ki pe vin devan en eleksyon.

Ou pa pou kapab annan en dimoun pe siny form nominasyon pour senk dimoun. Non *I'm sorry*, nou pe fer sa prosesis vin en fars.

E alors nou lo nou kote nou pou anmenn en lamannman a en moman

apropriye pou asire ki nou annan *Election's Act* ki bokou pli for ki sa enn ki nou annan la.

Me zisteman, lo sa size si i annan okenn politisyen la deor ki enterese pou antre dan Lasanble la, montre ou senserite la fason ki ou pe deservi nou sitwayen, pa bezwen vin fer politik bonmarse, vin avek kredibilite montre ki ou senser e ou a ganny ou 10poursan pou ou antre dan Lasanble, aköz le moman a ler appropriye ler i pou annan sa Prozedlwa ki pou vini mon pa pou siporte. Aköz mon santi ki annefe sa letan nou konnen lekel ki ti fer li vin 5 pou ariv 10 ti pa lot ki Mr defen Prezidan Albert Rene.

I ti sorti 5 pou ariv- i ti deza 5 li, selman ti fer monte 10 aköz i ti santi *SNP* ti pe vin en lafors. Me selman nou, nou konnen ki kalite zwe pe ganny zwe pou fer antre sa eleman 5poursan, ankor en fwa i mank senserite.

E i enportan pour nou rekonnet pou dir kot nou'n sorti kot nou'n arive Minis Pierre Laporte, ti'n dir dan son *interview* avek *SBC* pou dir nou annan en lekonomi ki stab, in rekonnet dan en serten sans malgre i ti difisil pou li aksepte pou dir sa travay ki departman finans sa letan par anba Minis ansyen

Vis-Prezidan Mr Ahmed Afif e menm Naadir Hassan i en bon travay.

Selman i difisil pou li aksepte, e rekonnet akòz in sorti lo en parti baz parti politik e alòrs i bezwen reprezant zot lentere.

Be selman Lepep Seselwa i war tousala, e alòrs ler in annan bon travay ki'n ganny fer, rekonnet kot nou'n al mal, mwan mon rekonnet kot nou'n kapab al mal.

E zisteman, nou pe regard de pre, eski zot pou fer pli byen ki nou ouswa nou ki pou kontinyelman donn zot leson lo lafason ki keksoz i dwatet ganny fer?

E zisteman, lo size resours imen nou pe koz lo la, la. Nou dan *LDS* nou ti'n krwar ki nou dwatet annan dimoun ki travay ant, dimoun ki pran zot responsabilite o serye, ki pa depan *cradle to the grave* atraver Kof Leta.

Me plito ki kapab trouv en sans responsabilite dan li pour li debout dan son de lipye, kekfwà mezir lafason ki ti pe ganny enplimante ti kapab en pe pli- i ti kapab tro strik, akòz nou ti le sanz mantalite nou pep pou asire ki nou relev en nivo moralite ki pli o ki ler nou ti'n erite.

Me zisteman, lo sa size ki la nou bezwen rekonnet pou dir in annan en kantite laspe ki'n vreman pozitiv pandan

nou ladministrasyon, partou kote lo baz lenfrastriktir nou'n fer.

E alòrs, i enportan pou rekonnet e dan konteks kot nou pa'n fer byen, be vini vin fer pli byen, me ler nou pe war bann lanons ki pe ganny fer kot zot in pres linite selman ler i konsern zisteman lo laspe *recruitment* zis get otour zot bann kandida ki'n *fail* dan eleksyon zot pe zis ganny plase dan bann diferan pozisyon pou bous trou, pou zwenn zot lekspektasyon politik ki zot, zot annan.

Me selman i annan en ta zenn la deor ki egalman annan potansyel donn zot sans. Parey Onorab Arissol, ti'n dir pli boner i dwatet annan *the due process* fer bann prosedir kot zot pe pibliye.

In annan kantite koze lo *nepotism*. Ok, si ou pe dir ti egziste pandan nou letan, be dan ou letan ki'n arive, kwa ki'n sanze?

Alòrs Lepep pe analiz sa sityasyon de pre, e zot pe regard tou parey in ganny dir dimoun i ase entelizan pou fer sa analiz. E i enportan ki zot, zot pa abiz sa pouvwar ki Lepep Seselwa in donn zot, servi li byen deservi sa pep byen anmenn sa pep ansanm ver en lavenir ki bokou pli prospere.

Me selman pou lapenn ki zot annan laswaf pouvwar ki

zot annan en lespri vanzans, pa bezwen anmenn sa bann eleman ankor dan Sesel, nou pa le sa nou.

Par legzanp, nou'n annan, e pou terminen mon pou zis kit sa bout koman en pwen refleksyon, koman en pwen referans.

Nou'n annan Komisyoner Prizon byensir i annan en lanons ki'n ganny fer, mon bezwen zis demande eski se aköz kot Prizon drog pa ti pe sirkile, parey in le ka dan lepase?

Eski se aköz bann *networks* ti'n kapab opere? Eski se aköz i annan prizonnyen ki Montanny Posee selman i annan akse ek en telefonn i pe kominik avek lemonn an deor? Eski aköz sa madanm ti pe fer en bon travay i ti senser dan son *job*?

Eski se aköz bann *Escobar* osi egalman dan en serten sans dan sa pei zot pe *operate* dan en lekonomi dan li menm pou fer antre larzan dan tou sort kalite fason? Eski se aköz i annan bann lentere koumsa ki pe ganny proteze laba anler?

Nou, nou bezwen regard Lepep Seselwa avek *toute* senserite, e ler i mank senserite nou lo sa kote latab nou pou fer tandé nou lavwa e bomaten zot in anpes Onorab Georges, demann son kestyon kot nou ti kapab vwar

mannyer ek nou pa ek nou pe retournen dan Sesel.

Byensir Mr Speaker, ou'n dakor pou dir ki wi, *Standing Orders* nou bezwen revwar ensidswit pou zwenn demann dizour. Fantastik, be nou ti kapab komanse ozordi. Mersi.

(APPLAUSE)

MR DEPUTY SPEAKER

Mersi Onorab Naidu. Nou a donn laparol Onorab Jean Toussaint ?

HON JEAN TOUSSAINT

Bonzour. Mersi Mr Speaker. Bonzour tou Manm Lasanble. Bonzour tou bann dimoun ki pe swiv nou ozordi. Midi mon a dir la wi. Mr Speaker, mwan mon ti a kontan enform Lasanble, mon bann koleg e tou bann ki pe swiv nou ki Mosyon anmennen par Onorab *LGB* Lemiel i en Mosyon ki mon pe aport mon soutyen, laprouvasyon Bidze Siplemanter.

E i annan serten pwen ki mon ti a kontan re vin lo la. Mon'n tann dernyen entervenans par egzanp koz lo loportinite, donn loportinite an relasyon avek resours imen. E i anmenn mwan lo sa pwen zisteman ki'n koz konsern kot i annan Bidze ki'n ganny koupe ou pa'n ganny servi pou rekritman.

E la nou pa pe koz 200 or 300 endividi ki pa pe ganny loportinite, ouswa pa'n ganny loportinite pou zot antre dan lanplwa pou amelyor zot lavi. Me nou pe koz en total 1000 dimoun ki'n ganny deprive loportinite pou zot amelyor zot lavi, ganny en lanplwa, ed zot fanmir e fer zot lavi vin pli meyer.

Nou'n tann bokou ganny dir lo sa size an relasyon avek akòz *recruitment* pa'n kapab ganny fer. Me pourtan nou fek tandè poudir lanfaz i met bokou lo lenportans resours imen. Bann rezon ki nou'n tann dir souvan, i fer mwan krwar ki in mank *seriousness*.

In mank langazman par Gouvènmàn presedans sirtou pandan bann dernyen lannen akòz i parmi premye lannen ki dan Bidze Siplemanter nou'n vwar poudir i annan en kantite departman, Minisè ouswa lazans kot nou'n annan bann *post* ouswa bann *post vacant*.

Ouswa posibilite pran lanplwa kot sa bann presyon pa'n ganny ranplase. Ouswa *recruitment* pa'n ganny fer. E dan sa konteks Mr Speaker, mon ti a kontan demann nou Gouvènmàn pou vwar en pe dan sa sityasyon ki mwan mon krwar i ase serye. E i konsern bokou dimoun, bokou sirtou nou bann dimoun ki pe rod en travay kot parmi i annan ki dir ou in fer son laplikasyon in

met dan diferan landrwa ouswa in anvoy dan landrwa apropiye.

E in espere, la ki i pa'n ganny sa travay me i pa'n zanmen ganny en *feedback* pou enform li poudir sa pos in ganny ranpli. Ouswa in nepli annan sa *vacant position*. Ouswa i *overqualified*, e sa i koz en problem. E sityasyon kot dimoun i pe sey anvi leve debourye pou li kapab soutenir son fanmir, son lavi an zeneral pou li fer en pti proze amelyor en pe kot lakour.

E tou i ganny deprive par bann konportman ouswa mon kapab dir tandans, akòz nou pe koz sa bann dernyen detrwa lannen la tandans kot *recruitment* i ganny mete. Bidze, i ganny bidzete, larzan i ganny *allocate* e nou pa war naryen i ganny fer. Donk, sa mon krwar i en depresyasyon lo lapar dimoun ki bezwen sirviv ki bezwen viv.

Me nou trouv larzan pa ganny depanse, apre nou ganny dir pou dir sa i en *savings* ki'n ganny fer. Lo depan lekel? Mon krwar sa sityasyon i serye. E i annan osi taktik ki mon krwar pe ganny adopte, ki la osi mon demann Gouvènmàn, nou Gouvènmàn pou vwar byen.

I annan bann dimoun ki pe rod travay, zot annan kalifikasyon adekwat. Ouswa

zot annan ase bagaz pou zot kapab antre dan serten lanplwa kot *vacancy* i annan, *recruitment* i devret pe anfors. E zot vwar zot pe ganny mete dan bann pozisyon *casual*. E ler zot 3 mwan i *due* ouswa zot ganny met dan en lanplwa ler zot probasyon i *due*. Zot probasyon i ganny *extend*, *casual* i ganny *extend* i ale 3 mwan a 6 mwan, 9 mwan, 1 an.

E finalman zot pa ganny ankadre pou zot kapab anmenn zot lavi. E la sa anplwayer li i pe kontinyelman fer profi lo depan bann ki pli vilnerab. Mr Speaker, mon panse poudir lo sa size *recruitment* i kler. E mon krwar i enportan fer resorti poudir lannen pase wi nou'n ganny dir pou dir nou pa'n kapab fer otan *recruitment*. Me i kler ki i pa en otan *recruitment* sa, nou pe koz 1000 dimoun.

Petet ladan i pa ti ava 1000 Seselwa. Me i ti a kapab kantmenm en 700 Seselwa ki zot lavi ti ava amelyore. Lo lot kote *coin* Mr Speaker, touzour *savings* lo lapar ouswa depresyasyon serten nou bann dimoun or nou bann dimoun ki pli vilnerab. Ler nou trouv nou tande 500 milyon larzan taks koman reveni in antre or i annan *savings* laba.

Proze ki'n ganny *delay*, sa bann larzan ti kapab ganny

servi lotreman. Dan mon distrik par egzanp, nou annan lenfrastruktir lasante ki deplorab. Nou annan Zofisye Lasante ki aret travay akòz i pa santi li konfortab pou li kontinyen reste dan lanplwa. E pourtant dan mon distrik nou annan en sant ki deservi lo en baz rezyonal, kot i annan bezwen pou servis de kalite dan en lanvironnman osi o nivo.

Donk, la osi nou pa devret pe pran laglwar poudir nou'n fer *savings*. Nou pe depriv dimoun serten loportinite dan sa konteks petet kalite lasante ki merite pou pa zis zot lepanouisman. Me lepanouisman nou distrik avek rezyon ou sosyete. Dan menm konteks akòz par egzanp lo kote lenfrastruktir ki nou'n tann dir lot kote latab ki i annan i annan en kantite lenvestisman ki'n ganny fer.

I vre, wi nou pa pe nie sa nou. I annan en kantite lenvestisman ki'n ganny fer lo lenfrastruktir. Me si nou pe get dan en portre pli larz, pli gran nou ti a tant pou vwar balansman lo nivo devlopman otour Mahe, menm Praslin, La Digue parey mon koleg la o bor mwan in fer resorti pli boner ki li i pa santi i pa trouve poudir i annan sa kalite devlopman ki'n arive dan son rezyon lo son zil dan son distrik.

Rezyon Sid was si mon pran par egzanp, nou trouv depresyasyon bann dimoun ki ti'n kapab ganny en landrwa reste alokasyon en lakaz pou zot viv pli mye zot avek zot fanmir, *right*. Be zis lo kote Sid Was ou pou trouv apepre en 222 *unit* ki *delay* dan lenplimantasyon sa bann kalite proze Cap Bonm Zan, Anse Royale. Nou pe koz Grand Anse, Port Glaud.

E si mon pou koz lo kote Anse Boileau, mon distrik i annan 10an de sela napa en gran proze lakaz ki'n ganny fer. E mon distrik i pa'n dan anba direksyon mon kapab dir Gouvernman dizour pandan sa dernyen 10an, *right*. Me mon byen kontan la, ki i annan en *unit* 24 anler dan Zelia Estate, anler Anse Louis, ki mon konpran i annan nou bann dimoun serten nou bann dimoun ki pou ganny *allocate*.

E menm sa i pa ankor ganny *allocate*. Savedir i annan plis ki 10an ki nou pe esper en fasilite, ouswa loportinite pou nou bann dimoun ganny alokasyon *at least* en landrwa pou zot reste. Donk Mr Speaker, mwan mon pa pou al tro bokou lo la.

Me an menm tan i bon fer resorti mon ti a kontan fer resorti ki avek sa kantite larzan ki mon krwar in ganny dekrir koman *savings* e lekonomi i bon sa ki'n ganny

kit deryer i ase pou nou kapab servi pou fer progre dan nou distrik *or* pei an zeneral.

Mon ti a egalman met lanfaz lo zisteman amenazman, bon amenazman. E osi depans byen larzan lo bann proze ki pe ganny fer dan sirtou lo bann lakot Was Mahe. Sa i an relasyon avek kote semen, miray e tou sa. Mersi bokou Mr Speaker.

(APPLAUSE)

MR DEPUTY SPEAKER

Mersi Onorab Toussaint. Mon ava donn laparol Onorab Francois Adelaide.

HON FRANCOIS ADELAIDE

Mersi Mr Speaker. Bonzour Mr Speaker. Bonzour tou Manm Onorab e tou dimoun ki a lekout. Mr Speaker, mon krwar i enportan mwan osi pou dir 2 pti mo *in regard to* sa Bidze Siplemanter ki *LGB* in anmennen pou nou kapab met en pti gin en pe plis laklerte lo sa size. Mwan mon krwar mon rol isi anndan koman sa Lezislater e sa *MNA* se reprezant mon distrik.

E osi tan posib, o sitan posib donn sa bon lenformasyon pou ki ler mon bann dimoun Baie Lazare i koze zot konpran ki zot pe koze. E zot konpran ki Lasanble pe dir. O komansman prezantasyon

Bidze Siplemanter, nou'n tann bann bon parol *in regard to* lekonomi ki mannyer *LDS* in anmenn lekonomi ki i annan larzan dan a laporte nenport Gouvernman e nenport departman ki zot kapab fer zot bann proze ki zot anvi fer.

Mon'n ekout sa prezantasyon atantivman, aköz byensir i annan enn de bann konsern ki'n met devan. Me selman bann granliny ki mon'n tande e ki mon apresye, esperon ki parol pa sanze pou ki Gouvernman *LDS* in fer en bon keksoz *in regard to* lekonomi. E la mon oule felisit Prezidan Ramkalawan avek tou son bann Minis. E son bann *PS*, e son bann delegasyon ki'n fer ki apre sa tranzisyon Sesel in reste en pei ki son lekonomi i solid.

E ozordi napa bokou dimoun ki per pou vin *invest* Sesel. E pou fer vin met larzan dan lekonomi Sesel, aköz parey in dir nou rezerv nou annan en bon rezerv. E sa byensir i kre bokou konfyans. So, savedir *LDS* in fer en tre bon travay pandan sa 5an. Menm ki ozordi Lepep Seselwa in deside ki zot anvi donn *US* sa labar, me Seselwa, an zeneral i rekonnet ki *LDS* in fer en bon travay pandan sa 5an ki'n pase.

Mr Speaker, ler mon pe ekout lo lot kote latab mon'n tann bokou bann pwen

negativ. Me mon pa pou war li drol aköz parey enn mon koleg in dir se ki pandan sa 5an ki nou'n dan sa Lasanble pou annan bokou bann mannev ki pou ganny fer pou refas listwar ki *LDS* in fer.

E mon konnen ki *LDS*, e mwan koman sa dimoun ki ti pe siport *LDS* koman *MNA LDS* mon'n travay avek mon leker pou mon distrik. Mon'n travay ek mon leker pou mon pei. E mon'n travay avek mon leker pou mon zabitan pou ki nou war en meyer lavi. Byensir pa tou keksoz ki parfe, me mon'n *give utmost best*.

E sa zabitan Baie Lazare pa le Seselwa an zeneral pa devret zanmen doute lo la. Byensir parey mon pe dir, nou pa pou kapab fer tou keksoz. Me i annan enn de bann pti pwen ki mon oule met en pti pe lanfaz lo la pou ki nou vreman konpran aköz ki sa bann keksoz in arive e aköz nou annan sa Bidze Siplemanter.

Nou'n tann Onorab Toussaint dernyen er koz lo *recruitment*. E i bon ki nou enform Seselwa. E mon krwar ti annan bann zofisye ki ti vin la devan, e nou ti demann kestyon. E zot menm zot in fer konpran aköz ki i annan bann delay dan *recruitment*. I pa zis Gouvernman *LDS* ki'n annan retar dan *recruitment*.

Gouvernman oparavan osi zot ti annan bann delay dan *recruitment*. Zis mon met en legzanp la avek Seselwa pou zot konpran. Si i annan *vacancy* pou 50 ners, e annou get en kou konbyen ners ki lekol ozordi pe prodwir. So, i annan bann domenn spesifik ki nou napa ase mendev pou nou kapab *recruit* dimoun.

E sa i enportan pou nou dir avek nou dimoun. I pa kestyon *recruitment* pa'n fer aköz nou pa'n anvi donn dimoun travay. I annan bann kad spesifik, e pa mwan ki ti dir sa se bann profesyonnel ki ti vin la devan nou ti demann kestyon enn apre lot. E zot ti fer konpran, i annan bann pos spesyalize ki kantmenm nou anvi *recruit* me nou napa.

So, sa i enportan e mon krwar ki nou devret dir nou pep pou nou pep konpran aköz ki i annan sa retar. Nou'n tann Onorab Gabriel bomaten in koze ler bann dimoun pe sorti dan Sid pou desann boutey az nou pa'n fer *third lane*. Me mon krwar Onorab i devret kapab al aprofondi son konesans lo aköz ki bann difikilte ki Gouvernman oparavan in gannyen ki nou pa'n kapab fer sa proze parey nou ti anvi.

Gouvernman ti anvi fer li, aköz mon osi dan Lasanble mon'n vini mon'n koze. Tou MNA dan Sid les in anmenn sa

problemm. Byensir la mon pa konnen si ou'n get televizyon, ti annan en miting Cascade *in regard to en land reclamation*. I enportan pou Seselwa konpran poudir sirtou bann dimoun dan Sid les i annan sa *issue* later.

I annan sa *issue* later ki nou Gouvernman pa'n oule fer parey zot ti fer avan. Pa oule *acquire* later ouswa pran later en dimoun zis pou rezon ki zot anvi pini sa dimoun ouswa *whatsoever*. Nou, nou ti annan bann ka spesyal. Nou anvi fer semen pou lamazorite pep Seselwa. Me nou pa'n kapab zis ale pran later ek sa bann dimoun.

Nou'n bezwen negosye, ziska la negosye i ankor pe marse. So, i pa vedir ki LDS in *fail* aköz i pa'n anvi met larzan dan Bidze. Me selman zis in mete, zis in anvi fer krwar i fer pli gro Bidze kan i ti annan tou posibilite pou li fer bann keksoz. Byensir i annan bann difikilte ki nou'n gannyen ki'n retarde, e ki nou pa'n kapab fer. nou pa'n kapab fer sa ki nou ti anvi.

Me selman mon konnen poudir lentansyon Gouvernman LDS sete pou vremen anmenn sa Seselwa lo sa pli o nivo. E sa mon pa doute sa, aköz se sa ki mon osi mon'n fer. Se sa ki mon ti ganny enstri avek mon parti pou fer travay pou mon

dimoun. E se sa ki mon'n fer. E la mon ava remersi bann zabitan Baie Lazare ki'n krwar dan mwan. Ki'n krwar dan mon travay ki mon'n fer e zot in elekte mwan pou mon 3enm manda.

Pou ganny elekte pou en 3enm manda i difisil. Me selman i pa enposib ler ou travay. Zot pa kapab dir nou pa'n travay, byensir nou'n delivre pou nou distrik. E mon napa dout ki Baie Lazare atraver sa bann Bidze ki nou dir nou pa'n depanse Baie Lazare in benefisye en kantite Mr Speaker.

Ozordi nou pe koz Proze *West Coast*. Pa zis Baie Lazare ki'n benefisye avek Proze *West Coast*. Anse Royale in benefisye. Takamaka in benefisye. Byensir Anse Boileau osi in benefisye. So, si sa Gouvernman pa ti pe travay ozordi petet ni Baie Lazare, aköz sa proze pa ti fek vini an 2020 sa.

Sa Proze *West Coast* en bann letan ti lo latib. E erezman nou annan en Gouvernman ki'n ase brav. In ase konstriktiv e ozordi nou fyer letan mon war mon bann dimoun zabitan Baie Lazare pe anmenn zot zanfän lo en *pavement* bomaten. Zot pa ni pe enkyet transpor pou tap zot.

E mwan mon dir mersi. Nou'n war tou dimoun pe

konplent. Pa tou dimoun enn de dimoun ki konplent. Arab, Arab i annan lentere sanmenm sa i pe donn zot... Menm si Arab i annan lentere, mon pa pou servi sa mo, me selman me si nou pe benefisye, si zabitan Baie Lazare pe benefisye.

So, eski i en problem? Mwan mon get *welfare* mon bann dimoun. E i enportan ki zabitan Baie Lazare i konnen, i konpran poudir tan ki *LDS* pa ti vini sa zanmen ti pou arive. E mon vremen rekonesan, nou menm nou'n tandé konbyen dimoun ki'n konplent olye dir mersi, nou rod tou defo ek sa proze.

Tou defo nou oule vini. Nou'n vol larzan, isi laba i annan delo ki pri. Me si i annan delo ki pri nou ava fer fason nou ava tir delo. So, i pli fasil pou nou tir delo ki nou al fer sa *stretch of pavement* depi Anse Boileau ziska Anse Royale.

So, mon krwar i enportan ki nou eksplik nou pep byen. Byensir, Gouvernman i bezwen son larzan siplemanter, en nouvo Gouvernman napa problem avek sa. Zot annan zot plan ki mannyer zot anvi zot krwar zot anvi anmenn Sesel ver lemeyer. Mwan mon napa problem mwan.

Kot i bon mon pou siporte, me nou rol isi dan

Lasanble Nasyonal, nou rol se annan sa *oversight*. E nou bezwen demann kestyon, pa dir nou pa demann kestyon, akòz napa personn dan sa Lasanble ki pou anpes nou demann kestyon. Nou pou demann kestyon ler nou anvi, kan nou anvi.

E nou bezwen ganny larepons ki nou, nou krwar sa Kreol la deor i bezwen tande.

(APPLAUSE)

HON FRANCOIS ADELAIDE

So, Bidze Siplemanter wi, nou pou gete, nou pou zize. Byensir ler i ariv son ler pou nou demann kestyon ankòr parey mon'n dir, nou pou demande. Sa i en proses ki normal. So, fòdre pa ki zot per sa akòz zot ti fer sa letan zot ti dan Lopoziyon.

E nou osi nou koman sa dimoun, sa bann dimoun ki'n ganny mete pou nou vey larzan lepep. Mon krwar ki i enportan ki nou fer nou loubraz. E parey mon dir kot i byen nou ava siporte. E kot i mal mon krwar i enportan ki nou demann kestyon.

So, pa pran nou mal si nou pou *query about* serten keksoz. Me reste konsyan ki nou fyer, nou kontan nou pep. Pa krwar parey mon'n tann zot dir nou'n anmas larzan akòz nou pa ti anvi donn pep. Non, non, non, nou pa'n anmas

larzan akòz nou pa ti anvi donn pep. Me nou ti anvi en lavenir pli briyan pou nou pep.

Me petet zot pa'n konpran nou. E byensir nou ava get Gouvernman dizour ki mannyer i ale. E demen apre 5an, zot ki pou deside si zot anvi kit sa Gouvernman la ouswa zot anvi re swiv sa program ki LDS ti anvi anmenn zot. E byensir tou keksoz ki nou oule nou, nou oule byennet pou nou pep.

So, Mr Speaker, mon pa pou tarde mon krwar mon'n dir de pwen ki mon krwar i vremen enportan ki nou dir ler nou pe rod en Bidze Siplemanter. Me nou pa zis dir non pa isi pa laba. Me nou koz ek nou pep e nou eksplik zot byen pou ki an mezir ki nou pe dir nou pep poudir nou pe vin rod ankòr en pe plis larzan. Me zot konsyan, zot konnen kote sa larzan pe ale. Avek sa 2 mo Mr Speaker, mon a remersi ou. Mersi bokou.

(APPLAUSE)

MR DEPUTY SPEAKER

Mersi Onorab Adelaide. Bon, letan mon pe regard kantite letan ki bann Manm pe koze anviron 12 a 15 minit. Mon pa krwar i pou fer zistis pou mwan pran en Manm ki pou fini midi edmi la. So, nou pou pran nou poz *lunch*. Nou pou

retournen 2er. E ABC pou
zwenn 1er en kar. Mersi.

(BREAK)

MR DEPUTY SPEAKER

Bonn apre midi. Nou a dir
bonn apre midi tou bann ki pe
swiv nou lo televizyon. Nou
ankor pe pran *Supplementary
Appropriation*.

Lo mon lalis mon ti a
kontan demann okenn Manm
ki an dezir pou koze, *in the
interest of time* ki nou anvizaze
fini *by* 5er. E nou pou donn *at
least* en 10 minit par Manm
pou delibre.

So bann ki anvi koze, fer
konnen la pour nou met zot
non lo lalis silvouple. *Ok.*
Onorab Georges, ou pou
rezerv ou drwa pour ou koz
apre? *Ok.* Laparol i a ou
Onorab Georges.

HON BERNARD GEORGES

Mersi Mr Speaker. Bonn apre
midi Mr Speaker. Bonn apre
midi tou bann Manm Onorab
e tou dimoun ki pe swiv nou.

Mr Speaker, sa Mosyon
ki devan nou i enn ki ase senp.
Annefe, tre senp pe demann
ratifye en seri mezir, en seri
peyman ki'n ganny fer oubyen
en seri koupir ki'n ganny fer,
malgre ki dan konteks en
Bidze se zis Apropryasyon ki
nou regarde e non pa koupir
depans. Me dan sa ka tou lede
i annan en rol pou zwe.

Sa 34 nou ki isi dan
Lasanble Nasyonal Mr
Speaker, nou 34 dimoun ki
annan en loportinite
ekstraordiner e nou devret
rekonnet ki nou 34 dimoun ki
enportan. Akoz se zis nou ki
Lezislater.

E enn bann latas ki nou
ganny demande pou fer
konman Lezislater, si non,
latas pli enportan ki nou
ganny demande pou fer
konman Lezislater se pou
apropriy larzan pour ki
ladministrasyon, Legzekitiv ek
Zidisyer i kapab depanse. E sa
set en rol ki personn ankor
dan pei napa. Se zis nou. E zis
nou ki kapab fer sa.

Alor i enportan ki
anmezir ki nou pe deliber lo
Apropryasyon, ki se swa en
Bidze pour en lannen, oubyen
ki se swa bann Bidze
Siplemanter ki arive
tanzantan, ki nou gard sa
antet ki nou travay ki nou
ganny demande pou fer set en
travay ki nob e set en travay ki
nou merit fer an plenn
konsyans e avek tou respe ki
sa i anmennen.

Sak ladministrasyon ki
vin dan pei pou anmenn en
Bidze devan Lasanble
Nasyonal. Sak
ladministrasyon ki vin dan pei
pou anmenn Bidze
Siplemanter dan Lasanble
Nasyonal. Sa *it's a given*. I
bezwen mars koumsa akoz

nou rezim Konstitisyonnel i dekre ki i pou mars koumsa.

Ladministrasyon i propoze, me se nou ki apropiy sa larzan pour zot fer sa ki zot in propoze fer. I kler neanmwèn ki en mazorite dan en Lasanble Nasyonal ler sa mazorite i mazorite ladministrasyon ki o pouvwar, i pou pas sa Bidze plizoumwèn si non, egzakteman mannyer i ganny propoze. Akoz sa ankor enn fwa, se lafason ki keksoz i deroule. Me pa neseserman devret koumsa.

Par egzanp, i kapab annan en koabitasyon kot ladministrasyon napa mazorite dan Lasanble Nasyonal, i pou bezwen fye lo sa mazorite ki i pa kontrole pou permet li apropiy larzan, oubyen ki pou apropiy larzan pour li kapab depanse.

E mon dir sa Mr Speaker pour nou realize ki parey mon taler, sa travay ki nou fer i en travay nasyonal. I pa en travay partizan, i pa en travay US oubyen LDS, me en travay nasyonal.

Akoz en Gouvernman ki'n ganny elekte pou administre en pei i bezwen en Bidze pour li administre en pei avek.

Annefe ler mon ti demann en kestyon avek Minis Finans semenn pase, mon ti felisit li aköz mon ti dir ki mon kontan ki in gard sa

nivo kontinite ki bezwen egziste lo nivo Finans. Me sertenman i devret egziste dan tou bann domenn ant en ladministrasyon avek en lot.

Akoz ladministrasyon i vini Mr Speaker, ladministrasyon pou ale. Nou pou fer politik nou pou dir parey nou, nou ti dir ler nou ti lo lot kote latab, zot zanmen zot pou retourn dan Gouvernman ankor, e parey zot, zot fek dir bomaten. Me sa nou konnen i politik.

Natirelman Lepep Seselwa in fini aprann ki i annan pouvwar pou sanz Gouvernman ler i anvi. E kontan pa kontan, sote pile, Lepep Seselwa pou sanz Gouvernman ler zot war i nesese pou sanze.

Sa ki enportan neanmwèn se ki nou realiz non selman kontinite e ki lefet ki Gouvernman i ale, Gouvernman i vini. Me striktir i reste parey. Me nou osi rekonnet ki apard enn ou de keksoz, napa okenn diferans ant en Gouvernman avek en lot.

Tou Gouvernman ki vin o pouvwar i anvi travay pour byennet Lepep. Tou Gouvernman ki vin o pouvwar i annan en lentere travay dir. Tou Gouvernman ki vin o pouvwar i anvi kit sa pei ler voter i dir li kit sa pei dan en meyer landrwa ki in trouv li.

So evantyeleman, sel keksoz ki sanze se filozofi en parti politik. Apard sa tou keksoz i reste egzakteman parey. Ou i devret reste egzakteman parey. Filozofi politik pou sanze. E nou'n vwar diferans ant sa de filozofi politik dan sa de dernyen eleksyon.

Nou annan lo kote - lo en kote, en Gouvernman ki krwar dan prepar striktir. Fer sir ki bann striktir Leta, non selman bann striktir tanzib parey bann batiman, bann semen, eksetera, por.

Me osi bann striktir entanzib responsabilite, eksetera, i ganny met an plas premye avan ki ou pas lo partaz larises. *In other words*, kwi gato, *build up* en lekonome solid e apre partaze. E sa se *obviously LDS*.

E lo lot kote, ou annan en Gouvernman ki son filozofi toultan i pa'n sanze. Ki son filozofi se regard dimoun – regard dimoun an premye. Parey zot kontan dir, met zonn o sant devlopman.

Regard dimoun an premye. Regard *welfare* en dimoun, fer sir ki zot annan tou sa ki zot bezwen. Me non pa regard kwi gato. Fer lekonome solid neserman premye. La, la sel diferans mon bann zanmi ant zot avek nou.

E tanzantan – tanzantan ler lenfrastriktir pou'n tonbe e keksoz pou dan en defayans, Lepep Seselwa pou *vote* pour sa Gouvernman pou vin an plas pour li re *build* lekonome e re *build* lenfrastriktir.

Tanzantan ler sa Gouvernman in fer tousala, Lepep Seselwa pou dir pou *vote* pour en Gouvernman ki pou dir prezan nou depans sa larzan ki zot in akimile.

E sa Mr Speaker se sa ki nou apel *the peaks and troughs of governance*. Gouvernman pa *flatline* li. En pei zanmen i *flatline* aköz ler i *flatline* i mor, i *up and down*. Tanzantan ou pou ganny enn ki pou monte, enn ki pou desann. E se sa larises en pei.

E mon'n dir sa ozordi aköz in fatig mwan en pe tournir ki deba in pran bomaten, kot nou pe fer tou keksoz *black and white*. *Basically, US good LDS bad* ler zot, zot in koze. E lo nou kote, *LDS good, US less good* ler nou nou'n koze.

E sa set en – sa set en – i pa fer zistis a sa Mosyon ki devan nou ozordi e i pa fer zistis a travay ki nou bezwen fer koman en Lasanble Nasyon al ler nou ganny demande pou regard en Bidze e pou aprouv en Bidze.

Menm si i en Bidze Siplemanter e menm si i ti pou nou Bidze Siplemanter si

eleksyon ti'n al dan en diferan fason 2 mwan pase. Se nou ki ti pou pe propoz sa Bidze ozordi e se nou ki ti pou *vote* pour li.

E tousala Mr Speaker, i anmenn mwan pou dir ki aköz tou sa bann keksoz, nou konman bann Manm Lasanble Nasyonal, nou annan en responsabilite.

E en responsabilite ki nou lo sa kote latab nou'n desarze toultan, menm ler nou ti annan mazorite Lasanble, me nou pa ti kontrol *State House*.

E sa responsabilite se zanmen pou *vote down* en Bidze. Toultan swa ou *vote* an faver, swa ou *abstain*. Me ou napa drwa *vote down* en Bidze aköz Lepep in vote pour sa Gouvernman vin travay e i bezwen ganny en Bidze. Ou bezwen donn li son Apropriasyon ki i bezwen.

Lo en kote, en Gouvernman ki konstrir. Lo lot kote, en Gouvernman ki depanse. Lo en kote, en Gouvernman ki sey responsabiliz son pep, ki'n kout li ser. Ki'n kout nou ser. Lo lot kote, en Gouvernman ki plito fer en pep vin depandan lo Gouvernman e ki pou *eventually* kout zot ser.

E sa i pa zis en kestyon Sesel sa Mr Speaker. Ou war sa partou. Ou war sa Lanmerik, Prezidan Trump ki

kote drwat i akiz tou bann demokrat konmkwa zot komitman zot sosyalis, zot kominis, zot anvi zes depans larzan Leta.

Nou war sa Langleter ozordi ant *Labour* avek Konservater. *Labour* fek pas en Bidze ki pou donn plis larzan. Konservater pe sote, pile. Nou war sa Lafrans, nou war sa Moris, nou war sa partou. Sa se keksoz ki nou bezwen viv avek.

E donk Mr Speaker, mon ti ava swete ki an mezir ki nou pe *proceed* la apre midi, nou gard sa antet.

Annefe, Onorab Trevor Louise bomaten in fer nou rapel ki Bel Air anmezir ki nou, nou ti ankor pe regarde ki mannyer pou fer *carpark* avek lakaz pour bann dimoun, li avek son tim zot ti pe pas devan laport dimoun ti pe ekout sa ki zot ti annan pou dir.

Sa i montre sa *stark difference* ant nou de filozofi politik dan sa Lasanble Nasyonal e dan sa pei. Me i pa devret koumsa. I devret annan en pe dan tou lede kote.

E annefe nou vwar, e isi Sesel i pa en leksepsyon parey nou pou vwar apre ki tou sa retorik in ganny dir e ki travay i konmanse, nou pou vwar ki finalman sa de filozofi i rezwenn dan milye, *in the centre* parey nou dir, kot sak

Gouvernman pou bezwen kwi en bout gato e sak Gouvernman pou bezwen partaz en bout gato.

Ou pa pou kapab annan zis enn ki zis kwi e lot ki zis partaze. Pa pou marse. E listwar in montre nou ki sa pa pou marse.

Tou Gouvernman pou vin avek plis *Supplementary Budget*. E mon anvi warn mon bann zanmi lo lot kote latab ki ozordi zot pe kritik sa *Supplementary Budget* aköz sa se nou *Supplementary Budget* ki nou ti'n prepare.

Arh, ki mannyer nou pa'n anploy dimoun? Ki mannyer nou'n ganny tou sa bann larzan ki'n reste, eksetera?

Mon bann zanmi, zot pou anmennen *Supplementary Budget* zot. Plizyer *Supplementary Budget* dan sa detrwa lannen ki devan nou.

E dan sa *Supplementary Budget*, krwar mwan ki i pou annan larzan ki zot in apropiye me ki zot pa'n kapab depanse e ki zot pe demann *cut back*.

In toultan annan e i pou toultan annan. Alor annou annan en pti pe plis limilite. Annou pa tro kras anler aköz demen sa lakras pou tonm lo nou menm. As *night follows day*, se sa ki pou arive.

Mon ti a kontan Mr Speaker apre midi dir, e mon krwar i mon devwar pou dir, ki

wi, *LDS* in kit pouvwar avek en lekonomi ekstrememan stab e ekstrememan solid.

Avek *growth right across the board* parey mon ti dir semenn pase. 7.5poursan dan tourizm. 7.5poursan dan – 3.5poursan dan *manufacturing*. 3.5poursan lo *fisheries*. 7.5poursan dan *manufacturing*. 32poursan dan *IT*, eksetera, eksetera, eksetera.

800milyon rezerv. To lenflasyon ki ba. Pa vo lapenn nou vin lager avek sa bann *figures*, aköz i vre. I vre. E mon swete ki ler zot, zot kit pouvwar ki nou lekonomi i ava osi performan. Osi byen. Aköz se koumsa ki nou pei pou kapab devlope.

I pa en kestyon ki enn pour ou konstrir, lot pou kraze. Oubyen enn pou kraze, apre lot pou vin rekonstrir. E sa i anmenn mwan a sa – a en pwen ki in fatig mwan. Fatig mwan en kantite.

E sa se en lenpresyon ki nou anvi donner nou isi dan Lasanble Nasyonal, me osi sa ladministrasyon deor ki'n fek pran pouvwar, ki zot bezwen sanz tou keksoz ki nou nou'n fer.

It's a wrong move e i pa pou anmenn nou okenn par, e sertenman i pa pou anmenn nou dan okenn linite. Nou bezwen aksepte.

Mr Speaker, ki mannyer en dimoun i kapab debout, ki mannyer en Manm Lasanble i kapab debout ozordi dan nenport ki distrik e dir naryen pa'n ganny fer? Si ou onnet avek ou lekor parey nou tou nou devret, ou bezwen aksepte ki keksoz in ganny fer.

Kekfwa ou pa kontan ki in ganny fer - pa'n ganny fer ase, ou kapab dir. Me pou debout, e sirtou Grand Anse Praslin oubyen Baie Ste Anne Praslin pou debout e dir naryen pa'n ganny fer, i pa fer ou loner, aköz tou dimoun i konnen ou pe lalang. Ou ganny mwan?

So, ou devret aksepte ki i annan kontinite ki sa ki enn in fer lot pou kontinyen avek, epi i pou kit dan semen e en lot pou vini pou fer pli byen ankor.

Me mon dir sa i fatig mwan aköz mon war menm dan ladministrasyon en dezir *wipe out* tou sa ki *LDS* in fer, e ranplas li avek en diferan fason fer. E sa pa bon pour nou pei. Pa bon pour nou pei ditou.

Ler Prezidan i dir i pou fer lanket dan *x*, i pou fer lanket dan *y*, i pou fer lanket dan *z*, *Assumption* in fini apwent *Ziz*, *CCCL*, *TRNUC*, eksetera, i pe anvoy en mesaj konmkwa sa ladministrasyon avan ti move. Li ki pou vin aranz keksoz.

Olye *build* lo fondasyon ki'n ganny fer. Non, tousala i mal, alor ou bezwen al *investigate* ladan aköz i annan en persepsyon ki sa i mal. Alor ou bezwen antre ladan e regarde kote sa in al mal.

Olye aksepte ki Gouvernman i travay dan lonnekte e i kit ou avek en fondasyon lo lekel ou, ou kontinyen konstrir. E nou war menm zafer dan sa ki ti pour mon kestyon *PNQ* bomaten, avek tou sa bann apwentman ki'n ganny fer.

Ki mannyer ou kapab Mr Speaker, pran en *PS* Ralph Jean-Louis - mon servi li aköz i mon *constituent* i reste dan mon distrik, e tir li konman *PS* dan Minister Lafanmir, *Sports* avek *Lazenes*, transfer li pour li vin Deputy *Head Teacher* Anse Boileau, ler ou konnen ki li menm li i pa ...?

Ki mesaj ki ou pe anvwaye? Pa zis li, i annan plizyer lezot, me letan i kourt, mon napa letan pou al dan tousala, ki mesaj ki ou pe anvwaye? Aköz ou konnen *background* sa msye, ou konnen ki parti politik i siporte. E ler sa i arive-

Eski nou, nou napa drwa kestyonnen e dir, be *obviously* i en mannev politik. *Whether it is or not*, persepsyon i tou. *Perception is everything*.

E ler ou vwar en seri - e mon pa pou retourn lo la

ankor, 36 *PS* or 9 *SS* or sepa konbyen ki ganny apwente. E tousala san eksepsyon – mon pe koz bann *SS*, tousala se bann Manm Parti *US*.

Swa zot in debout dan eleksyon. Swa zot in pas lo en *PPB*. Swa zot ti en Manm Lasanble avan or *whatever*. Ki mesaz ou pe anvwaye apard *US good, LDS bad?* Nou bezwen vin tir tou sa ki la avan e met nou prop dimoun ansarz.

E sa i en sityasyon danzere pour nou pei. E mon fer en lapel avek sa Gouvernman, silvouple gard en pe rezerv. Gard zot lekor an rezerv. Akoz i annan keksoz ki nou'n kit avek zot ki bon e ki pou vin dan zot lavantaz, e ki zot pou kapab travay avek.

E la Mr Speaker, permet mwan brievman pas lo 3 *pti size*. Par egzanp, in ganny dir enn bann rezon ki sa *supplementary* pe vin devan oubyen ki bezwen annan koupir, se ki bann larzan ki nou ti'n apropiye pou fer bann proze kapital pa'n ganny fer, alor sa i en defayans lo kote *LDS*.

Eski i vre? Eski i vre ki sa i en defayans lo kote *LDS*, oubyen ti annan bann rezon ki si nou demann nou lekor byen, nou ava vwar lekel sa bann rezon? Mon a donn ou enn.

Ti annan larzan in ganny apropiye pou fer en blok apartman dan kan Plaisance dan mon distrik Les Mamelles *opposite* Mohan. Akoz ki i pa'n ganny fer?

3an Mr Speaker, nou pe lager avek bann dimoun ki ti propriyeter sa later pou ariv a en laranzman pou aste sa later e pou kapab fer lakaz.

Repons i kler. I pa ki Gouvernman i pa'n azir. Ti'n kapab fer en *compulsory acquisition* parey Parti *US* in kontan fer dan lepase. E ozordi nou ti pou annan nou blok apartman.

Me se pa koumsa ki ou travay. Ou'n negosye e finalman ou'n arive. Nou pa'n ganny li sa lannen. Bondye pitye menm anba zot Gouvernman, nou ava ganny li lannen prosenn.

Me la, la rezon akoz ki sa pa'n ganny fer. E mon sir ki si nou pas partou nou pou war menm sityasyon dan tou bann landrwa kot *capital projects* pa'n ganny fer. I annan en bon rezon apard lenkonpetans *LDS* parey zot, zot pe dir.

Dezyenmman, *IDC* pa'n pey *dividend*. Mon bann zanmi, les mwan fer zot konnen ki sel rezon ki *IDC* i fer larzan. *IDC* pa fer larzan avek zil li. Zil i kout larzan.

IDC son sel rezon ki *IDC* i kapab fer larzan se fer lotel. Se brans konstriksyon *IDC* ki fer

larzan akòz i konstri lotel e i ganny larzan pou li kapab pey *dividend*.

Lemoman ki IDC i aret konstri lotel – e la mon pa pe koz lo Assumption. Mon pe koz lo *Île Platte* ki'n ganny fer. Mon pe koz lo Desroches, eksetera.

Lemoman ki IDC i aret konstri lotel, i nepli kapab balans son liv, *let alone* pey en *dividend* avek Gouvènmàn.

Alor la, la. Ou war? Si nou demande e si nou servi nou lentelizans pou al sey rode akòz serten keksoz i arive, nou ava konnen akòz sa bann keksoz i arive.

Recruitment. Tou dimoun pe koz lo *recruitment* bomaten. Akòz ki nou pa'n kapab *recruit* mil dimoun, donk sa larzan i la e nou pa kapab – nou pa devret bidzete pou en keksoz apre pa delivre. Eski nou demann nou lekor akòz nou pa kapab *recruit* Mr Speaker?

Oubyen ki nou anvi fer? Nou anvi apwènt nenpòrt ki dimoun, menm si i pa *fit* dan sa kategori? Oubyen si napa sifizaman Seselwa, fer vin etranze, zis pou nou dir ti annan en Bidze, nou'n depans sa Bidze.

Alor, pou nou pa kapab – demen dan Lasanble Nasyonal pou dimoun pa vin demann nou kestyon akòz ki nou'n bidzete epi nou pa'n *recruit*. Se sa ki nou anvi fer?

Akòz lemoman ki nou fer

sa, si nou anploy etranze, nou pou depans plis larzan. Si nou *recruit* dimoun ki pa kalifye akòz nou anvi *fail* sa pozisyon, standar pou tonbe partou.

Bann Gouvènmàn ki la, bann ladministrasyon ki la, pa bann administrasyon bet Mr Speaker. Zot fer bann keksoz selon zot kapasite e kapasite pei pou li anmenn sa bann dimoun devan.

Alor, ler nou koz lo disiplin fiskal e nou servi sa zoli mo disiplin fiskal. Fer plis avek mwens. Zoli parol. Me mwan mon pe esper sa Bidze 100 zour vini pou konnen ki manyer avek tou sa bann *recruitment* ki zot pe fer zot pou al fer plis avek mwens. Sa ki mon anvi konnen mwan.

Akòz ziska prezan, sel keksoz ki nou'n ganny dir se Gouvènmàn pe al depans sa, sa, sa. Pe fer desann pri pansyon. Pe fer monte pansyon par R800 par mwan. Pe bouz isi. Pe fer URS. Pe met isi. In anploy 9 SS.

Personn pa ankòr dir nou kote sa larzan pou sorti. Se sa ki mwan mon enterese, mon enterese konnen pou mwan konnen kisisa sa rezim – sa disiplin fiskal ki nou pe anmenn devan nou la ozordi.

E Mr Speaker, disiplin fiskal parey mon'n dir, i fasil pou dir. Mwan mon rapel isi menm dan sa Lasanble

Nasyonal la, *US* ki ti asiz lo sa kote latab. E Onorab Sebastien Pillay ozordi Vis-Prezidan Larepiblik ki ti asiz dan sa sez, ti sote ler ti annan en sirplis lo lasistans proteksyon sosyal ki ti reste lafen lannen.

Arh, nou'n *vote* en bilyon e la i reste 60milyon ki nou pa'n depanse. Nou ti'n devret depanse anmenn sa devan laport dimoun. E sa disiplin fiskal, oubyen se iresponsabilite kot aköz ou annan larzan, ou bezwen al donn dimoun menm si zot pa bezwen?

E se sa mon bann zanmi ki nou pou war avek zot Gouvernman. Aköz pandan 43an se sa ki zot Gouvernman in fer e i pou kontinyen fer ankor. Krwar mwan e zot isi, se zot ki pou al donn li permisyon pou fer. Aköz zot pou napa sa kouraz pou dir, non, *enough is enough*. Nou pa pe donn ou sa larzan aköz ou pe al depanse.

Non. Nou pou pas devan laport dimoun, nou pou ekout zot soufrans e nou pou donn zot larzan dan en fason ki nou pou retourn dan en sityasyon depandans ankor apre ki nou – e nou'n perdi eleksyon aköz sa. Aköz ki nou nou'n dir avek Lepep Seselwa.

E 50poursan Lepep Seselwa in konpran Mr Speaker. Annou vin pli

responsab silvouple. Annou vin pli responsab. Sa ki bezwen a gannyen, sa ki pa bezwen pa devret gannyen.

Aküz ki mwan avek sa saler ki mon annan la Lasanble Nasyonal, aköz mon'n fini ariv laz sekirite, aköz ki mwan mon bezwen ganny en sekirite sosyal? Demann mwan, aret demann sa kestyon?

Aküz ki si en lot dimoun ki li i pe ganny mwens ki pa devret ganny mon sekirite sosyal ansanm avek sa ki pour li pou balanse?

Olye fer ou konnen ki zot fer? Zot redwir tou dimoun. Zot redwir tou dimoun pou fer zot - menm sa bann ki pa devret gannyen, ganny en sekirite sosyal 63an. Se sa zot *mindset*.

Mon pa pe ensilte zot. Mon pe zis dir zot ki zot in telman dan sa sityasyon ki zot sel keksoz ki zot war – aköz i senp aköz i fasil, se donn larzan, pey dimoun, fer zot kontan e pei i ava mars byen, nou, nou ava reste o pouvwar. Zot *LDS* zot ava reste dan Lopoziyon pour toultan, parey zot fek dir nou bomaten.

Alor Mr Speaker, mon remersye ou pour sa letan ki ou'n donn mwan la apre midi, me permet mwan en dernyen parol. Ou konnen mon bann zanmi zot, zot in o pouvwar 43an. Nou nou'n o pouvwar 5,

e ladan 3 apepre pour nou kapab fer en pe travay. Akoz 2 nou ti ankor pe sorti dan COVID e ti pe met pei annord.

Dan sa 3an Mr Speaker, avek sa *Supplementary Appropriation* ki'n vin la ozordi. E mwan mon kapab dir o e fyer, *well done* Prezidan Ramkalawan! *Well done* ou Minis – ou *Cabinet of Ministers* e *well done* LDS dan sa Lasanble Nasyonal!

(APPLAUSE)

HON BERNARD GEORGES

Akoz nou nou'n travay e nou'n konstrir en pei ki prezan nou'n kit avek zot pour zot dan sa peryod ki pe vini. Silvouple, ede pour li al pli lwen e non pa detri parey nou ekspekte ki zot pou fer.

Silvouple, mazin byen, parey mon ti konmanse apre midi, sa responsabilite ki lo nou zepol konman bann Manm Lasanble pou dir avek Gouvernman, la, la, nou'n donn zot sa larzan, depans li byen. Pa gaspiye. Pa taye pou fer politik avek. Pa donn dimoun ki pa merite.

Servi li byen. Annou fer nou pei bouze pour ki dan 5an ler LDS a retourn o pouvwar nou a kapab donn zot sa pei dan menm sityasyon ki nou ti pran avek zot an 2025. Mersi bokou Mr Speaker.

(APPLAUSE)

MR DEPUTY SPEAKER

Mersi Onorab Georges. Onorab Audrey Vidot?

HON AUDREY VIDOT

Mersi Mr Speaker. Bonn apre midi Mr Speaker. Tou Manm Onorab. Tou bann dimoun ki a lekout. E bonn apre midi spesyal pour zabitan Roche Caiman.

Mr Speaker, mon pou konmans kot Onorab Georges in fini. Felisitasyon LDS pour zot bon travay pou maltret pep Seselwa. Felisitasyon LDS pour pas sa dernyen 5an pou ganny peye pou ensilte Lopozisyon sa letan ki ti *United Seychelles*. Felisitasyon sa travay ki zot in fer diran sa dernyen 5an ki zot pe felisit zot lekor.

Mr Speaker, Onorab Georges son lentervansyon la apre midi in fer mwan – i fer mwan mazin serten kolek lo son kote latib. Espesyalman bann osi ki ti'n al Minis.

Enn parmi Minis Jean-François Ferrari. Mon rapel letan i ti ankor Manm Lasanble, letan bann letan makroekonomik dan distrik Roche Caiman kot *NSC Hall* kot i ti dir kot si Seselwa pa zanmen konpran, i pou al plant bannann laba dan Lafrik.

Me apre sa ki nou ti vwar. Letan LDS ti ranport eleksyon

2020, Minis Ferrari ti aparet dan enn bann *videos* kot i ti promot bon travay ansyen ladministrasyon *as if* ti son ladministrasyon ki'n – oubyen li a sa letan ek son lekip ki ti lager pour makroekonomik. San realize poudir Seselwa i ankor rapel byen kantite kritik ki zot ti fer. Sanmenm sa ki apel ler ou kras anler sa, apre i tonm lo ou.

Mr Speaker, ler sa menm Onorab mon rapel osi tou ti dir “toultan koud ou lenz dapre ou latwal ki ou annan”. Sanmenm sa, sa bann zoli parol Onorab Georges, atraver ou Mr Speaker, kot ler nou dir pou fer bann zoli parol letan ou servi – fer li plis avek mwens. Fer plis avek mwens. *LDS* ki ti kontan servi.

Zot pa realize parfwa kantite keksoz ki zot prese i retourn lo zot. Nou pe koz lo respe. Wi nou donn respe Mosyon ki Onorab Lemiel in anmennen, ki wi nou devwar koman Manm Lasanble pour nou debat e dir rezon ki nou bezwen aprouv sa depans ki Gouvernman in fer e sipor kote pou rod larzan pou aziste pou kapab kouver depans.

Me ler nou pe koz tou respe, nou pe koz lo zistis. Atraver ou ankor enn fwa Mr Speaker, mon le adres serten Manm lo kote *LDS* ki'n entervenir depi bomaten.

Ler ou tann en Onorab pour li son parkour ki in fer 5an dan en parti mazorite i pou rod tou sort pou denigre karakter Prezidan aktyel ozordi, san realize poudir byensir i bezwen respekte *Standing Order*. Me ouver laport pour ou koz lo promosyon pou donn dalon, pou donn galan.

Be si zot le ouver sa laport, zot a bezwen realize poudir zot pe bezwen kapab debout for pou kapab ferm li. Akoz i en laport ki Onorab pa pou kapab fermen si i le Manm i antre ladan.

Mon konnen poudir zot ti konplent poudir nou pa latak personnel. Be si nou pa oule sa latak personnel, nou bezwen annan serten respe.

Ler zenn Onorab pe pres elimin vanzans. Annou aret annan vanzans. Selman sa menm Onorab, atraver ou ankor Mr Speaker, mon le adres lo Onorab Naidu, kot i pe adres zenn profesyonnel konman resiklaz. Resiklaz akoz in ganny en promosyon anba Ladministrasyon *United Seychelles*.

Zot koz viktimizasyon. Be *LDS* i bliye kantite endividi profesyonnel ki'n dan Gouvernman Ladministrasyon Prezidan Faure ki ler zot ti antre 2020. En kantite in perdi zot plas travay. E en kantite in ganny martirize

letan zot in antre dan en lot pozisyon louvraz pour zot kapab tenir.

I annan in manz son douler an silans. E ozordi ler nou war en profesyonnel i ganny en sans baze lo son kapasite e lo son abilite, nou dir li resiklaz?

Be Prezidan Herminie dan son bann nominasyon la i annan zofisye Gouvernman ki ti anba son ladministrasyon ki'n garde. Pa vedir partaz menm lopinyon politik avek nou isi lo sa kote latab.

Me in gard li aköz son nivo kapasite, son abilite, i donn li en sans pour li travay, pour li kontinyen. Si i bezwen annan rotasyon i annan sanzman, i arive, en lot laport i ouver, en lot loportinite. Mon pa vwar aköz ki nou bezwen denigre en profesyonnel koumsa.

Mr Speaker, pe dir pou pran kredi. Kredi lo travay dimoun. Travayer *LDS*. Plen fwa mon'n tann dan mon parkour la dan sa Lasanble Nasyonal ler mon'n swiv politik, in annan kritik lo ansyen *Ladministrasyon United Seyhelles*.

Be nou'n batir konblaz nou. Nou'n fer konblaz. Nou'n batir devlopman. I normal pour en lot Gouvernman ki vini i kontiny travay, kot i vwar i bezwen fer serten renovasyon i fer pour li annan kontinite. Si

i bezwen kontiny en proze ki in konmanse. Si in annan serten travay avanse lo la pou fer li fini. I totalman normal.

Konbyen riban Prezidan Ramkalawan in koupe ki anba proze Prezidan Faure ti ganny fer? Ozordi zis en riban in koupe, nou pe sot anler. Pa ankor la pou sote. I annan ankor 5 an pour nou ale. E nou pa pou zis koup riban kontinite nou. Nou pou vin koup riban travay nouvo ki *Ladministrasyon United Seyhelles* pe vin fer.

Nou pe koz i normal pou annan kontinite, wi, nou bezwen annan kontinite pour nou kapab war progre. E kot i byen, nou bezwen dir i byen. E kot i mal nou bezwen dir i mal, pour nou asire ki *ladministrasyon* dizour ozordi i fer sir i pa repet menm fot e boner kot i war i annan loportinite. Pou aranze i aranze.

E atraver Mosyon ki Onorab Lemiel in anmennen, dan bann depans ki pou ganny fer. Kot nou war poudir *IECD* byensir, finansman adisyonnèl pour bann *childminders* ki'n, pour rezon lo logmantasyon dan saler avek serten lazisteman lo lakantite *childminders* ki'n annan. I normal pou annan en logmantasyon. Pa ti'n prevwar. Bezwen annan azisteman. I

benefisye. Mon pa pe vin zis kritike.

Ler i annan nou pe koz lo bann antite ki bezwen resours, Lasanble Nasyonal, Zidisyer. Dan sa adisyonnèl i annan larzan adisyonnèl ki bezwen ganny adrese. Napa naryen mal. Mon pa pe kritike.

I bann – bann landrwa kot nou santi i annan landrwa ti merit sipor, i merit annan zouti travay pou sa bann lenstitisyon kapab delivre.

Me byensir parey mon'n dir, kot i annan defi nou bezwen adres defi. E nou bezwen anpese ki i repete.

Par egzanp ler mon bann koleg pe koz lo kantite *post* ki'n ganny dir in *delay in recruitment*. I annan en kantite *vacant post* ki pa'n kapab pran.

Mwan mon krwar e mon ti deza dir i annan en mank kordinasyon diran sa dernyen 5an kot bann diferan antite, tel parey Minister Lanplwa, Departman Lazenès. Lo kote bann Lazans Lanplwa, e osi Minister Ledikasyon ti'n mank kordinasyon pou ki nou kapab adres sa *issue* mank lanplwa tre boner. Adres bann defayans ki'n annan.

Mwan mon rapel koman en Manm mon'n anmenn kekyon la pou Minis Valentin pou reponn la lo size *TVET*, ki mannyer nou kapab vwar pour Gouvernman aranze pour ki

sa Minister i ganny sipor neser pour ki bann etidyan ki swa dan *S4*, *S5* ki pa a war li i pare pou reste *full time* dan lekòl, me i aprann en luvraz i ed li pour li *build* serten *skills*.

E Minis Valentin ti fran avek mwan pou dir ti annan bann defayans. Me ki mon vwar la anba sa Bidze - sa Mosyon ki la? Letan nou'n al lo bann detay bann depans, nou vwar poudir i annan larzan ki *Grant* ki pa'n kapab ganny servi anba *capacity building*.

Ki nou vwar poudir ti annan landrwa, *ok*, pour lo kote rezon pe get lo sityasyon fiskal lo kote Finans lo deviz. Me zot ti kapab fer le neser ki annan *at least capacity building* pour sa group etidyan kapab devlop zot.

Me fer li en pli pti ki i pou kapab *at least* omwen i annan zenn ki ti kapab ganny touse, ki ti a war li ganny en sans loportinite pli tar pour li antre dan en lanplwa koman i fini son *S4* avek *S5*. Me i en loportinite perdi.

Eski i responsab anba ladministrasyon poudir zot in byen travay *LDS*? Non, ti annan lespas pou amelyore.

Letan nou regard Anti-Koripsyon. I annan enn mon koleg bomaten in koz lo la. Si i annan en parti politik ki'n donn zot sipor depi *way back*, kantite larzan ki'n aprouve. Me en serten moman nou ti dir

non. Nou bezwen war en pe valer. Nou pa kapab zis depans larzan. Wi nou le war si i annan dimoun ki pe fer koripsyon. I annan antite ki pe fer koripsyon i bezwen ganny dil avek.

Me pa zis war nou pe depans larzan Leta avek etranze, me nou pa pe war rezilta. Nou pe kontinyelman war *ongoing projects*. Be selman nou pa pe war – nou pa pe war sa kantite milyon ki nou pe depanse. Oli rezilta? Lekel ki pe ganny kondannen? Lekel ki pe rann Leta sa bann larzan? Nou le war, nou le war aksyon.

En ladministrasyon ozordi i bezwen valoriz pwennvi ki nou Manm Lasanble nou pe mete lo sa bann *issues*, aköz nou anvi war valer pour nou larzan.

Nou pe koz lo bann Seselwa ordiner. Ler in dir Seselwa, wi nou annan en bon kantite rezerv. Manm lo nou kote latab in fer resorti bann defi ki nou sitwayen in pas atraver.

Mwan dan mon distrik diran sa dernyen 5an, kantite dimoun in pas dan difikilte. I annan ki'n anvi aranz son proze lakaz kot son paran, i pa kapab. Finansyerman in war li i pa kapab.

I ti kapab ale benefisye anba serten *scheme* ki pou dan sa enn ki – la mon war

poudir in annan serten *budget cut*. I annan ki anvi fer, me rezon finansyel pa permet li pour li kapab pran sa pour li benefisye anba sa bann *scheme*. Kantite pansyoner ki'n anvi aranz kot li, me mwayen pa kapab permet li pour li kapab aranze?

Konbyen fwa mon'n koze dan sa Lasanble dan 7enm kot mon'n dir i annan dimoun pansyoner pe rod sipor?

Anba *Vulnerable Scheme* i pran sepa konbyen letan. I annan ziskan ozordi i ankor pe trennen pa ankor kapab adrese. Me selman ankor, nou vwar ki i annan *budget cut*. Savedir i montre ou i annan serten defayans lo fason ganny akse avek serten *funding* e Seselwa ti napa larzan.

Seselwa ti pe regard son vant avan. Wi i anvi anpes delo koul lo son latet. Wi i konsernen pour li pa war li pe al depans plis pou *renovate* son lakour. Me i ti pe regard son vant. Son bouse manze.

E mon konnen *LDS* zot annan en labitid pri dan zot ta mansonz. Zot dir en keksoz apre zot – konmsi Onorab Woodcock li menm “i manz son bannann, i anvoy lapo lo son kanmarad”. Be pa Gouvernman *United Seychelles* ki ti promet pansyoner R10mil.

Si ozordi Prezidan Herminie in dir atraver son

scheme a son fason, ki i war i pou kapab permet li donn sa R10mil, i pe fer li akòz Ladministrasyon LDS pa'n kapab fer li.

Zot in met sitan promes avek pep Seselwa, se pour sa rezon ki ou war ozordi la, Seselwa in fer sir ti *vote* byen. In montre zot poudir –

MR DEPUTY SPEAKER

Onorab, ou annan zis en minit.

HON AUDREY VIDOT

I bezwen dimoun ki pou kapab defann li. Mon pa pou – mon ava konklir pour rezon letan Mr Speaker, par dir ki avan ler LDS zot zis vini vin kritik lo *United Seychelles* isi laba, mazin byen. Annou get dan nou lanrmwar byen.

Kritik i byen, wi. I byen nou'n kritike. Me osi nou propoze. Parey zot dir. Toultan zot menm zot ki ti kontan dir sa. Me nou fer li byen.

Zis parey mon'n fer la, se ki nou'n dir kote nou vwar i annan keksoz ki bon, ki nou bezwen vwar ki mannyer nou kapab adres li pou fer li pli byen.

Me kot nou war poudir i annan defayans, nou bezwen asire ki nou bann lezot *mid-year review* ki pou vin devan nou Lasanble. Wi Onorab Georges, i pou vini.

Me nou lo sa kote lata si nou vwar i annan konsern ki nou bezwen adrese lo nou Gouvernman, nou, nou pa pou per pour nou fer li, kontrerman avek lafason ki mannyer zot, zot ti fer ler zot ti an mazorite. Mersi Mr Speaker.

(APPLAUSE)

MR DEPUTY SPEAKER

Mersi Onorab Vidot. A donn laparol Onorab Roucou.

HON MICHEL ROUCOU

Mersi Mr Deputy Speaker. Bonn apre midi tou Manm piblik ki pe ekout nou. Espesyalman zabitan dan mon zoli distrik Mont Fleuri.

Mr Speaker, annefe ler mon'n asize mon'n ekout Onorab Vidot pe koze, i annan en keksoz ki'n vin dan mon latet. Ou konnen, bann US toultan zot annan en metod zot. Toultan zot dir ou poudir LDS nou, nou pa konn koz ek dimoun. Nou sovaz, nou isi, nou abriti sepa kwa.

Problenm avek US, se ki nou, nou pa abriti nou. Nou pa sovaz nou dan LDS nou. Problenm se ki ler zot vini zot dir nou en keksoz la, definitivman nou pou bezwen annan en larepons pour nou rann zot. E ler nou, nou rann zot en larepons, zot pran nou

konmsi ki nou, nou brit, nou pa konn koz ek dimoun.

E sa i en keksoz ki nou war ki *US* toultan i pe repete konmsi ou a krwar konmsi i pe sey fer krwar ek dimoun poudir nou dan *LDS* la, be nou'n *win*. Laplipar nou lo kote sa latab la, en bon pe nou nou'n *win* en eleksyon. Be savedir nou kapab koz ek nou manm piblik la deor.

Mr Speaker, annefe depi bomaten mon'n asize mon ekout en pti pe bann largiman ki'n ganny leve lo Mosyon anmennen par *Leader of Government* *Business* Madanm Lemiel. Onorab Lemiel, annefe.

Ou konnen, parfwa parey Onorab Georges in dir oparavan, i annan bokou keksoz ki Gouvernman *LDS* dan sa 5an ki'n pase la in akonplir, ki'n rann lavi bokou nou sitwayen ere. Nou'n war bokou proze ki'n benefisye lakominote oubyen serten endividi li menm li.

Zis en konparezon Mr Speaker, si nou pou pas dan ou distrik menm Port Glaud, i ti annan sa problem kot bokou bann motoris ti pe konplent aköz ler i annan gro laroul i bat lo semen.

E nou'n war poudir avek travay ki'n anmennen, bann pwen ou menm ou ou'n anmenn dan Lasanble Gouvernman - bann letan

Gouvernman *LDS* ti la, in kapab ganny adrese li menm li.

E proze lakaz dan distrik Port Glaud mon'n war, redevlopman bann lakaz li menm li ler nou pou desann Grand Anse, Mahe.

Annefe Gouvernman *LDS* la ti'n prononse ki ti pou annan bokou plis lakaz ki ti pou al fer dan distrik Grand Anse, Mahe la ki ti'n ganny bidzete, ki ti pou benefisye mon mazine ti pou annan dimoun dan mon distrik. Dan laplipar distrik.

Savedir i montre ou poudir i annan bann proze ki Gouvernman *LDS* li menm li in fer ki annan pozitivite. I pa vedir ki Gouvernman *LDS* in la dan sa dernyen 5an napa naryen ki'n ganny fer.

Mr Speaker, an 2020 ler Gouvernman *LDS* ti vin o pouvwar, nou ti antre nou dan en letan vreman difisil. *COVID* ti'n tap nou pei. Partou ti'n fermen, biznes. Laplipar biznes pa ti pe fonksyonnen. I annan biznes menm ki ti bezwen fermen aköz sityasyon ki ti ladan.

E nou'n war pour 2an Gouvernman *LDS* in travay, in vaksin nou pep la. Erport in ouver kot nou'n war lekonomi in konmans rekipere. E menm an 2020 ler nou ti antre ti annan bokou lanons ki Gouvernman *US* sa letan ti'n

anonse lo kote koupman saler li menm li. Trezyenm mwan saler ki ti pe konmans antre lo sa sistenm pou gete pou li menm li. E lezot bann lezot keksoz ki zot ti anonse.

E nou'n war poudir ler Gouvernman *LDS* in antre, in annan bokou amelyorasyon. Mon pa pe dir poudir napa naryen oparavan ki ti'n ganny – pa'n ganny fer. Be selman in annan sa kontinite ler Gouvernman *LDS* in vini.

Be selman nou, nou Gouvernman sa letan in vin zwenn pei dan en leta vreman difisil akòz *COVID*. E pour 3an – 2an nou'n lager avek *COVID*. E zis pour 3an get sa kantite proze ki'n ganny fer li menm li. E ler nou pe koz lo kote larzan dan pos Seselwa, zis mon ava donn ou detrwa legzanp.

Gouvernman *LDS* apre plizyer lannen in kapab revwar en pti pe bann *scheme* atraver *HFC*, kouver pour *reroofing* pour bann trwazyenm az.

Lo kote bann *loan* ki bann dimoun in gannye pou fer zot lakaz, atraver *ASP* ankor. Laplipar bann *scheme* ki'n la ki ti'n tenir lo en serten pri pour en serten kantite letan. E in ganny revwar.

Savedir i annan travay ki ti'n ganny fer Mr Speaker, pou vwar en pti pe dan pos pep Seselwa. Selman nou ti pe fer li dan en fason ki petet ti pou ed plis dimoun pour zot kapab

pran en pti pe sa responsabilite li menm li.

E atraver *PUC*, ti annan sa lanons kot tou bann dimoun ki vilnerab pour zot kapab ganny en redwir. Selman, sa ti pou pas atraver zot *Bill*. Be selman pa bokou dimoun ki ti al devan. Savedir i montre ou Mr Speaker, ki i annan sa travay ki Ladministrasyon *LDS* in fer.

Me selman parey Onorab Georges in dir, petet fason fer avek Gouvernman *US* e Gouvernman *LDS* ki mannyer nou nou'n fer. Nou nou'n fer li dan en fason ki petet pou montre Lepep Seselwa poudir nou pe mazine poudir apre ki nou'n pas dan sa *COVID*, nou bezwen get keksoz en pti pe pli lwen.

Pa akòz ki ozordi nou annan nou en kof ki, parey tou dimoun pe dir kof i plen i annan larzan. Be sa larzan i pou fini en zour si nou pa rod en fason avek en fason en pti pe pli responsab pour nou kapab anmas larzan, ki demen si i ariv okenn evantyalite dan pei.

Akòz parey bokou dimoun i konnen poudir se ki nou depan bokou lo bann keksoz ki sorti dan bann lezot pei. E si i arive demen parey nou'n war kot i annan lager ki tanzantan ou tann pe leve dan diferan pei kot nou, nou menm nou ek bann problemm pirat li

menm li. Ki mannyer nou pou ete si vreman nou'n zis depans larzan dan en fason iresponsab?

E sa en pti pe bann pwen ki nou toultan nou'n fer sa refleksyon. Akoz COVID in donn nou en lesan ki nou'n war poudir se ki nou ti menm pe war nou kot nou ti pe bezwen al dan rezerv pour en serten kantite larzan.

Gouverner Labank Santral tanzantan ti pe monte ti pe donn bann leksplikasyon. Si keksoz pa amelyore, ki pou arive avek pei? *So on, so on.* E nou sa bann pwen ki nou, nou ti pe dir ek Lepep Seselwa.

Ozordi i gou. I parey en fanmir ki annan en Bidze kot son lakour. I pa mazin zis ozordi lafen dimwan i ganny peye, i donn bal, diverti kontan. I bezwen mazine poudir demen i arive kot i ariv en maler, mon zanfandouswa kek dimoun i bezwen kek keksoz ki pou dan bann fanmir.

E nou sa i en pti pe bann keksoz ledikasyon ki nou, nou bezwen edik nou pep deor. E nou, nou pe demann avek Gouvernman US ozordi la poudir, wi zot pe donner. Parey zot in dir, met larzan dan pos Seselwa. Be selman annou edik sa pep an menm tan.

Annou edik zot poudir, gete, ozordi nou'n donn zot,

zot bezwen vin avek en serten responsabilite. Pa akoz ki Gouvernman ozordi pe vini pe donn ou, ki apreze ou apreze ou pa pran ou bout responsabilite. Nou bezwen edik zot.

Annou zis pa vini dir - fer krwar ek Lepep Seselwa li menm li poudir Gouvernman nenport ki ler akoz kof i plen, zis nou pou vini nou pou donn zot. I annan en lot fason ki nou pou bezwen rod en fason pou anmas larzan.

Zis en legzanp Mr Speaker, Gouvernman in fer prononsman lo kote SPTC li menm li, R14 pou desann pou vin R6.

Be Gouvernman i bezwen eksplik sa pep kote i pou gannye sa larzan ki pou ranplas sa larzan ki i pou tire lo sa R14 ki pou soutenir bann dimoun ki pe vin dan zot pos. Definitivman mon war i pou vin atraver *taxpayers' money* li menm li.

E bann larestan lanons ankor ki pe anonse. La parey la Mr Speaker, lo kote bann nouvo *post* ki'n ganny kree.

En SS mon'n aprann poudir i pe tous apepre dan son 77mil ou R86mil. En PS i tous li apepre dan son 47mil ou 92mil. En direkter zeneral 32mil ziskan mon mazine ziskan 56mil, sa ki mwan mon'n gannye.

I bann ledikasyon ki nou bezwen edik pep deor. E osi pa zis akòz ki nou annan larzan ki aprezan nou pou zis vini fer faver nou dalon, ouswa nou siporter li menm li. Nou bezwen fer sir ki nou annan en Gouvernman ki ozordi i responsab.

Akòz demen, pa krwar poudir sa ki'n arive ek LDS, i pa pou ariv zis ek LDS sa. I pou ariv ek nenport ki parti politik demen i vin o pouvwar. Akòz, parey in ganny dir oparavan, se ki Lepep li menm li ki annan pouvwar dan son lanmen.

E nou, nou bezwen fer sir ki demen avek okenn evantyalite ki arive, pei i kapab li menm li debout lo son lipye, dan plas nou pou war nou dan en nenport ki sityasyon.

Mr Speaker, nou'n koz lo *carer*. Nou pe dir poudir, *arh* Gouvernman, sepa nou ti pas nou letan zis nou'n maltret *carer*. Zis mon a dir ou ki Gouvernman in fer pour *carer*.

En *carer* oparavan i ti zis en dimoun ki vini i vin kot en lakour i fer en louveraz pour en serten kantite erdtan, apre i al se li. Sa *carer* pa ti kapab pran son konze, pa ti kapab ganny en *loan* avek labank.

Ozordi en *carer* in vin parey en – in nenport ki louveraz, sa *carer* i kapab pran son koze. Demen i kapab al kot en labank ganny li en *loan*.

Oparavan i pa ti kapab fer sa Mr Speaker.

E ler Gouvernman LDS ti vini Mr Speaker, ti annan 2 *cohort* bann zenn etidyan ki ti al *course*. E sa ti montre ou poudir Gouvernman LDS malgre ki nou ti ganny pei sa letan, dan en letan difisil, be selman nou ti annan serten travay ki ti ganny fer responsab li menm li, pou fer sir poudir pei bann zenn i ganny gete ek lezot ankòr bann dimoun, fer sir poudir Seselwa pe ganny son saler.

E pa bliye nou'n ganny dir par en serten Onorab poudir i annan en ta biznes, pti biznes ki ti bezwen fermen.

Mr Speaker, toulezour dan pei Gouvernman US ti la, i annan biznes ki'n bezwen fermen. Ou war? I pa is akòz Gouvernman LDS. E mon garanti ou dan sa Gouvernman ki la i pou annan biznes ki pou bezwen fermen si petet zot pa pe perform byen. Ou war?

E nou, nou pa kapab ozordi – mon dakor nou pe fer politik. Me selman nou pa kapab fer sa dimoun krwar poudir Gouvernman i la, nou pou kapab sov tou dimoun, akòz i annan larzan dan kof.

Non. Gouvernman i la, fer sir pei i stabilize. Pei pe fonksyonnen normal. E ou konman en sitwayen ou osi ou bezwen ou annan ou par ki ou

pe zwe pour ou kapab kontribye.

E ozordi Mr Speaker, ler ou get lekonomi Sesel, ozordi nou'n tann bokou bann Minis in dir. Minis Finans in dir. E nou'n tann Minis Faure li menm li in koz lo bann proze dan lepase. E nou fek tann Minis Ledikasyon lo kote Lekol La Digue ki'n dir sa i en bon proze.

Savedir i montre ou poudir Gouvernman LDS pour 5an, malgre ki zot pe dir poudir Gouvernman pa'n travay. Be selman nou'n tande atraver bann Minis ki fek vini la poudir ban keksoz ki sa Gouvernman in fer pour sa 5an i bon. Ok. E nou, nou bezwen aprezan zis annou aret koz mansonz ek bann dimoun deor pou fer zot krwar.

E la Mr Speaker, zis parey proze Assumption, nou pou tann, nou pou tande byento la. Proze pou kontinyen li, malgre ki nou'n tande proze pou arete. Proze pou ganny *stop notice*. *Stop notice* in donner, be selman la ou pa ankor tann naryen la.

Nou pou tande byento, proze pou kontinyen, aköz Gouvernman LDS in fer keksoz drwat e nou war poudir nou pe fer keksoz ki pou benefis nou pei li menm li pou anmenn reveni. E –

MR DEPUTY SPEAKER

En minit Onorab.

HON MICHEL ROUCOU

Mersi Mr Speaker. E ozordi Mr Speaker, dapre mon ganny en konpran poudir i annan laplipar bann proze dan distrik ki'n ganny dir met lo *hold*.

Sa bann proze i benefisye nou bann zabitan li menm li. La parey dan mon distrik mon annan proze semen. E la nou annan proze Corgat Estate 32 *unit*. Mon pe swete ki nou proze i ava kontinyen.

E nou annan en proze *parking* anler ki nou ankor pe esper PS Barbe *by the way*, i pa ankor dir nou naryen lo la, ki pou benefisye mazorite en gran group zabitan dan sou distrik Fore Nwanr.

E mwan Mr Speaker, mon pwen ki mon anvi pase avan ki mon terminen, se ki Gouvernman LDS malgre bann defi ki zot in ganny dir poudir in fer sa Gouvernman LDS pa ti parfe.

Me selman, Gouvernman LDS i en Gouvernman ki'n delivre. E laprev i la li menm li. Bokou dimoun in benefisye. Swa endividuelman. Swa bann kominote.

E nou'n vwar bokou devlopman tou dernyerman dan sa pei. E i annan bokou Seselwa ki'n war poudir in annan sa benefis ki'n benefisye zot, zis parey

breakfast kot bann lekol li menm li ki pou tous nou bann zenn marmay ki zot paran pe lev granmaten pou anmenn zot lekol.

Mr Speaker, mon dir ou mersi ki ou'n port mwan sa moman letan pour mwan kapab pas enn de bann pwen. E nou ava gete ki mannyer bann keksoz pou ale e bann larestan largiman ki pou vin avek. Mersi.

MR DEPUTY SPEAKER

Mersi Onorab Roucou. Nou a donn laparol Onorab Clarisse.

HON DENISE CLARISSE

Mersi Mr Speaker. Deputy Speaker, bonn apre midi koleg Onorab e bonn apre midi tou dimoun ki a lekout, spesyalman bann dimoun Bel Ombre.

Mr Deputy Speaker, depi bomaten bann lentervansyon e Loter Mosyon Onorab Lemiel, *LGB* in site dan son – atraver ou Deputy Speaker, in site dan son remark ki premye 6mwan lekonmi pei in perform plis ki ti pe ganny ekspekte.

Savedir i montre ou ki in annan keksoz byen e ki *LDS* in fer. I pa'n annan. I leka. E sa nou bezwen fer lakseptans. Me parkont letan bann Onorab lo kote *US* in pran zot lentervansyon, i annan bann mo parey zot pe servi “ilizyon”.

E pour mwan sa letan mon ekout sa, parey Onorab Bernard Georges in dir, i annan en portre ki pe ganny penn la, kot zot pe koz bokou lo sa ki napa. Me plito lo sa ki'n annan. Akoz si zot koz lo sa ki annan, zot pou fer lakseptans poudir wi, *LDS* konman en parti e konman en Gouvernman in delivre.

E i annan bokou lentervansyon ankor ki'n ganny koz lo la, notaman atraver ou Deputy Speaker, ki Onorab Robert David avek Onorab Toussaint in koz lo rekritman.

Rekritman i enn bann rezon akoz zot pe vwar ki annan bokou larzan ki zot pe dir pe ganny koupe ki zot pe demann sa Bidze Siplemanter. E i annan bokou ki'n koupe akoz sa rezon.

Me en keksoz ki nou pa pe realize parey nou'n dir, travay i vin avek konpetans. E wi nou Seselwa i annan, me selman i malere i annan bann pozisyon ki pa pe ganny ranpli.

E sa i anmenn mwan avek mon pwen ki Onorab Audrey Vidot in fer ki mon pou dakor ek li lo sa kote, ki i annan en kordinasyon ki ganny manke.

Ler nou dir mank travay, Minister Lanplwa i pa zis neserman dan letan kot Ladministrasyon *LDS* in la.

Zot in fer bann bokou *job fair*. Me eski statistik e eski data i enn ki ganny analize apre sa bann *job fair*?

Rezon mon dir sa aköz pandan sa bann *job fair* i annan bokou dimoun ki vin fer laplikasyon. Bokou Minister. Bokou departman prive i fer bann *advertisement*.

Me eski bann laplikasyon ki ganny fer i pe ganny vwar, i pe ganny get zot *status*? Eski sa bann lenstitisyon pe ganny telefonnen, pe ganny demande ki *status* sa bann pozisyon?

Akoz souvandfwa nou vwar ki i pli fasil petet pour nou zis vini. Nou pe dir ki sa bann plas pa'n ganny manke. Nou pe penn en lenpresyon ki zos sa bann louvraz pa anvi ganny mete.

Ouswa sa bann dimoun ki avans devan ki fer laplikasyon osi sa bann lenstitisyon, sirtou lo kote Gouvernman.

Eski sa bann departman neseler zot pe *acknowledge*? Aköz bokou konplent la deor se letan en dimoun i vini in fer en laplikasyon travay. I pe dir ou i pe espere i pa ganny larepons.

So par ler souvandfwa i demann bokou nou menm dan nou konman endividi ki annan ki desarz sa bann responsabilite a latet parey nou pe dir, bann *HR Division* or *Department* ki bezwen

kapab arive *acknowledge* sa bann laplikasyon.

Onorab Gabriel i en lot Onorab, atraver ou Deputy Speaker, in fer resorti letan i byen, nou bezwen rekonnet. Me i malere ankor letan bann deliberasyon in ganny met ater. Nou pa'n vwar, nou pa'n tande sa bann lakseptans.

Parey Onorab Audrey Vidot in fer sorti serten detrwa. Me i vreman minim, aköz zot rekouver ankor. Parey in ganny dir, *LDS* pa pe neserman pe byen fer.

Me parkont mon pou aksepte, rekonnet ki nenport ki ladministrasyon ki pou vin la, wi, i annan keksoz byen. E kot i mal nou pou bezwen aranze.

Me parkont sa portre ki *LDS* i ganny mete ladan se ki ou a krwar i vreman dan sonm kot ki annan byen ki'n ganny fer. Me selman nou bezwen aksepte.

Onorab Grandcourt, atraver ou Deputy Speaker, i pe dir ki personn pa pou ganny kite deryer avek *US*. Me i domaz menm avan zot 100 zour i annan bokou travayer deza ki'n fini ganny met ater.

E sa i demann kestyon, ki mannyer nou pou bouze devan? E par rapor avek Bidze referans, depans ki pou annan avek bann nouvo *post* sirtou ki nou war pe ganny anmennen. E pour nou parey nou pe dir,

nou pou zis vwar e gete ki mannyer i ale.

Proze kapital, nou pe vwar i annan bokou dan Bidze ki'n ganny koupe, par rapor avek – i annan bann retar ouswa bann proze ki pa pe ganny materyalize. Me nou bezwen aksepte ki *LDS* in delivre Mr Speaker, malgre zot pe dir ki napa okenn – zot pa pe vwar bann devlopman lo kote distrik.

Bel Ombre i en distrik ki definitivman i benefisye. E wi mon pou dir i annan ankor pou fer an term proze kapital. Wi nou pou met lanfaz lo la.

I malere letan nou tann i annan Manm Onorab parey nou pe dir, zot donn sa lenpresyon ki naryen pa'n ganny fer dan zot distrik. Ankor parey in ganny demande boner, en lalimyer, en proze drenaz, eski sa i pa en keksoz ki nou pou dir nou valorize?

Akoz nou pe fer keksoz pour nou pep, pour nou dimoun. Donk si ou pe omit pou aksepte ki i annan keksoz ki'n fer, eski nou pa pe defye Seselwa sa posibilite pour li zourir sa ki in arive kapab gannnen la dan letan ki *LDS* li menm li i ti dan ladministrasyon?

Nou pe koz lo proze parey i ti'n ganny dir inisyalman, kot i annan ki ti pe dir pa fer proze kapital. Pa bezwen investir

dan proze kapital. Me lefe i reste ti nesese annan proze kapital, sirtou parey bann proze lakaz. Menm si parey zot pe dir ki i annan ki pa ankor ganny fer pour plizyer rezon.

Akoz sa madanm ki'n arive kapab zourir en lakle lakaz pandan sa letan ladministrasyon *LDS*, la mon zis doute e demande si sa ki pa ankor gannnen ouswa ki'n ganny son let an prensip pou ganny lakaz, i pou arive kapab zourir, aköz otomatikman in ganny dir met *on hold* tou bann let ki'n fini ganny donnen an term lakaz avek later.

Sa i bann refleksyon ki nou devret anmennen. E nou bezwen fer lakseptans ki parey in ganny dir, ledikasyon ek responsabilite i reste labaz lo ki *LDS* i bouz son prensip lo la.

Akoz *US* i le penn en portre avek nou pep Seselwa kot i anvi dir, i *ok* pour ou pa *ok*. Nou la pou donn ou. Me ki *LDS* i anvi fer Seselwa konpran? I *ok* pour ou pa *ok*. Me nou kapab ed ou e osi donn ou sa responsabilite ki mannyer ou menm ou kapab arive gannnen.

Me i malere parey nou pe dir dan sa kourt dele letan pep Seselwa la deor pe pran letan – i pou pran letan pou asimil sa. Akoz *LDS* in o pouvwar zis 5an.

E nou pe koz 43an kot nou'n anmenn sa depandans dan lespri nou dimoun e *we need to change the mindset*. Me ankòr parey in dir, 50poursan nou popilasyon Seselwa la deor atraver eleksyon zot pe konsyans sa.

Akoz si toultan nou pe fer dimoun la deor fasil konpran, i fasil pour ou ganny R5. Me akòz nou pa kapab edik nou pep poudir ou kapab ganny plis ki R5. Ou kapab ganny plis atraver ledikasyon.

I parey toultan mon kontan dir, nou en lakour dan en fanmir, nou menm nou, nou konsyan konbyen i pran pour nou met en lasyet manze lo latab. E Gouvernman osi i parey. Konbyen i pran Gouvernman pou fer antre selman en *container* dan pei.

I bann ledikasyon ki nou konman sa Ladministrasyon LDS pandan sa bann lannen nou'n anmenn avek pep Seselwa. Me ankòr parey mon dir, Seselwa in mazin ki fason pli vit i kapab arive gannye.

Me selman nou annan 5an devan nou pour nou vwar ki kantite pli vit zot kapab gannye e ki kantite dezapwentman ki vin avek sa gannye ki mon konnen i kapab ariv pa gannye.

Atraver ou Deputy Speaker, Onorab Gerry Sopha in dir ki pa demann kestyon

kot pou ganny larzan pou pey bann PS e bann lezot lapwentman.

Me sa ki enportan note, i enportan pou demann kestyon akòz sa i montre latransparans. E si nou pa demann kestyon, ki mannyer nou arive asir nou pep Seselwa ki nou la deor nou pe annan en lavwa pour zot e nou pe asire ki tou bann zesyon i ganny fer dan en fason vreman apropiye.

Osi bann entervenans in koz lo bann lenfrastruktir ki zot montre dezapwentman plito ki lapresyasyon. Me mwan mon anvi asir, atraver ou Deputy Speaker, mon anvi asir Onorab Toussaint ki Anse Boileau in ganny touse konman en distrik parey tou lezot distrik, letan i koz lo bann landrwa i donn legzanp Sant Kominoter.

Parey nou dir, pa tou keksoz ki nou kapab ganny en sel kou. Tou bann *DA's Office* atraver Ladministrasyon LDS in ganny aranze. Aranze avek lespri pou amelyor servis ki ganny donner dan sa bann *DA's Office*.

Sant Kominoter i annan ki'n ganny touse, wi. Notaman parey Bel Ombre, parey Cascade i bann demann ki'n ganny fer depi ladministrasyon presedan.

Me LDS in war li nesese pour li fer sir ki bann

lenfrastruktir ki bann travayer i travay ladan, zot fer li dan konfor. Zot fer li avek tout liminite e zot kapab deservi zot louvraz pou asir nivo prodiktivite.

Pour mwan Mr Speaker, mon vwar i annan bokou – i annan koupir parey nou pe dir, dan Bidze. E si mon pran en legzanp, i annan R1.5milyon ki'n ganny koupe an relasyon avek lenplimantasyon Proze *Domestic Violence Shelter*, kot in ganny dir pou ganny revize.

Mon zis swete ki sa koupaz ki'n ganny mete, sa revè i pa ganny fer a lonterm. E osi i pa zis ganny mete dan en kwen aköz senpleman i en linisyativ ki LDS in met devan pandan son letan administrasyon.

Pour mwan Mr Speaker an konklizyon, se ki parey nou pe dir, nou bezwen aksepte ki LDS in delivre e LDS pou kontinyen fer li son manda pou kontinyen fer Lepep Seselwa konnen e konsyan ki 2020 ziska 2025 ti egziste.

Aküz US ankor pe sey tou zot posib atraver tenny tou sa lalimyer ki egziste ant 2020 ziska 2025 pou fer konpran ki naryen pa'n ganny fer. LDS pa'n delivre.

Malgre i annan Manm ki donn en lendikasyon ki keksoz in ganny fer, me zot pe portre sa lo en kote vreman minim.

Me nou, nou anvi refer Lepep Seselwa, espesyalman tou dimoun ki'n *vote* pour nou. E osi byen bann ki pe kontinyen zwenn nou pour zot konsyan e konnen ki LDS pou kontinyen reste sa lavwa e nou pou kontinyen reste pozitiv dan tou sa ki nou fer.

E mon swete ki a lafen dizour zot a konsyan ki ledikasyon ek responsabilite i bezwen primordyal. Kantmenm i pa pour zot konman adilt paran, me byensir pour nou zanfàn e zenerasyon ki pe monte. Mersi Mr Speaker.

(APPLAUSE)

MR DEPUTY SPEAKER

Mersi Onorab Clarisse. Nou a donn laparol Onorab Gill.

HON CHURCHILL GILL

Mersi Mr Speaker. Bonn apre midi tou Manm prezan e tou dimoun ki pe ekout nou.

Mr Speaker, sa Bidze Siplemanter, parey i ete, Minis in vini in donn en kontrandi byen detaye. E tou dimoun dan lasal ki ti santi zot le demann keštyon zot ti ganny loportinite pou demande e zot ti ganny zot bann leklersisman.

E ozordi deba mannyer pe ale, konmsi nou tou nou'n bliye poudir leksplikasyon ti vin donner lo tou keksoz. E

prezan nou tann – nou ganny dir ki *US* pe met blanm konmkwa *LDS* pa'n travay.

Nou bezwen konpran ki pa *US* ki'n met blanm lo *LDS*. Seselwa ki'n *vote LDS* an deor ladministrasyon. So nou pa kapab vini dir *US* ki'n vin met bann blanm. Akoz *US* depi 2020 ziska 2025 in fer son travay ki i devret fer.

E nou tou nou konnen la anndan ler Ladministrasyon *LDS* ti la, toultan ti annan sa konsern *service delivery*. Si parey Onorab Georges in dir apre midi nou onnet ek nou lekor, nou pou rapel byen, menm zot Prezidan ti vin la devan dan *SONA* ti dir i fatige. *Ok*.

So, *service delivery* i en konsern e i en konsern ki reel. E nou tou nou konn sa. E parey ou'n dir ou menm, Onorab Georges atraver Mr Speaker, se i annan bann serten keksoz ki ti sipoze ganny fer ki ti'n ganny bidzete pa'n ganny fer. I kler ki sa i relye *to certain extent, service delivery*.

E ler nou pe dir *service delivery* nou pa pe blanm bann teknisyen. Me selman kestyon ki nou devret demande, eski ti annan ase teknisyen pou delivre lo sa bann keksoz ki i ganny met dan Bidze?

Mazinen, *LDS* in la 5an. Premye lannen pa'n kapab

adrese. Dezyenm lannen pa'n kapab. Trwazyenm pa'n kapab. Katriyenm pa'n kapab. I kler ki ti annan en pe neglizans dan sa sans pour nou toultan annan sa kantite larzan ki reste, pa ganny depanse.

E *US* li dan son manifesto in fer kler. Apre ki in pas kot dimoun pandan 5an, in ekout byen sa ki devret ekoute e i kler Prezidan i konn tre byen ki fason i pou fer pour li adres sa bann problem.

E se pour sa rezon ki nou vwar nouvo apwentman. Si ou annan febles dan *service delivery*, ki mannyer ou pou amelyore si ou napa apwentman dimoun?

Akoz lefe i reste ki ler ou pa ti ankor *recruit* sa bann dimoun, pa'n kapab delivre. *LDS* osi in avoue poudir zot osi zot in annan problem dan *service delivery*.

So *alors* nou bezwen konpran poudir *US* li i vin ek son program e i pa pou bezwen *LDS* pou dir *US* ki mannyer pou fer.

I a kapab kestyonnen, me selman i pa pou kapab vini pou dir ki mannyer pou fer, parski i ti ganny sans depi 2020 ziska 2025 pou prouv son kapasite delivre. E nou tou nou konnen tou Seselwa i konnen ki'n arive avek rezilta e akoz ki ozordi nou'n sanz kote latatab.

Dan sa ka, nou devret ase onnet pour nou konpran poudir wi, i annan serten travay ki devret ganny fer pou kapab sirmont serten sa bann keksoz ki'n persiste pandan sa dernyen 5an.

Nou'n koz bokou lo *COVID*. Be avan eleksyon 2020, nou tou nou ti konnen *COVID* i la. Si nou'n partisip dan eleksyon, nou'n gannnen, nou bezwen prezan desarz nou responsabilite. Nou pa kapab vini vin konplent poudir, *arh* ti annan sa, ti annan sa, ti annan sa.

Natirelman ti annan sa, be sa i ti en keksoz mondyal. An menm tan, nou'n koz bokou lo lekonomi. Ler *LDS* in vini, napa nouvo. Toultan nou koz lo diversifye nou lekonomi.

Ler *LDS* in vini, menm keksoz ki'n la, sanmenm sa bann keksoz ki'n kapab amelyore anmezir dimoun – sa *COVID* in nepli kapab fer sa dega ki i pe fer. Touris ti *arrival* - ti amelyore. *Blue economy* ti amelyore. *Fisheries* ti amelyore. *Financial services*.

Sa bann keksoz la, depi avan 2020 ti la. I en striktir ki toultan in la. In toultan la e ler sa *COVID* ti pe diminyen, natirelman nenport ki Gouvernman ki ti la, sa keksoz ti pou *pick up*. Napa okenn keksoz ekstraordiner ki'n ganny fer ki ozordi nou pe koze konmkwa en gran – sa

lekonomi pa ti pou kapab re aziste, menm si ti annan en lot Gouvernman la.

Alors, mon krwar i kler ki tou sa bann keksoz nou bezwen konpran poudir i pa kapab en nouvo Gouvernman vini, fer keksoz menm parey ki sa enn ki'n *fail* pour sa enn Gouvernman swiv menm prensip.

I toutafe normal ki *US* i pou annan son program e i pou travay pour li realiz son program pou satisfere tou Seselwa. Mersi Mr Speaker.

(APPLAUSE)

MR DEPUTY SPEAKER

Mersi Onorab Gill. Mon pou donn laparol Onorab Tirant.

HON COLIN TIRANT

Bonn apre midi Mr Speaker. Bonn apre midi tou bann Manm, bann koleg Onorab. Bonn apre midi tou bann zabitan Glacis.

Mr Speaker, avan mon konmanse mon pou zis fer en pti *tour d'horizon* dan mon distrik. Ankor en fwa, mon ti a remersye Minis Ferrari ki'n permet tou nou bann peser ganny en *gear store* apre 20an ki nou'n espere nou pa'n ganny naryen.

Nou'n vwar ki dan mon distrik ti annan lalimyer ki'n ganny mete. Ti annan drenaz ki'n ganny fer. Ti annan *bus*

stop ki'n ganny fer. E mwan mon vremen apresye ki sa in ganny fer anba Ladministrasyon LDS.

E mon *very proud* pour mwan dir i annan ankor lezot distrik ki'n gannye sa bann keksoz anba Ladministrasyon LDS. Me selman ozordizour zot pe fer krwar poudir naryen pa'n ganny arive.

Mon pou koz en pti moman lo larzan dan pos Seselwa. Pandan nou letan dan Ladministrasyon, Gouvernman LDS in donn nou 17poursan logmantasyon.

Si nou fer en pti kalkil, petet ler nou ti ganny sa 10poursan, en dimoun ti ganny li R400. Apre sa 7poursan, in ganny li petet en R300. I fer li R700 dan son pos ki i anmenn kot lakour.

E nou'n al pli lwen ankor nou'n dir nou pou donn ou e nou pey ou *bill* en valer R300 tou le mwan, Ki sa i fer mil Roupie dan en pos en dimoun.

E bann paran ki annan zanfan ki al lekòl, nou'n donn zot *breakfast* pour naryen. Si nou kalkile, si nou annan zanfan, petet i pou kout nou apepre R200 par mwan. So ler nou azout tousala ansanm, i pou fer en valer R1200 dan nou pos.

Me eski Seselwa in kontan sa? Pa ditou. Akoz i pa'n kontan sa? Akoz i pa'n ariv direkteman dan zot

lanmen kot zot kapab fer sa depans zot menm.

Me nou konman en Ladministrasyon, nou'n pran sa desizyon pour nou fer sa bann keksoz e nou ti enplimant li, e nou ti war kote i pe anmenn nou pei.

Atraver ou Mr Speaker, Onorab David in koz lo bann etidyan ki sorti *graduate*. Pandan sa dernyen 3an i vedir sa lannen ki la nou pou annan nou apepre 64 etidyan sorti aletranze ki pou'n kalifye koman ekonomis. Koman *teachers*. Koman enzenyer, *and so on*.

So, la mon pe dir ek sa bann *graduate* ki'n arive pandan lasemenn pase, zot in ganny met lo en *bus stop*. Akoz mon pou dir ek zot, zot in ganny met lo en *bus stop*, se ki sa bann *post* ki'n ganny nominen, petet se zot ki ti'n kapab pran sa bann pozisyon.

Me malerezman, Gouvernman US in swazir pour li remersye son bann dimoun ki'n la ki'n travay ek li pandan eleksyon. Zot kapab riye. Zot kapab gognarde, me *this is realite*.

Atraver ou Mr Speaker, Onorab Louise in dir ek nou "tou sa larzan i pour Lepep Seselwa. Wi, mon dakor ek ou totalman. Sa larzan i pour Lepep Seselwa, wi. Me selman, pa akoz i pour Lepep Seselwa ki nou pou zis pran sa larzan

e diverti kontan avek *left, right and centre*.

Se nou bann Manm Elekte ki'n vin dan Lasanble ozordi pour nou met en lizye e kler en tors lo ki mannyer sa bann larzan i ganny depanse. E se nou bann zabitan ki'n *vote* pour nou ki'n met nou la ozordi ki pe dir nou pou koz pour zot.

Ler nou vwar poudir i annan 7 SS, 36 PS, 9 SA. Be, ler mon'n fer en pti kalkilasyon, zis dan en mwan nou pe koz milyon saler sa bann dimoun. Akoz nou pa pe koz bann pti saler la sa bann dimoun ki'n ganny met dan bann pozisyon.

Nou pe koz, parey mon koleg Onorab Roucou in dir taler. 77mil *plus*, 47 *plus*, 67mil *plus*, 56mil *plus*. Me nou pe koz en kantite larzan.

E mwan bann zabitan Glacis dan letan eleksyon ki ti maltret mwan, ki ti dir mwan tou sort kalite parol. Mon demann ek mon lekor ozordi, kote zot in antre? Kote zot in antre la dan sa Bidze Siplemanter?

Semenn pase mon ganny en *call* avek de zabitan Glacis. Ler ti annan kanpanny zot ti dir ek mwan koumsa zot in pas kot 2 zabitan Glacis. Ler zot in pas kot sa lakour, larm dan lizye sa bann marmay ti a pe koule. Larm dan lizye paran ti a pe koule.

Me les mwan dir avek zot, semenn pase sa menm de fanmir ti vin kot mwan dan mon biro e zot ti dir ek mwan, *I quote* “Onorab, nou pe sey *call* sa bann dimoun ki mon'n *vote* pour zot, me personn pa pe reponn mwan.

Mwan konman Manm Elekte mon ti dir zot koumsa, get sa, mwan mon'n ganny elekte pour dimoun Glacis. Mon pa vin get ni ou kouler politik, ni kot ou sorti. Ki kouler ou ete. Kot mon pou kapab ed zot, mon pou ed zot.

E mon'n fer li. E mon fyer ki landmen sa de dimoun ti anvoy mwan en mesaz lo mon telefonn, ki ankor la, ti dir mwan “Onorab, mersi bokou, *at least* ou'n azir konsyansye ou'n ed nou.

So, mon ti a zis kontan pour nou ler nou fer nou deliberasyon, *at least* nou mazin en pti pe nou bann dimoun dan nou distrik ki'n met nou la. Annou pa zis vin dir nenport keksoz ki kontradir lespri nou bann dimoun laba deor.

Mr Speaker, Onorab Sopha atraver ou, in koz lo *beach soccer*. Mwan mon ti en zwer foutbol pandan dernyen 35an. Mon ti a kontan pou mon dir ek Onorab Sopha, *get your facts right*.

Pou *organiz World Cup Beach Soccer*, wi Gouvernman ti'n merit – ti pou donn en

lokasyon pou fer sa stad. Me pa ti Gouvernman ki ti ganny lotorizasyon pou organize. Sa ti responsabilite Federasyon Foutbol. E ler Federasyon Foutbol pa'n kapab delivre, e se la ki nou Prezidan Ladministrasyon LDS in mont devan e in vin-

(APPLAUSE)

HON COLIN TIRANT

Ok. In vin tir nou dan sa problem ki nou ti ete. Nou bezwen dir ek dimoun keksoz ki vre, ok. E mon'n ganny en mesaz la avek bann zwer *beach soccer* ki dir mwan dir ek Mr Sopha sa. Mon pou lir sa mesaz ki zot in dir mwan.

“Dir Mr Wavel Charles Ramkalawan mersi bokou pour sa tournwa eksepsyonnel e inoubliyab ki ou Ladministrasyon LDS in organize !”

(APPLAUSE)

HON COLIN TIRANT

Se sa ki nou Gouvernman ti fer. Nou pa ti zis koze, me nou ti enplimante.

(Interruption)

HON COLIN TIRANT

Mr Speaker, atraver ou, mon ti a kontan pour mwan dir de pti mo ankor *in regards* zot bann

proze ki Ladministrasyon LDS in fer.

Mr Herminie ti dir poudir i pou pran li en marto 14 liv e i pou kraz tou sa bann lenfrastruktir ki Ladministrasyon LDS ti'n konstrir.

Me malerezman, e malerezman semenn pase ki nou'n war? In ouver en proze *condominium*. E sa *mid-range condominium* i pa ni ti enn 24-24 me i ti enn 32 *unit*.

(APPLAUSE)

HON COLIN TIRANT

So plis ki 24-24. Eski LDS pa'n delivre menm? Zot be si zot pa vwar sa, mon pa ganny en konpran ki zot vwar.

E mon ti a kontan osi si Gouvernman LDS ti al en pti pe o profon. *I mean US*. Akoz mon dir sa?

I annan *le fameux STC Cold Storage* ki pou annan en lanket ki pou ganny fer lo *STC Cold Storage*. Be mwan mon ti a kontan ler sa lanket i ganny fer – normalman ler ou fer en konstriksiyon, ou annan en konsiltan ou, en enzenyer ki atase avek en proze.

(Interruption)

HON COLIN TIRANT

E mwan mon ti a kontan, e tou dimoun Sesel ti ava kontan konnen lekel sa enzenyer ou

endividi ki ti sinyen a sak fwa en peyman i ganny fer *or* en bout konstriksyon i fini ganny fer ki aprouve poudir sa konstriksyon ki'n ganny fer i byen.

Mon pou kit sa la pour tou dimoun rode e ladministrasyon i a vin devan i ava vin dir ek nou lekel.

Avan ki mon terminen Mr Speaker, i ti ariv en lensidan dan mon distrik dan letan eleksyon ki en Minis ozordi apwente dan Ladministrasyon LDS – *I mean, US*, ti vin dan mon distrik 7er diswar. A sa lenstan la i ti pe vin fer en *meeting* pou gete ki proze pou ganny fer avek *mini hall*, North East Point.

So, mon pou espere, mon pou gete e nou pou kler en tors aköz sa vizit ti ganny fer sa zour. E nou bezwen gete ki i pou annan pou fer lo nou *mini hall*, North East Point.

Zis avan mon konklir, atraver ou Mr Speaker, mon ti a kontan pour mwan dir avek Mr Gill. Onorab Gill, ou'n vini ou'n dir nou poudir wi, nou Prezidan – get mwan - nou Prezidan...

(Interruption)

HON COLIN TIRANT

Sorry. Sorry, Mr Speaker.

MR DEPUTY SPEAKER

Silvouple, Manm sipoze adres *the Chair* silvouple.

(Interruption)

HON COLIN TIRANT

Sorry. Sorry, Mr Speaker. I retract. I retract. Mr Gill. Onorab Gill. Eskiz mwan en, I retract en. Ya, ya.

Ou ti dir poudir nou Prezidan ti vin la dan SONA ti dir “mon'n fatigue”. *Yes*, i ti dir. Be ou konnen aköz i fatigue?

Be get yer tou sa bann dimoun ki'n ganny met dan en *post* e ou ava war ou larepons aköz Mr Wavel Charles Ramkalawan ti fatigue. Set aköz tou sa bann ki ti la o bor li la ti a pe rent li. Se sa ki i ti fatigue.

(laughter)

HON COLIN TIRANT

Mersi bokou Mr Speaker.

(APPLAUSE)

MR DEPUTY SPEAKER

Mersi Onorab Tirant. Bon, nou pou pran en poz *café* 15 minit. Nou ava retournen 4er senk. Mersi.

(BREAK)

MR DEPUTY SPEAKER

Bon, lo mon lalis ti reste mon 5 Manm ki pou entervenir e

mon pou ferm lalis la. Mon pou demann Onorab Romain pou ou fer ou lentervansyon 15 minit, *be mindful of time* silvouple.

HON GEORGES ROMAIN

Mersi Mr Speaker. Bonn apre midi Mr Speaker. Bonn apre midi tou koleg Onorab e tou dimoun a lekout.

Mr Speaker, mon'n ekout atantivman sa deba ozordi, e mon ti a kontan komans mon lentervansyon koumsa, ler mon ti tann Onorab Gabriel atraver ou Mr Speaker, dir ki i pou pran en pe letan pou repar domaz ki Gouvernman *LDS* in fer, mon ti pe demann mon lekor en kestyon ki kalite domaz ki *LDS* in vreman fer?

E mon ti a kontan dir li, byensir atraver ou Mr Speaker, ki pou mon Gouvernman *LDS* in fer en bon pe keksoz- en bon pe keksoz pozitiv dan sa pei. Ler ou regarde Mr Speaker, pou sa pti peryod letan ki *LDS* in vin o pouvwar nou tou nou konnen parey ki nou pa anvi- nou pa anvi nou dir be selman nou tou nou konnen ti en *facts* ki ti annan *COVID* sa letan, 2an *almost*. E sa 3an Gouvernman *LDS* in rekonstrir sa pei.

Ler nou regarde kantite bann lenfrastriktir ki ti'n ganny abandonnen e kot sa bann lenfrastriktir in ganny *major* bann gran renovasyon

in ganny fer lo la, tel ki parey nou bann lenfrastriktir sportif e ler ou regarde en kantite semen ki'n ganny fer dan nou pei tousala byensir i bezwen annan en plan e in kout larzan.

Bokou lakaz in ganny fer dan diferan distrik Mr Speaker, lekol, la byento La Digue i ava ganny son nouvo lekol. E tousala ozordi kantmenm *LDS* pa la byensir kekfw a kapab ganny fer anba Ladministrasyon *US*.

Parey mon'n fer resorti Mr Speaker, bokou lenfrastriktir sportif in ganny *major*, bann gran renovasyon in ganny fer lo la. E ler ou regrade Mr Speaker, mon ti a kontan dir Onorab Gabriel ki Prezidan Dr Herminie ti fer son sermantasyon dan Stad Linite e ler ou ti regard Stad Linite, mwan mon ti ale mon ti al asiste son sermantasyon ti en *Stadium* ki ti vreman lo *top* nivo konpar ek son sityasyon ki i ti ladan anba Gouvernman *US*.

E alors pou sa mon ti a kontan kekfw Onorab Gabriel ti ava reazir rekonesan. E mwan pou mon Mr Speaker, menm Minis Laporte in vin devan, in dir ki lekonmi Sesel in fer byen e ki lekonmi i stab, e menm in al pli lwen aköz in dir ki *figures* pa koz lalang.

Mon konnen ki i ti pe sey dri akòz byensir tou bann lenformasyon i la, statistik i la alòrs sa aprouve ki lekonòmi vremen in fer byen. E Mr Speaker, mon pa pou pran bokou letan mon, me selman mon ti a kontan tous en pti pe lo kote par egzàn pou'n tande yer bann nouvo *recruitment* ki pe ganny fer dan nou pei.

Pou mwan Mr Speaker, nou tande pou annan bokou- *Secretary of State* SS, pou annan PS, apre pou annan bann *Special Advisors*. Pou mwan ler mon regard pou en pti pei parey Sesel, nou ti pe vremen fer byen anba Gouvènmàn LDS pou nou met sa kantite dimoun dan sa bann pozisyon mon demann mon lekor en kestyon vremen, si vremen Gouvènmàn US in fer en bon refleksyon pou met sa- pou kre sa ta *post*?

Akòz ler ou regarde, pou mon SS ek en PS zot tou lede zot travay- PS i travay ek Minis byensir, SS mon mazinèn kekfwa i report direk avek Prezidan, en *Special Advisor* i pou *advise* sa Minis, me selman mon mazinèn preski tou zot louvraz ler ou pe regarde i pou preski menm parey, enn ler ou a dir menm zot pou mars lo lipye kanmarad.

E ler ou pe regarde pou en pti pei parey Sesel, parey mon'n repete i pe vremen i pou

mete en bon pe presyon lo nou finans. E alòrs, post in fini ganny kree, me selman mon mazinèn ki Gouvènmàn US i merit mazin detwa fwa avan nou fer bann depans koumsa.

Parey la mon ti a kontan dir Mr Speaker, byensir mon napa okenn- okenn keksoz mal kont sa bann endividi ki pe ganny sa bann pozisyon, mon kontan pou zot akòz tou Seselwa i bezwen travay dan sa pei pi li sonny son fanmir. Me selman i zis ki mon en pti pe konsènen ki pou en pti pei parey Sesel pou annan sa bann kantite pozisyon.

E ler ou regarde Mr Speaker, LDS dan eleksyon ti ganny 30mil823 vot, e ler ou regarde ozordi bokou sa bann pozisyon in ganny, sa bann dimoun ki pran sa bann pozisyon nou tou nou konnen Sesel i ptipti sa bann dimoun byensir ti pe siport Parti US.

E dan sa menm Lasanble nou ti vwar Prezidan Dr Herminie ti vin devan nou ler i ti fer son ladres i ti dir ki tre byento i pou kriminaliz 'ek nou pa ek nou', e mon ti kontan pou tann sa akòz pou mwan ti'n plis ki ler. Akòz si en dimoun i siport en parti politik, ki sa enn ki pa o pouvwar, pou siport en lot, mon pa krwar ou merit ganny viktimize ou byen ou pa merit pe ganny en travay dan ou prop pei.

Me selman parkont, sa *Bill* pa ankor vin devan nou e la nou pe vwar bokou bann dimoun ki pe ganny pozisyon dan Gouvèrnman i bann dimoun ki byensir ki ti pe siport Parti *US*. E alors mon ti a kontan kekfwa Parti *US* atraver Prezidan Dr Herminie i a sey fer en bon pe refleksyon ki 30mil823 Seselwa ti vot pou *LDS*, i preski *almost* lanmwatye ki li i ti gannye kantmenm i ti ganny 34mil.

So, nou annan en kantite Seselwa la deor ki osi i ti kapab vreman ede pou fer sa pei bouze. E osi mon ti a kontan fer resorti Mr Speaker, ler mon'n tann Onorab Lemiel, *LGB* fer resorti ki son Gouvèrnman pou servi mwens larzan pou zer Bidze, be mon ti a kontan demann li, be si Onorab Lemiel ler i ti pe dir sa, dir nou konbyen in kout pei pou tou sa bann nouvo post ki pe ganny kree dan Gouvèrnman?

Mon mazine kekfwa sa i a vin pli tar parey zot in fer resorti, me selman sa i ti pou en keksoz ki byensir ki Lepep Seselwa la deor pe espere. Akoz nou konnen Gouvèrnman *US* byensir i pou depans bokou akoz sa i son bann promes ki zot ti fer dan letan eleksyon.

Me parkont osi ler ou depanse ou bezwen annan en lot landrwa ki bor ou pe

anmase pou kapab bous sa bann trou ki ou pe kree. E menm mon'n tann Minis Laporte dan son ladres ler i ti vin devan nou le 25 Novanm dan Lasanble, i ti fer resorti ki R69.7milyon anba saler bann Minis ek departman, ek lazans pe ganny koupe an rezilta bann servis.

E alors, si la nou pe koup 69.7milyon, dan sa bann *post* e alors sa bann nouvo *post* ki pe ganny kre mon ti a kontan vreman konnen kantite i pou arive anba dan sa bann nouvo *post* anba Gouvèrnman *US* tre byento?

E parey mon'n fer resorti Mr Speaker, ler nou'n koze pli boner, mon'n mansyonnen ki ler ou regarde anba *LDS* nou ti annan zis 13 Minis, 25 *PS* e 2 *SS*, zero *Special Advisors*. Be parkont anba Gouvèrnman *US* nou'n war i annan 14 Minis, 36 *PS*, 8 *SS* e 9 *Special Advisors*. E sa i demann mon alors en bon pe kestyon kot nou ou kapab ganny sa larzan pou vreman pey sa kantite dimoun ki ganny sa bann gro, gro *post*?

E osi mon ti a kontan fer resorti Mr Speaker, ler nou pe koz lo bann *achievement* ki Gouvèrnman *LDS* in fer pandan son 5an, mon pa pou kapab bliye ki mwan koman sa *MNA* ki ti ganny elekte Anse Etoile mwan mon'n vwar personnelman ler mon'n

travay ek sa bann Minis avek Prezidan li menm, lafason ki mannyer nou'n travay vreman i pa'n toultan fasil nou konnen akoz ou bezwen mazine si finansman pa toultan in fasil.

Me selman nou'n kapab *achieve* bokou keksoz ansanm e pour sa mon ti a kontan remersi nou Prezidan, ansyen Prezidan Wavel Ramkalawan ek tou son bann Minis ki'n vreman met pei dan en fason stab e kot non war nou finans rezerv parey nou'n ganny dir ki dan Labank Santral i annan en valer pou 4mwan lenportasyon, e sa mon krwar mazine i pli o ki pei in deza *achieve*.

E la mon ti a profite dir osi ki dan distrik Anse Etoile byensir nou'n ganny bokou devlopman, kot nou vwar lagrandisman semen, kot nou vwar tou lede kote semen par egzant dimoun ki pe *drive* dan Anse Etoile ou pou vwar bann devlopman *pavement* pe ganny fer.

Nou'n ganny Proze Bazar, nou ganny proze diferan drenaz, kot nou'n bokou lakaz osi pe ganny fer son proze 24 *unit* lakaz tre byento mon mazine sa lannen oubyen *early* lannen prosenn ki sa proze i a fini e pou sa mon bezwen dir rekonnet Gouvernman LDS byensir ki'n komans dan nou letan. E mon mazine ki pou

byensir ki i pou fini dan letan Gouvernman US.

Parey mon'n dir Mr Speaker, mon ti napa bokou pou dir mon ti anvi zis donn en pti kontribisyon lo la, me selman mon konnen, mon ti ava vreman apresye si bann lot kote latap osi annan kouraz osi par ler pou rekonnet ki sa ansyen Gouvernman osi in travay dan sa pei. Mersi Mr Speaker.

MR DEPUTY SPEAKER

Mersi Onorab Romain. Nou a donn laparol Onorab Rocky Uranie.

HON ROCKY URANIE

Mersi Mr Speaker. Mosyon in ganny anmenn bomaten par Onorab LGB Sylvanne Lemiel zisteman pou nou kapab aprouv son Mosyon ki pe regulariz depans ki Gouvernman LDS in fer.

Aprè ki Minis pou Finans Planifikasyon Ekonomik, Komers e Lenvestisman ti vin ver son deklarasyon semenn pase avek son lekip isi dan Lasanble baze lo performans bidzeter, e osi ti fer soumisyon pou dan Bidze Siplemanter.

Sa legzersis i en prosesis ki bezwen ganny fer pour ki parye mon'n dir regulariz depans ek bann koupir ki'n ganny fer. Lannen pase, ler ex-Minis Hassan Minis pou Finans ti vin isi ti prezant nou

avek sa Bidze, dapre li ti pli gro Bidze ki Sesel in deza vwar ki pou anmenn en sanzman dan lavi Seselwa.

Nou dan *United Seychelles* nou ti vwar poudir s ai en Bidze pirman politik, akòz lannen answit ki sa lannen ki nou ladan ti pou ana en eleksyon isi Sesel e alor zot ti sey anvoy sa labwet pou sey bat latet Lepep Seselwa.

Me nou, nou ti konnen parey nou'n dir poudir sa pa pou zanmen kapab materyalize, akòz ti zis bann rol, e deswit apre ki nou ti vwar? Minis Hassan taye, olye defann son Bidze, Minis i taye i al dan prive i dir les Prezidan demerd li avek son zafer.

Pov Prezidan in fatige i dir Onorab Glacis i dir in rente in ganny rente, Onorab Collin eskize - I get mwan la get mwan, Onorab Colin, li osi dapre li in rente. E limen li kontradwir son prop lekòr, ler on komanse in dir les li fer en pti letour dan son distrik Glacis ki dir in fer *bus stop*, Minis Ferrari in fer *gear store* lot, lot apre 20an pe espere.

Apre ler i pe ale dan son lentervansyon i bliye poudir sa Bidze Siplemanter i Bidze- i pou *LDS* depans *LDS* li i vin dir son bann dimoun e li in demann ek son ban dimoun oli zot dan sa Bidze, i pa war zot dan sa Bidze li. Be ou

demande kote zot ete dan sa Bidze?

Mon krwar Onorab ou ti devret fer ou *homework* byen pou vwar poudir sa Bidze i Bidze depans ki ou ladministrasyon in fer e nou la nou pe zis regilariz li pou fer li, pou kapab fer travay kontinyen marse.

Mr Speaker, nou'n tann en Onorab ki ler i koze atraver ou Onorab Sandy Arissol, parfwa nou dir zis i koze akòz i bezwen koze i annan en *micro*, kantmenm bonzour i dir ou zis dir, kantmenm ou pa dir naryen zis dir en bonzour. Sa Onorab i trouve li an 2020 ti annan *COVID*, zot in pran pei ti annan *COVID*.

E sa i ganny siporte par son lot koleg pa ti ganny elekte zot osi zot lot koleg Grand Anse Praslin Onorab Woodcock, i dir wi sa lenflasyon ti pe pet plafon, nou ti pe manz dan nou rezerv, nou ti dan en kriz.

Selman zis apre saler i pe dir tousala 2021 la, zot Prezidan i vini i komans nonm *allowance* palto, *allowance* ledan zis parey Onorab sa ti pe dir *allowance* linet, zot a ti dir naryen poudir be pa fer, pa fer tyonbo en kou. La ki zot pe krwar, nou osi nou pe al kontinyen lo la, non, nou pou nou pou diferan. *Ok?*

So, zis pou met sa a ou latansyon, en lot ankor, en lot

ankor li i dir nou'n pous-nou'n pous Onorab ex-Onorab Naddy Zialor, nou'n koudpye li, premye pou koudpye Onorab Naddy Zialor sete LDS zot menm isi dan Lasanble. Koudpye li fer li ale, koudpye lot Onorab laba ki ti donn lanmen pou bat sa enn ankore ki ozordi in vin lo en lot tiket mon pa konnen mwan. *Ok.* Onorab Sandy Arrisol atraver ou. *Ok?*

So, pou mwan mon krwar poudir se zot premye fer li, ler nou'n get sa Bidze ankore ler nou'n get sa Bidze nou'n koz lo rekritman kot napa preski dir ou rekritman ki ganny fer kot tou larzan i ganny retournen, leskiz se ki petet sa bann dimoun pa ti kalifye eksetera lot, lot.

Me mon asir ou bokou dimoun ti pe rod lanplwa e zot ti ganny fer troun an ron aköz ti annan “ek nou pa ek nou anba Prezidan Wavel Ramkalawan.”

(APPLAUSE)

HON ROCKY URANIE

Ti annan, ti annan ‘ek nou pa ek nou’, e prezan kot sa ti pe fer fristrasyon ler travayer i fristre byensir Prezidan i fristre aköz i al sey *micromanage* li ou pe fer dimoun ou pa pe rekrite ou, selman ou pe fer dimoun fer

louvraz 3 dimoun dan biro. Be byensir servis *delivery* pa pou alaoter. Alor, sanmenm sa ou ki'n *rent* ou prop lekor le ou'n vin avek ‘ek nou pa ek nou’. So alors zot ti bezwen mazin 2 fwa avan ler zot vin dir nou.

En lot msye Onorab Naidu; Onorab Naidu li mon pa konnen ki son problem ek Lenn, petet i bliye kot i- kote i sorti son desandans, be non, be aköz ki mannyer i pe dir be nou aköz nou annan bann relasyon bilateral ek bann pei. Lenn i enn bann zanmi, me ou krwar konmsi imsyé pa pe kontan ditou ler nou koz lo Lenn.

E li ankore i pe koz lo drog, pe donn lenpresyon konmsi nou'n sanz, nou pe sanz Komisyoner laba aköz la nou anvi fer biznes drog kontinyen bann Kartel dan prizon. Les mon a dir li sete ou Prezidan ki ti toultan donn nou lenpresyon e koz manti parey labitid fer nou krwar li i konn ou *dealer* e i pou fer konversasyon ek zot.

Byento i ti donn premye *warning*, i ti donn dezyenm *warning*, i ti donn trwazyenm *warning* ziske ler zit nepli kapab donn *warning* i pa ni konnen kot i ete. *Ok?* In larg prizonnyen, bann droger li menm, sete li menm ki'n fer. *Ok.*

(Interruption)

HON ROCKY URANIE

Onorab, lot Onorab, Onorab Adelaide, li in dir atraver ou Mr Speaker, li in dir zot pou toutan demann kestyon aköz i enportan pou demann kestyon son bann koleg ti bat lanmen e sa ti ganny swiv par Onorab Clarisse li osi ki dir wi, i enportan pou koze pou demann kestyon aköz sa i anmenn latransparans.

Ou konnen zot bliye poudir zot ki ti fek la sa dernyen 5an? Ler nou ti sey demann kestyon bann latransparans Mr Speaker, ou osi ou'n pas ladan ledwa ti pres pou foule avek sa la pou koup *micro*, e zot ti bat lanmen, bate lanmen.

Onorab Georges, atraver ou li i servi en kalite diplomasi li, li i vini i dir nou, nou sa 34 nou la, nou'n privezye nou annan responsabilite pou fer bann travay ki dimoun pa ganny sans fer, get Bidze isi laba eksa konmsi i pe kosyon nou, nou bezwen- konmsi nou bezwen fer sa avek kosyon byen menm.

Selman li menm li ki ler i ti asiz lo sa kote latab i dir nou i pe rod nou pou maltret nou. Eksa i riye tou i pas lanmen dan son latet ler i dir sa. ou konpran mon? Konmsi i montre ou sa bann lipokrizi ki zot in vin avek pou sey anbet nou isi anndan.

Mr Speaker, si mon retournen ankore nou pou al lo enn in komans dir Prezidan i annan *villa*, Eden Island lot, lot, me selman ler nou ti pe dir li poudir Prezidan ek piti Prezidan pe aste *villa* 3 milyon i ti sot anler, sa Onorab Arissol sa sot anler pa nonm li lo zil partou Desroches son ex-Prezidan ti annan.

E li menm li ki ler mwan mon ti koz pou *carer* ti lanmen- nou ti lot kote latab ler nou ti kriye pou *carer* get *carer* zot Onorab la touzour i ti koz dernyen li, manman tou latansyon pou li. Li pas son letan maltret *carer* ansanm Prezidan osi parey pa ti enterese ek *cleaner* eksetera, lot, lot.

La ozordi koman i al laba, ozordi la konmsi li pli *care* pou *carer* li, li ki *care for the carer* kan i ti dir li i pou pran tou sa ki ti apel pou li, la apre i ti ganny dil avek aköz bannla ti dil ek li, bezwen vin demann leskiz, pe rod fason ki mannyer i pou dir i pa ... be bannla in war zot pe pran tou sa ki apel pou zot, e bann la in fou zot deor.

Ler mon pe koz lo sa ki apel pou zot la, zot pe rode ki mannyer nou pou annan tou sa SS, tousala kot pou ganny sa ta larzan isi laba lot, lot. Be, zot Prezidan osi ti'n kapab met tou sa bann dimoun obor li pou siport li dan plas depans

li pres 20ekek milyon zis ek *travel* monte, desann mon krwar sote 100fwa, Pou al get *Formula 1*, san kont bann ki'n al an misouk, san kont bann ki'n al an misouk lo ki nou pa konnen la, ki'n al an misouk. So, ou vwar? So larzan i annan e zot pe donn lenpresyon ki nou per nou pe vin o pouvwar no pe zis vin donn bal dan larzan - nou vin donn bal dan larzan konmsi nou sitan irresponsab nou pa konnen.

Be mwan mon pe dir ou en keksoz, sa Gouvernman ki la, anba gidans Prezidan Dr Patrick Herminie in dir nou *trust the process* e nou'n *trust* li, in anmenn nou, in anmenn nou o pouvwar, in anmenn nou o pouvwar, i ti dir nou i pou met nou o pouvwar, i pou mont *State House* e in fer li.

E i ti annan en sanson ki ti dir ler ti pe sante zot ti pe riye ler nou ti sante la nou ti dir ♪Herminie ki pe mont *State House*♪, zot ti rapel sa sanson? Zot ti pe riye be nou, laba nou. Zot ti pe kriy kit lanmenm oli? Ki sa Seselwa in fer avek? Seselwa in fou zot, in fou zot deor ziske la zot ankor pe rode ki pou fer avek zot lekor.

Pe rode si zot pou sey fer mon krwar mon pa konnen si pou sey fer koudeta nenk zot pe ensiste lo 2027 zot pe retournen la taler enn fek nonm ankor en zafer, ankor e

wi, e wi mon pa konnen ki zot ti pe sey fer.

Ou war, Onorab Georges zis gete i riye, ki li osi i ti donn lanmen dir sa laba ansanm li, 2027 i pe vini. Mon pa konnen ki zot ti pe vin sey fer mon zot a esper 2mil30 e 2mil zanmen! Akoz nou ki pou la, Seselwa in fini donn zot in fini met zot ater *ok*?

Mr Speaker, zis pou koz en pti git ankor lo mon distrik, mon distrik parey mwan mon dir mwan mon onnet mon byen, *ok*. Nou ti bezwen lopital me nou pa ti dakor ek lokasyon, zot ti fer en lopital, zot in fer en bout por i *ok*, napa problem me zot in komans Proze Lekol parey nou, nou ti komanse nou'n fini.

Me selman Mr Speaker, mwan ki mon'n war, sa kantite Proze *SIA* mon krwar i napa kapasite pou li fer, e zot ti konnen zot akfer zot ti bezwen met tou sa kantite proze apre zis larzan pou bezwen retournen san ki zot kapab akonpli sa bann proze? Akoz *SIA* napa kapasite.

Me selman toudmenm mon pou remersye *SIA*, akoz preski tou sa vizit pandan sa 5an la, pa ti ganny envite preski ditou mon, la mon'n ganny envite finalman mon dir *SIA*, *Board* mersi. Mon dir mersi Minis David Pierre pou vin La Digue pou envit mwan,

Minis Rose, Minis Pamela Charlette.

Be selman akòz mon azanda ti sitan plen, me akòz nou pa'n kapab zwenn tou dimoun *ok*. Me selman nou'n war poudir nou bann Minis pe travay zot in deside vini vin get nou lo zil, avan zot pa ti fer sa zot, ti vini e sanmenm sa ou war Digwa in fou zot deor sa, *ok*?

Mon pe koz laverite menm la, ou'n sitan koz lalang sanmenm sa ou deor ou osi? Ou deor ou, ou kouzen in met ou deor, e ou pou reste deor. Pa mank bokou letan mon tandè ou pe vin ganny ranplase tou, ou pou ale *ok*? So wi, non, non mon tourn lo Linyon Estate, ladan i annan Linyon Estate in toultan pe fer profi anba nou Gouvernman.

La dernyen 5an Linyon Estate in sanz 3 CEO, 3 CEO e toultan napa profi e finalman zot pe rod *Grant* pou kapab fer zour eksetera, eksetera. Me mwan mon rapel Linyon Estate ti e menm donn 2milyon pou fer *mortuary* La Passe, La Digue, lakaz mor ki ozordi anba Ladministrasyon LDS ki'n pase zot in abandonn li e la nou, nou bezwen al rode ki nou kapab fer avek sa landrwa.

So, alors, e ler mon ti demande si pe fer profi pa ti tro kapab, pa'n tro kapab reponn mwan. *Ok*? Mon war

larzan *landfill* 2milyon, *retaining wall*, *ok*, tousala in ganny retar. Me la ki mon kontan se ki mon ladministrasyon anba gidans VP pe met presyon e sa travay in plan *redeem*, are e pe al ase byen.

Ex-Minis Hassan, ti vin Minis anndan ti'n dir poudir lakaz La Digue in fini komans konstrir zero, zero. La avan eleksyon 1 semenn premye pyer 5 kouler byensir mon ti tyonbo mon blok rouz, mon ti met mon blok rouz ater, *ok*?

Me la, la ki nou pe met presyon pou nou fer sir ki sa bann lakaz sa bann lakaz i ganny fer. So,

MR DEPUTY SPEAKER

En minit, Onorab.

HON ROCKY URANIE

Mr Speaker mersi mon annan bokou pou dir. Toudmenm Mr Speaker, zis pou montre poudir zot pa ti serye, Prezidan- *ex*-Prezidan Wavel Ramkalawan li i ti dir i pou sakouy pye, ti dir pou sakouy pye i pou met larzan dan pos Seselwa me i pa ti fer sa ditou.

Alors, nou ki la, nou pou bezwen aprouv sa Bidze-aprouv sa Mosyon ki pou regulariz sa bann depans ki'n ganny fer. So, alors Onorab LGB nou pou siport ou, e mon asire lot kote laba osi pou bezwen donn zot sipor, zot pa

pou bliye poudir sa ti bann depans ki'n fer anba zot Gouvernman. So, zot tou mon krwar zot sipoze siport sa Mosyon.

Alor, nou, nou'n arive, nou'n ariv *State House* e nou pare pou nou fer Sesel vin pli prospere, alor nou'n arive e nou ou reste. Mersi Mr Speaker.

(APPLAUSE)

MR DEPUTY SPEAKER

Mersi Onorab. Laparol Onorab Monthy.

HON PHILIP MONTHY

Mersi Mr Speaker. Mr Speaker, mon kontan tann Onorab Uranie dir i annan kantite keksoz pou ou dir. Ou bezwen annan en kantite keksoz pou ou dir Onorab, atraver ou Mr Speaker. Akoz Gouvernman *LDS* in depans plis ki R60milyon an term proze lo ou zil, byensir ou bezwen annan bokou keksoz pou ou dir.

(APPLAUSE)

HON PHILIP MONTHY

Mr Speaker, *LDS* in en parti ki'n touzour atas en gran lenportans avek lafason ki larzan piblik, oubyen larzan Lepep Seselwa i ganny depanse, pandan tou sa bann lannen ki nou'n dan

Lopozisyon avan eleksyon 2020, nou'n vwar sa lalit ki'n ganny anmennen, par nou bann *Leaders*, notaman Prezidan Ramkalawan kot plizyer lenstans koripsyon in ganny met a latansyon Lepep Seselwa.

Laprev i la Mr Speaker.

Nou tou nou konn sa *case* \$50milyon ki devan Lakour, e plizyer lezot *case* ki Komisyon Anti- Koripsyon pe travay lo la e ki byento a vin a latansyon Lepep Seselwa. E ler nou pe koz lo *case* \$50milyon, i annan *case* zarm la, nou war *bail* IN ganny donner, nou a kontinyen *trust* dan sa *process* nou a gete kot i anmenn nou Mr Speaker.

An 2020, Lepep Seselwa ti met zot konfyans dan *LDS* pou diriz nou pei, zot ti met zot konfyans dan Prezidan Ramkalawan pou asire ki zot larzan i ganny depanse dan en fason ki responsab, kot stabilite ekonomik pei e byennet Lepep Seselwa i pas avan tou.

E mwan Mr Speaker, i konpri tou mon bann koleg lo sa kote latab e sa 31mil Seselwa ki ti vot pou *LDS* dan sa dernyen eleksyon i fyer avek sa travay ki'n ganny fer pandan sa 5 dernyen lannen.

Bann diferan lorganizasyon enternasyonal ki pe servi Sesel koman en legzanp, i rekonnet sa travay

Mr Speaker, Dolar ki ti plis ki R20 ler nou ti vin o pouvwar an 2020 det pei ki ti sepa konbyen ti pe tous plafon, ozordi nou tande i 52.5, 54.5poursan, kantite travay in ganny fer Mr Speaker.

Me menm tou sa kantite travay ki nou'n fer, ki nou vwar? Ozordi nou vwar nou dan Lopozisyon, apre tou sa travay, aköz? E mwan mon pou dir zot aköz, se aköz nou oponan in vin ek en kanpanny larg dilo, ki en fason fer danzere pou lekonomi en pei e pou son zabitan a lonterm Mr Speaker.

E sa Mr Speaker, in zwe lo rol- in zwe lo moral sa pep, e sa pep in les zot ganny anbete, sel rezon ki nou la dan Lopozisyon ozordi. Bann fo lakizasyon koripsyon in ganny fer Mr Speaker, Prezidan Herminie in pronons son lekor lo plizyer *enquiry* ki pou ganny fer. *Travizory*, Proze Assomption, *Cold Storage STC* in ganny mansyonnen.

Mwan Mr Speaker, mon annan sa pou dir Prezidan Herminie, fer sir ou gard ou parol e nou, nou pou la pou esper rezilta sa bann lanket. Tasyon ou soke ler ou war sinyatir lo bann dokiman *cold storage STC*. Tasyon proze Assomption anmenn ou kot ou prop dalon ki'n ede finans ou kanpanny.

Mr Speaker, parey Onorab Georges in dir, zot pe fer konmsi naryen pa'n ganny fer, me Onorab Lemiel bomaten dan son prezantasyon in vin dir nou tou lekotr Mr Speaker.

Minis Pierre Laporte zot prop Minis ler ti vin fer son *statement* la dan sa Lasanble in vin dir nou tou le kontr, menm si in en pe difisil pou li admet kot annandler in koze ou pa konpran ki i dir parol i trangle li, me kantmenm sa avek bokou difikilte in admet e li menm li in dir poudir sif pa koz manti.

Zot in anmennen ek larzan palto Mr Speaker, atraver ou Onorab Vidot, sa ti son lapriyer bomaten, son lapriyer midi ek son lapriyer aswar, be la ki nou war?

E Onorab Uranie fek dir nou zot, zot fer diferan, ler in koz lo larzan palto, zot pou fer keksoz diferan. Wi Onorab Uranie, diferan zot pe fer. Mon a dir ou ki mannyer zot pe fer, 14 Minis, 36 PS, 8 SS, 9 *Special Advisor* e sa Mr Speaker, pa bliye i vin avek son larzan palto. Se sa diferan ki zot pe fer ozordi Mr Speaker.

Anba Ladministrasyon *LDS State House* napa okenn larzan ki'n ganny demande lo *car hire*, la Mr Speaker, milyon pe ganny depanse, tou *spy* i dan *car hire* dan *tinted*. Wi Mr Speaker, *spy* in retournen

Sesel, Sesel in retourn dan sa fernwanr ki i ti ladan avan 2020, 'ek nou pa ek nou' in retournen.

Seselwa pe viv dan lafreyer Mr Speaker, e la mon pou demande ki sa *Bill* ki zot dir zot pou vin avek lo 'ek nou pa ek nou' i vini osito posib Mr Speaker, aköz nou, nou pe espere nou, nou a gete lekel premye ki pou ganny anmennen Ankour pou trouve koupab pou sa vilen pratik ki'n en kosmar dan nou pei pandan tou sa lannen Mr Speaker.

Prezidan Herminie in dir i pou vin ek en marto 14 liv pou kas tou sa bann fo plak, sanble mwan in bliye dan ki store in met son marto ler i ti vin devwal plak proze 32 *unit midrange condo* Perseverance ki ladministrasyon LDS in pran zis 15mwan Mr Speaker, pou konplete.

Nou pou kontinyen donn li plak pou li devwale Mr Speaker, nou ou kontinyen donn li riban pou li koupe, parey sa 32 *unit midrange condominium* Cascade ki pe al komanse. Me ki leskiz nou'n tann dir, Onorab Trevor Louise in vini i dir nou sa bann dimoun i prezan zot *loan* pou pey zot lakaz, wi Onorab, i byen sa ki ou'n dir, sa Proze *Midrange Condo* i en proze *self-finance*.

Be mon ti a kontan ou dir nou kote ki ou pou ale? Avek ki kontrakter ou pou ale, ou pou angaz ou, pou ou ganny ozordi la ler nou pe koze, pou ou ganny en 2 *bedroom midrange condo* R600mil, kot ou pou ale pou ou ganny en 3 *bedroom midrange condominium* R750mil, sey dir nou sa Mr Speaker?

Mr Speaker, proze dan mon distrik Cascade pa kapab gete e omwen zabitan Cascade mon konpran, zot in kit mwan lanmenm. 48 *unit social housing* ki nou'n fini *allocate*, nouvo Ladministrasyon Distrik brile depi 2014 nou pe al fer miting ladan la taler 5er.

32 *unit midrange condo* pe al demare, nouvo bazar ki nou vin konplete e la en gran proze drenaz dan Parson Estate dan Petit Paris detrwa milyon ki en pe letan mon pe lager pour ki sa i fer anba nou Gouvernman in ganny fer, in konplete e zabitan Parson Estate zot ava aret ganny afekte avek sa gro delo ki desann pandan sezon gro lapli.

Mr Speaker, LDS in travay e US parey Onorab Georges in dir zot pe vin efas tou sa ki'n ganny fer pandan sa 5an. Me lafason ki mon war zot, ki mannyer zot in komanse anvoy lalis 13 Minis, apre anvoy en 14ennm.

Bliy prosedir pou apwent *Principal Minister* si pa Onorab Georges *remind* zot Lasanble i annan semenn nou zwenn, annan semen nou pa zwenn, annan semenn nou zwenn en zour apre nou pa zwenn ankor. Bann gran promes 10mil pou bann pansyoner ki'n deswit in vin R800, bann koze bay lo Assumption me apre vizit ni *interview* pa kapab donnen lake in anmase.

Sa pei Mr Speaker, i dan en letarzi. Nou bann *public servants* pe viv dan lafreder en lensertitid. Seselwa, sanmenm sa sanzman ki zot ti vote sa? Mon krwar pa. Me la realite i la devan nou, zot i les zot ganny anbete par bann fo promes, prezan annou servi nou lespri annou analize e annou fer sir ki sa bann bater latet pa vin abiz lo zot konfyans ankor. Mersi Mr Speaker.

MR DEPUTY SPEAKER

Mersi Onorab Monthy. Laparol Onorab Labonte.

HON ANDY LABONTE

Mersi Mr Speaker. Bonn apre midi Mr Speaker, tou dimoun ki a lekout.

Mr Speaker, mon pou komans mon lentervansyon par en proverb, ou konnen i dir ou koumsa poudir zonm i fer bokou proze, me zis lavolonte Senyer ki ganny

realize. Mon dir sa Mr Speaker, aköz vi ki nou pe koz lo en Bidze siplemanter ou konnen i en keksoz kler ki montre nou poudir nou koman en imen nou kapab prozekte plizyer keksoz me finalman se lavolonte Bondye ki ganny manifeste.

E i fer lapenn ozordi dan Lasanble ki plizyer Manm ki ler mon'n tann koze sirtou lo lot kote latab laba, ou konnen nou i montre ou pirman poudir nou napa gratitid ditou, nou napa gratitid aköz i annan plizyer zot ki dir ki LDS pa'n travay.

E i malere, i malere parey Onorab Woodcock mon koleg in dir se ki zot anvi efase sa 5an travay dir ki Ladministrasyon LDS in fer, me listwar i en keksoz ki nou pa kapab, nou pa kapab efase. Ou konpran laverite, larealite i la en Onorab Uranie in rekonnet poudir in annan bokou keksoz pou dir aköz La Digue i en distrik ki'n ganny plis ki 8milyon mon krwar 700, 800milyon proze.

E ankor en fwa i montre ou poudir nou napa aksepte i annan enn ki'n dir ler i byen nou bezwen dir e ler i mal- e ankor enn fwa i montre poudir nou pa onnet. Nou pa onnet.

Mr Speaker, mon'n komans koumsa osi se aköz nou war poudir malgre e nou pe koz lo Bidze, la spirityalite

osi i en keksoz ki nou pe negliz li bokou, nou pe negliz li bokou e sa ki pe fer nou *downfall* koman en pep li menm li Mr Speaker.

E rezon ki mon poudir sa aköz i fer lapenn ki premye *PNQ* ki Onorab Bernard Georges in met devan i pa'n ganny aksepte e i pa'n ganny aksepte e mwan pou mwan, mon leker i fermal aköz sa i topik la deor, i topik kot plizyer nou Seselwa pe koz lo la pe demande be ki pe arive dan sa pei?

Eski nou pe retourn 25an, 30an pase? Kot 'ek nou pa ek nou' in retournen ankor e sa bann lapwentman ki pe ganny fer, nou bezwen onnet ankor poudir i mazorite zot bann aktivis, parey in ganny dir mon pa pou al pli an detay aköz i annan bokou fason ki ler ou pou gate sa bann apwentman lafason ki in ganny fer me selman i pirman se bann aktivis *US*.

Ankor enn fwa nou napa rankin kont sa, i zot ladministrasyon, me solman sa ki pli fer lapenn se ler ou gete bann ki pa siport zot ou war poudir pe ganny met deor oubyen pe ganny fer malis parey nou war, parey nou'n dir *PS* Jean-Louis, en legzanp pirman, parey ou pe war Komisyoner Prizon Janet Georges, bokou plis ankor.

Nou frer Naddy Zialor ki'n ganny met deor, ou konnen nou bezwen annan en pe konpasyon osi. Ou konnen pouvwar i en keksoz ki ler ou gannyen i kapab sap nou, e parey zot menm zot in dir, se ki wi nou'n aprann nou lesan lo *LDS*, e nou'n aprann nou lesan dan en senp fason.

Aküz nou ti pe edik sa pep pou siviliz sa pep fer zot konpran poudir travay dir i en keksoz ki enportan. Me malerezman Gouvernman *US* ek *SPPF*, *SPUP* nou, nou oule fer tou endividi krwar ki travay dir pa enportan, i pa enportan e travay pa travay ou bezwen ganny larzan, ou bezwen ganny benefis e ou ki pe travay dir ou, ou bezwen ganny trete parey.

I zis parey ki finalman zot pe dir ki trezyenm mwan saler wi, i en drwa travayer me selman ki mannyer nou ankouraz sa bann ki pe travay pli dir e se sa bann ki pe fer paresez. So, ou konnen i annan plizyer keksoz ler nou pe koz lo sa Bidze.

E mon pou profite Mr Speaker, ankor enn fwa keksoz ki pros avek mon leker ki nou koman par la spirityalite par Proverb ki mon'n tire dan Labib Proverb 19 a 21, ou war poudir mon ti a swete ki sa pret ki koz bokou konmela lo politik ki komans get en kou Lasanble pou fer sir

ki i koz en kou pou nou minorite ozordi.

Akoz premye labi lo minorite dan sa Lasanble ozordi Sesel, par sa *PNQ* ki Onorab Georges in anmennen e mon ti a swete ki Dimans, mon pou al lanmes sa voyaz pou mon ekout li pou mon gete si sa pret i fer sorti.

Mr Speaker, i enportan pou mon dir sa aköz Katedral i tonm dan mon distrik e zabitan toulezour i *call* mwan toulezour i dir ek mwan poudir zot santi zot enkonfortab konmela ler zot al legliz aköz politik i tro bokou dan sa legliz. E in ariv ler pou nou arete tousala Mr Speaker.

Mr Speaker, en lot keksoz ankor, ki ler nou pe koz lo Bidze Siplemanter, ou konnen Larivyer Anglez i annan bokou, bokou, bokou keksoz ki'n ganny arive malgre i pa tou sa ki nou ti a swete.

En legzanp partikilyerman mon pou pran se ki nou *boundary wall* kot *Condominium Chateau Vallon* Union Vale ankor en fwa sete en pwazon, en kado anpwazonnen ki sa bann profesyonnel ti aste anba gouvernans parti ava ki ti *SPUP*, *SPPF* Parti Lepep sa letan ki mannyer zot apele zot tro sanz non.

E nou ler non vini nou'n sey fer en *boundary wall*, e wi petet i annan serten defayans

ladan, me i annan, i annan keksoz ankor pou fer. Nou pe rod ankor en fason pou met zot an sekirite pou nou sanz sa klima pou zot. So, ler nou pe koz lo Bidze mon ti a swete ki bann Bidze ki pe vini, met plis larzan ankor pou nou kapab redonn sa bann profesyonnel zot dinyite koman bann dimoun ki'n travay, ki'n ede.

E petet serten zot parmi sa bann ki'n yer ki non tande in ganny SS, in ganny in ganny laba be ankor en fwa nou war zot in ganny kit deryer. E sa i zis aköz mon pe konsantre dan mon distrik.

E en lot keksoz ankor ki mon'n lager dir Mr Speaker, mon ti a swete sa i en Bidze Siplemanter ankor en fwa ki anba nou me nou pe esper zot Bidze vini, ler zot Bidze i vini, mon ti a swete vi ki nou *Community Centre* ki ti ganny vann partikilyerman par nou Prezidan aktyel la Prezidan Dr Patrick Herminie aköz li ki ti Prezidan Parti *US* so li ki'n donn sa *go ahead*.

Mon ti a swete ki Larivyer Anglez i ganny en nouvo *Community Centre* modern e mon pou pouse pou sa, Mr Speaker, i zis ki nou kontan dir sa term lo zot kote pou zot ki zot dir *trust the process*, *yes* otomatikman mwan parey mon'n dir avek tou mon zabitan mon pou *trust the process*.

Parey Onorab Monthy in dir, mon pou gete kote i anmenn nou, me selman parey Onorab Adelaide in dir, nou la pou nou koze pou nou demann kestyon nou pou bezwen demann kestyon, nou pou bezwen gete kot keksoz pe al mal aköz i enportan ki nou pep zot lavwa i ganny tande. E mwan mon enn sa dimoun ki'n ganny re elekte dezyenm fwa.

E mon pou fer sir Mr Speaker, ki sak fwa ki mon zabitan i annan en konsern, en mekontantman, mwan Andy, Michel, Labonte mon pou anmenn zot *case* devan parey zot tou zot konnen bann nouvo Minis ki'n vini mon amikal avek zot, aköz mwan mon pa en dimoun ki kit rankin mon napa rankin pou personnn. Mon pare pou travay avek tou endividi, alor i ekskreman enportan ki zot osi ekout nou.

Pa fer parey ki ler i annan serten levennman nou koman bann Manm Elekte lo sa kote latab nou pa ganny envite, me konpare avek nou ler nou, nou ti o pouvwar nou ti envit zot me zot ki si deside pou zot pa vini.

So, alor respekte nou en pe respekte lepep, parey Prezidan Wavel, John, Charles Ramkalawan in respekte desizyon Lepep in pas labar avek Prezidan Herminie san okenn problem, san okenn

problemm parey Prezidan Faure ti fer. Alor, i ekskreman enportan ki nou aprann respekte tou endividi Mr Speaker.

Ankor enn fwa Mr Speaker, i annan mesaz ki, ou konnen toultan nou pe ganny diferan sirpriz, ou konnen nou pe ganny sok dan diferan fason zis parey la nou'n tande ki ankor enn fwa nou napa naryen avek sa de ki konsernen zarm ki'n ganny large lo *bail* desizyon se Lakour ki pran mon pa'n antre ladan, me selman i bann sok ki'n vini.

La nou pe tande poudir CEO STC osi i pe ganny dir al deor, PS Eulentin in pas parey, so Mr Speaker, konmsi kote nou pe ale dan sa pei? E nou pe diskrit en Bidze parey Onorab Trevor in dir sa larzan i larzan Lepep wi, i *taxpayer's money* ki nou anmase pou nou pey sa bann endividi.

Alor ler nou vin donn sa servis, annou don sa servis dan fason ki i merite aköz mwan mon en dimoun ki lager dan Larivyer Anglez Mr Speaker pou mon tir 'ek nou pa ek nou' dan nou distrik, ki si ozordi zabitan Larivyer Anglez kot mon pase i pou dir ou koumsa poudir Andy, Andy i en dimoun ki pa get ki ou kouler politik i pare pou deservi son distrik dan fason ki i merite.

Alor Dr Herminie koman Prezidan ki sorti dan distrik Larivyer Anglez ki pou *être* fran mon annan en lafyerte akoz i sorti dan distrik Larivyer Anglez wi, me selman mon ti a swete ki i diriz son Gouvernman dan en fason ki nou aprann elimin konpletman sa 'ek nou pa ek nou' parey mwan koman son *MNA* distrik i pe fer dan distrik Larivyer Anglez pandan sa dernyen 5an e ki mon pou kontinyen pandan sa 5 an ki la Mr Speaker.

Mr Speaker, i annan bokou lezot proze ankò, vi ki nou pe koz lo Bidze, parey mon annan semen Pti Pate, mon annan semen Thomson Lane, i bann proze ankò en fwa ki anba Ladministrasyon *LDS* nou ti'n met an mars.

E mon pe swete ankò enn fwa ki bann miting ki bann diskisyon ki nou pou annan avek bann zot Bidze ki zot dir zot ti pe vin avek byento boner lannen 2026 ki zot a pran kont sa ki la, ankò en fwa nou pa ava ganny met a lekar ki nou a war poudir nou pe bouz ansanm koman en nasyon Mr Speaker.

Mr Speaker, pou terminen, mon pou dir zis 2 keksoz Mr Speaker. Sesel an 2020 pa ti divize, me avan 2020 divizyon ti arive depi ler zot ti fer koudeta le 5 Zen e mon krwar poudir sa eleksyon

ki la Mr Speaker, i pirman montre poudir pei in divize preski lanmwatye.

E anba gidans Prezidan Herminie mon swete i kapab re inifye sa pep pou fer sir ki zot geri zot boubou, e premyerman mon ti a swete i demann pardon ankò enn fwa de lapar, de lapar son parti ki ti fer koudeta Mr Speaker. Si mon pe koz koumsa Mr Speaker, malgre nou pe koz lo Bidze akòz i bann keksoz ki mon zabitan pe dir e se sa ki nou ti a kontan war.

Mr Speaker, avek sa 2 mo, mwan mon pou dir se ki nou bezwen pran en nouvo direksyon e isi dan Lasanble nou menm nou, parey nou Speaker Azarel in dir se ki nou bezwen get keksoz avek en nouvo dimansyon.

So, mon ti a swete ki menm nou bann politisyen ler nou antre dan sa Lasanble silvouple annou pa zis vin fer politik bonmarse oubyen partizan, annou koz la realite, annou get keksoz kot i byen, kot i mal annou balanse e se sa ki mon swe ki mwan mon ti a war ki nou, nou kontinyen dan sa Lasanble.

So avek sa 2 mo, mon pou dir ou mersi Mr Speaker.

MR DEPUTY SPEAKER

Mersi Onorab Labonte. Mon ti a kontan gid Manm lo *Standing Order* 59(1) kot i dir

ou en Manm "*shall confine his or her observation to the subject under discussion and may not introduce matters not relevant thereto.*"

Silvouple, in annan Manm ki'n koze, ki'n la en pe an deor eskize ki nou ladan nou sey *refrain from doing that*, wi zot pou annan zot politik ki zot pou fer, me selman parfwa mon war i en pti pe deborde annou be *mindful of that*.

Mon pou donn laparol prezan avek Onorab Herminie.

HON WILBERT HERMINIE

Mersi Mr Speaker. Mon *mindful of ou Ruling*. Bonswar tou dimoun ki a lekout.

Mr Speaker, ozordi deba in ase enteresan lo en size ki tre senp, en Mosyon ki anmennen par Onorab Lemiel, lo en Bidze Siplemanter ki parey nou ti'n ganny dir ki i depans ki Gouvernman avan in fer ant Zanvyé a Zen sa lannen 2025. Me selman ki nou'n war? Bokou bann size in ganny entrodwir ki ti napa naryen pou fer avek sa Bidze.

Bokou size in ganny fer-in ganny met dan deba ki ti napa naryen lo nou latab Bidze ki la avek nou, bokou zot, zot in koze, zot pa'n zanmen antre dan deba Bidze pou zot dir e defann zot Bidze zot ladministrasyon. Ki zot in koz lo la Mr Speaker?

Onorab Naidu in deside li dan Bidze pou li koz lo peryod tranzisyon i dir koumsa ki nou, nou ti kont sa, wi nou'n kont sa. Ou konnen aköz Onorab Naidu atraver ou Mr Speaker? Aköz nou tou nou konnen ki ti pou arive dan sa moman tranzisyon ti napa okenn *handover* ki ti pou arive, tou dimoun ti konnen ki tou dokiman ti pou disparet e ki nou'n war?

Pa zis dokiman ki'n disparet, lisyen in disparet, torti in disparet, sez in disparet, latab in disparet, kwiye in disparet, fourset in disparet. Menm kado ki nou ti'n gannyen avek bann pei zanmi in disparet.

Epi ki nou fer? Nou pran sa nou met li lo ledò Mr Andre. Pov Mr Andre pa kapab defann son lekor li aköz Senyer in koze e in fini koumsanmenm. Ou trouve Mr Speaker? Sa ki apel lipokrizi, nou annan, lenvestigasyon pe vini li, pa trakase.

Nou annan size garaz *State House*, personn pa'n koz lo la, depans R1.1milyon lo en garaz ki nou pa ni menm koze ki'n arive laba, eski ti en garaz *Formula 1*? Detay pa'n ganny donnen bann Manm lot kote latab pa'n ganny eksplike, sel keksoz ki zot in koz lo la se nouvo lapwentman.

Wi nou ladministrasyon ki o pouvwar, nou pou fer nou

bann lapwentman pou nou kapab fer marse nou program 100 zour pou nou kapab delivre lo nou manifesto sa i nou sa, Lepep Seselwa in swazir pou met *US* koman dan ladministrasyon pou travay e pou delivre.

Zot ki zot anvi koz lo la? *Allowance* palto, *allowance* palto Prezidan Herminie in fini koz lo la in dir in tire, in fini tire, bann *perks*, bann *perks* bann Minis in retourn parey i ti ete e i anba *PSO* e zot kapab ale al gete, zot, zot ankoler aköz *allowance* ledan, *allowance* palto in sorti e zot ankor pe koz lo la, sa ti bann lentrodiksyon ki zot ti fer dan zot letan.

Kan ler nou ti dan *COVID*, zot ti vin avek bann mannev pou vin zot prop lekor larzan, parey mon dalon in toultan dir Onorab Arissol zot ti pran tou sa ki apel pou zot, nou koman en ladministrasyon responsab nou'n tire tousala.

Mr Speaker, ankor dan plas koz lo Bidze kot mon war bokou larzan in ganny tire anba *Home Improvement Scheme* kot dayer i annan bokou laplika deor ki ankor pe rod lasistans bann dimoun aze pou zot kapab fer renovasyon lo zot lakaz.

Zot ki zot in fer zot, zot tir 2milyon ladan e zot in fer sa vin koman en *savings*,

personn pa koz lo la. Ki zot anvi koz lo la Proze *Westcoast*, *well*, nou kapab koz lo Proze *Westcoast* nou pa kont devlopman nou. Nou'n toultan kontan devlopman nou, nou ki'n batir Sesel.

Nou problem se ki nou'n dir se ki dan fason ki sa proze in ganny enplimante i annan bokou, i lev bokou kestyon, enn proze in komanse san aprouvasyon *Planning*, proze in komanse en proze ki lavalier R200ekek milyon, in ganny fer san *proper tender*. Zot in fer li atraver *selective tendering* ki en prosedir ki pa normal dan en proze ki pe kout sa kantite larzan.

So nou bezwen demann kestyon. E wi, nou pe demann en lenvestigasyon dan sa proze, nou pe demande ki tou bann dokiman i ganny met o kler pou nou war ki vremen ki'n arive, aköz la dan Bidze, nou'n war zot met R42.7milyon an plis pou pey VAT, mon prezimen ler Bidze 2025 ti ganny aprouve ti annan en alokasyon pou VAT. So, i annan en larzan an plis ki'n deroule e nou pou rode kote sa larzan in ale.

Mr Speaker, zot koz lo *IDC*, depi ler later i later *IDC* pe fer profi, e i pey *dividend* avek Gouvernman, la sa lannen ki la i ava fer premye fwa ki *IDC* pa kapab pey *dividend* avek

Gouvernman, sa i pirman lenterferans politik ki nou'n war ki zot Prezidan ti abitye fer enterfer dan keksoz ki pa konsern li, sanmenm sa rezon ki *IDC* pa pe kapab pey *dividend* sa Lenn ki la.

Mr Speaker, en lot size ki mon ti anvi aborde se sa size pa kapab delivre lo bann proze ki zot in dir, nou konnen aköz zot pa'n kapab delivre lo sa bann Proze Kapital, aköz ti en Bidze Eleksyon sa, zot i met sepa R600 ekek milyon dan proze ki zot ti menm konnen ki zot pa ti pou kapab fini zot.

Epi ki zot ale zot fer? Zot fer, zot komans konstriksyon 24unit Anse Boileau e zot donn 200ekek let pou dimoun- pou dir ki sa bann dimoun in ganny lakaz, 200 ekek let, dan 24unit laprev i la nou kapab anmennen, mwan mon konnen ki mon pe koz mon. 200ekek let dimoun in gannyen zis avan eleksyon pou 24 unit. Lala en Gouvernman bat latet sa, en Gouvernman *LDS* ki zanmen zot fer sa ki zot dir Mr Speaker.

Lot *MNA* ankor Onorab Tirant i vin eksplik nou ankor *mid-range condo* li, *mid-range condo* sa en prensip ki nou ki ti anmennen sa *public private partnership* kot later ki Gouvernman i donnen e bann sitwayen prive i pran zot *loan*, e en kontrakter prive dan sa ka *Vijay* i fer sa konstriksyon.

Wi, nou'n al koup riban, aköz Perseverance la nou ki ti konble, nou ki ti fer, sa later Perseverance la ki zot ti kont la nou ki ti konble, nou ki ti fer. So nou'n ale nou'n koup riban nou proze, kontan pa kontan nou'n fer li.

Mr Speaker, en lot pwen ki mon anvi vin lo la se *recruitment*, *recruitment* wi, nou dakor i pou annan serten difikilte annandler pou nou pa kapab *recruit*, be mil *post*? Mr Speaker, mil *post*, mil Seselwa ki ti kapab ganny louvraz. Ou ganny en konpran, mil *post* ki pep Seselwa pa pe manze.

Ki mekanizm, ki zot in met an plas depi ler zot in vin o pouvwar pou zot kapab dil avek Minister Lanplwa, avek Minister Ledikasyon pou met ban sistenm an plas pour ki nou rod kwa ki pei i demande, ki louvraz ki bann profesyonnel ki pe i bezwen.

Naryen zot pa'n fer dan sa domenn, epi zot a vin dir nou depi nou ladministrasyon, ladministrasyon ki pe vini sa problem pou reste. Non, nou, nou pou rod fason pou nou kapab dil avek sa bann *issues* nou aköz nou, nou annan en Gouvernman responsab.

Mr Speaker, mon tann Onorab Tirant ti vin avek en lakizasyon *in regards to cold store*. Mon ti ava kontan dir Onorab Tirant koman nouvo Manm ale al fer ou e resers

avek ou anbaras ou lekor. Mr Speaker- pou mwan pa pou mon, mon pe koze m ou ganny en konpran?

Mr Speaker, degre i annan pourtir partou nou'n bezwen met diferan- lans diferan lenvestigasyon pou nou kapab dil avek ban *issues* ki zot in kit deryer, CCCL, 2an, 2an sa bann dimoun Cascade pe monte desann pe sey rod en rekour - 2an.

Ki nou'n war? Ler sa bann dimoun Cascade pe monte desann zot dan lot kote zot pe pran tou sa ki apel pou zot, ni menm demann en kestyon pou siport lenvestigasyon ki sa bann dimoun kapab ganny en rekour ankour zot pa'n fer li, person lo zot kote latib in lev lanmen pou demann en kestyon lo sa size.

Lot, lenvestigasyon lo Assumption, zot pe dir ki Prezidan in al Assumption, i normal pou li al vizit to son teritwar, me solman in fini dir ki in fini lans en Komite lenvestigasyon lo la, ler bann *findings* i a ganny fer *at the right timing* i ava ganny donnen, nou napa naryen pou nou kasyet parey zot aköz tou keksoz ki nou dir fer lenvestigasyon lo la zot ti taye zot ti kasyet.

Lot ankour ki'n arive, *Travizory*, depi zour ti pe demann kontra mon krwar zis

avan eleksyon ki kontra i finalman aparet, tousala lenvestigasyon pe ganny fer. Pa bliy lenvestigasyon dann fon *COVID* kort zot i donn bal, tousala lenvestigasyon pou ganny fer Lepep Seselwa pou konnen. Lenvestigasyon kot gard ti ganny tape, tousala lenvestigasyon pou ganny fer e laverite pou sorti, aköz nou pa'n bliy zot nou, zot kontan koz byen ek nou dryer rido epi dan Lasanble zot vin fer en bann teat.

Mr Speaker, en lot pwen ki mon ti anvi tous lo la, zot in koz bokou lo siport *graduate*, *graduate* in sorti deor, *graduate* pa pe ganny travay, be nou lo sa kote latib nou'n dir nou sa bann *graduate* ki pe sorti la, nou, nou pou fer sir zot ganny *back* zot *graduate allowance* zot tou ki pe vini, *that's the beauty of* Gouvernman US.

E tou sa bann *graduate* pou ganny plas dan en landrwa travay, en keksoz ki zot, pou zot pa'n kapab fer anba zot ladministrasyon. Mr Speaker, i annan 3milyon zot in pran- zot in rann anba *loan* ledikasyon pourtan bokou manrmay, bokou bann *in-service student* pe rod en fasilite pou zot kapab al liniversite pou zot kapab devlop zot potansyel.

Me pou zot ledikasyon pa enportan pou zot, zot i pran

R3milyon ki ti kapab ede pou anvoy detrw zenn Seselwa ki'n kalifye deor zot i pran zot in met lo koman en *savings* aköz sa pa en priyorite pou zot. Zot priyorite ti monte desann *Abu Dhabi*, danse epi ler zot in war problem in grav zot ti anvi vin boy ek nennenn. Be in tro tar pou zot vin boy ek nennenn.

Dan sa Bidze zot in koze ki zot siport *carer*, napa en sou larzan ki mon'n war in mete dan Bidze pou *carer*, sa i Bidze Zanvye ziska Zen, ni en sou Roupi pa'n ganny mete. Solman ki zot vin dir nou? Arr... zot ki ti donn keksoz *carer* isi laba, sel keksoz ki zot ti donn *carer* R500, epi zot ti rebran, nou, nou pa bliye nou, si zot lo lot kote latab zot pa mazine nou lo sa kote latab la, nou pa pou bliye nou.

Carer i bezwen konnen ki zot pa pou ganny bat latet ankor par en parti *LDS* ki'n toultan servi dimoun pou zot kapab ganny zot byen pou zot kapab vin o pouvwar servi dimoun koman seval batay. Zot toultan fer sa zot, nou, lo nou kote latab nou'n dir ki nou pou get dan *welfare* tou nou bann travayer, tou bann dimoun ki travay dan Sekter Piblik ek dan Sekter Prive nou pou fer mannyer pou nou amelyor zot lavi.

Akoz par bann nouvo Polisi ki nou pe vin avek e dan

nou program 100 zour nou ava pli detay sa bann keksoz ki pe vini. Mr Speaker, en lot *issue* ankor, zot pe koz nou 'ek nou pa ek nou', 'ek nou pa ek nou' i en keksoz ki'n rafinen dan zot lespri zot, zot in bliye lekel ki zot ti fer le zot, zot ti'n vi pouvwar 2020. Konbyen *PS* zot in pouse? Konbyen *CEO* zot in pouse? Konbyen Direkter Zeneral zot in pouse?

Non, i kapab ganny nonmen me solman *out of respect* pou sa bann dimoun e ozordi zot a vin dir nou koumsa nou, nou pe pous dimoun, nou pa'n pous dimoun nou, i annan dimoun ki'n ganny *redeploy* wi sa normal dan travay sa. *Redeployment* i form par ladministrasyon piblik, kontan pa kontan i arive sa.

Zot in koz nou lo lapey *SS*, *PS*, be lapey *SS* ek *PS* i dan *PSO*, napa en *PS* ki ganny sa kantite parey ki zot, zot ti pe dir. Ankor bann mansonz ki zot vin avek pou sey bat latet Seselwa pou fer krwar ki nou, nou pe lager ek kanmarad, nou pe met nou bann dalon, be si en Seselwa i ganny en lapey ki son problem ek zot, ki problem konmsi? Pa i en Seselwa li, pa in travay Sesel? Pa in en Sesel? Ki problem pou en Seselwa ganny en lapey? Dir mwan.

Problem se ki zot, zot in abitye pran tou sa ki apel pou

zot, prezan ler en Seselwa ordiner i ganny li en keksoz manman, tro bokou problemn, me selman Seselwa in zize sanmenm sa ki zot, zot pe asiz lo kote laba e nou, nou pe asiz kote isi. I montre ki Seselwa ti'n fatigue ek sa bann latitud larogans, bat latet e zis aprouv keksoz pou *the sake of* aprouv keksoz.

Ankor mon pou fer Seselwa note, ni enn, ni enn *MNA LDS* pa'n koz lo zot Bidze, pou zot sa Bidze, pa pou nou sa, pou zot.

MR DEPUTY SPEAKER

En minit Onorab.

HON WILBERT HERMINIE

Mersi Mr Speaker. Ni enn, pa'n kapab defann enn sa bann sif ki la dan sa liv Bidze la ni enn. Savedir i montre ou ki zot, zot konnen ki'n arive dan sa bann letan zot, zot zis pa'n anvi koz lo la, zot a vin kot nou li lapwentman, lo sa program 100 zour me sa pou vini apre li.

Be nou lo nou kote lataab malgre nou annan serten rezervasyon lo sa Bidze me solman nou pou fer li pase aköz larzan in fini ganny depanse e Gouvernman i bezwen travay. E nou, nou ou kontinyen *trust the process* nou, aköz nou, nou konnen ki nou pe fer. Mersi Mr Speaker.

MR DEPUTY SPEAKER

Mersi Onorab Herminie. Mon a donn laparol Onorab Henrie.

HON GERVAIS HENRIE

Mersi Mr Speaker. Mon ava dir bonn apre midi tou dimoun.

Mr Speaker, dernyen fwa ki *United Seychelles* ti dan Gouvernman ti ant 2016 a 2020 ziska ler zot in ganny re elekte an 2025. E ant 2016 a 2020, dan lespas 5an zot ti anmenn 6 *supplementary budgets*.

An 2016, partikilyerman zot ti anmenn 3 dan en sel lannen pou regulariz bann depans siplemanter pou lannen 2014, 2015 e 2016 li menm. An 2014 ti annan en Bidze Siplemanter 29milyon, 2015 146milyon e an 2016 - 347 milyon.

An 2017 zot ti anmenn en Bidze Siplemanter pou en sonm R217 milyon, an 2018 zot ti anmenn 2 Bidze Siplemanter. Premyerman enn pou 218.8milyon e son dezyenm ti 196.9milyon. E an 2019 zot ti anmenn zot lot Bidze Siplemanter ki ti 310.3milyon.

Mon pe dir sa aköz pou en zenn Onorab ki fek antre dan Lasanble bomaten, in fer en kantite polemik lo rezon ki en Bidze siplemanter in vini ozordi. In dir ki nou'n anmenn Bidze Siplemanter apre ki en kantite promes ki ti'n ganny

fer e pa'n ganny delivre. In dir ti annan *bottleneck* dan pei, dimoun ti pe vir an ron.

Service delivery pa ti pe ariv kot Seselwa, letan ki Bidze ti pe zoli lo papye Seselwa ti pe soufer, dimoun pa ti pe kapab soutenir bizes e ti oblize ferm zot biznes, dimoun pa ti pe ganny travay. I dir ler US ti koze LDS ti riye, be in oubliy vitman. Alor be an 2016 a 2019 ler zot ti anmenn 6 Bidze Siplemanter ki konteks ki sa ti arive?

E bon alor, zenn Onorab Louise i bezwen met keksoz dan son konteks Mr Speaker. Mon komans koumsa aköz mon oule kontiny avek parol Onorab Gabriel kot i ti dir bomaten kot i byen nou bezwen dir i byen, be kot i mal nou ava dir i mal. Mon 100 poursan dakor avek ou Onorab.

E, zisteman *Leader of Government Business* ki loter Mosyon in fer sa. In eksplik nou i leta finansyel pei pou sa premye 6mwan setadir Zanvye Ziska Zen

1);- in perform pli byen ki i ti ekspekte,

2) *debt to GDP ratio* 55.5poursan ki byen, pozisyon finansyel pei in dir soutenab.

Tax in perform pli byen ki menm peryod lannen 2024, setadir nou'n kapab kolekte plis ki R500milyon, e kote ki nou'n fer byen? *Income tax*,

2.9poursan an plis. *Custom duties* 1.4poursan an plis, *business tax* 11.6poursan an plis, *accommodation tax turnover tax* 4.8poursan an plis.

Mon tann koz bokou lo *dividend IDC*, me zot pa'n dir nou ki

SEYPEC in pey 250milyon *dividend*,

Land Marine 6.3milyon,

IOT 23.3milyon,

SCAA 50milyon,

Seychelles Commercial Bank 4milyon,

FSA 50milyon,

SFA 35milyon,

Ile Du Port Handling Services 17.8milyon ki en total *dividend* ki Gouvernman in anmase R907.8milyon.

Poursantaz egzekisyon bann Bidze atraver en Bidze Kapital, pourtan nou'n tan repete e repete naryen pa'n ganny letan repete e repete naryen pa'n ganny fer. Ant Zen- ant Zanvye ziska Zen 2025.

NSC 292.4poursan son performans,

HCA 25.6poursan,

Minister *Ledikasyon* 21.5poursan,

SIA 8.6poursan,

SLTA 15.1poursan, *Local Government* kot ti annan 5 *MNA* Elekte US sorti dan bann distrik 39.2poursan.

Sa i rikord en *ladministrasyon* ki pa'n fer

naryen? Mr Speaker, be li ki US ti pe fer tou sa letan? Letan nou, nou ti pe debourye, zot ti pe *boycott*. Zot pran kont ki ant 2020 ziska 2025 zot in *walk out* dan sa Lasanble 22 fwa? Zot in tandé konbyen mon'n dir 22 fwa Mr Speaker. Zot ti pe dir nou koup depans lo *capital project*. Dan son *press conference* Dirizan zot parti, ti dir ki semen lakaz lopital ek klinik i kapab espere, alor pa fer *capital project*.

Me nou, nou pa ti ekoute akòz nou ti konnen en *basic principle of economics* ou bezwen envestir dan proze kapital partikilyerman lenfrastruktir e se sa bann pilye ki lekonomi i bezwen pou grosi, pou grandi, pou kre lanplwa e alor se sa ki nou ti fer.

Ant 2021 a 2024 par egzanp Mr Speaker, nou'n fer 287 *affordable housing* pou en sonm R317.2milyon, *West Coast Project* ki Anbasader Faure fek dir en gran reisit e pe benefisye bann kominote dan rezyon was Mahe, pou en longer 19.7kilomet a en sonm \$26milyon. E sa ti en proze ki ti'n ganny konsevwar anba zot Gouvernman e finalman letan nou ki'n vini ki'n delivre.

Proze *Sewage La Digue*, par egzanp, anonse an 2018, finalize anba Gouvernman LDS pou plis ki \$14milyon, sa

i rikord en Gouvernman ki pa'n delivre? E Onorab Uranie pa'n kapab annan kouraz pou *acknowledge* sa Mr Speaker?

Nou'n anmenn plis *Airline*, nou'n anmenn plis *Airline*, e se pour sa rezon ki an 2025 Sesel pe al kas son prop rikord touris, selman dan 47enm semenn 12poursan logmantasyon nou'n deza sot 354mil touris ki'n ariv Sesel.

(APPLAUSE)

HON GERVAIS HENRIE

San oubliy, san oubliy nou'n sov *Air Seychelles* pou sov travay plis ki 700 fanmir, eski sa rikord en Gouvernman ki pa'n delivre?

Mr Speaker, bann pwèn for sa Bidze Siplemanter i enportan ki nou pas lo la pou fer piblik vwar kot letan in annan en koupir akòz serten keksoz pa'n marse ki mannyer larzan i ganny nou apel sa *virement* an Angle i ganny re alokasyonnen.

IECD pe ganny li R3milyon ki sa pou fer, logmantasyon saler pou bann *Child Minders Assistant* logmantasyon pou lasistans finansyel pou bann paran eski sa i pa en Gouvernman ki ti *care about* son popilasyon partikilyerman bann paran?

SLTA pe ganny li R5milyon pou aste plis

lalimyer; zot in konstate ler zot pas dan Sesel aswar lo semen ki mannyer i briye, i klate dan aswar e i annan ankor *maintenance* semen depans pe fer dan rigol *handrails* avek *bus shelter*.

LWMA, pe ganny li R5milyon aköz logmantasyon dan bann saler *minimum* pou bann dimoun ki pe travay anba diferan kontra avek sa lazans. Sa i enkli bann dimoun ki annan kontra netway semen, netway larivyer e fer koleksyon salte parmi lezot.

Health Care Agency, pe ganny li R10milyon pou met plis larzan dan servis dyaliz, eski sa i pa en Gouvernman ki annan en leker pou ban dimoun i ana en konplikasyon lasante? *Seychelles Home Care* pe ganny li 4.7milyon pou pey diferans dan peyman trezyenm mwan saler bann *carers*. Eski sa i en Gouvernman ki'n zis servi *carers* koman en seval batay?

DRMD pe ganny li R4.3milyon ki pe met an plas bann mezir kot ros pe deboule e Mr Speaker, ou distrik Port Glaud pe benefisye direkteman dan sa alokasyon.

E aprezan ki nou'n vwar? Lo en kote i annan bann proze kapital ki pa'n materyalize, e aköz parfwa i annan bann retar dan konplikasyon bann Lakor Bilateral e koman

Manm Lasanble Nasyonal, nou merit kapab eksplik sa nou bann dimoun. Nou pa kapab zis fer krwar poudir, Arr, linefikasite Gouvernman, nou tou nou konnen.

Avek Gouvernman Lenn in annan serten retar, aköz Assomption ti en kouto anba nou likou, e nou *LDS* nou ti'n dir non, non, plito nou ava mor ek nou boul. Avek Gouvernman *L'Arabie Saoudite* ti annan serten konplikasyon; avek Gouvernman Lasin in annan serten konplikasyon.

Me ki nou'n war Gouvernman *LDS* fer? Kot keksoz in difisil ou konnen ki Gouvernman *LDS* in fer Mr Speaker, In dir *hold on* nou pou get dan Bidze nou pou sours finansman sa bann proze lokalman e se sa ki La Rosière R18milyon in ganny mete pou donn lekol La Rosière apre tou sa letan depi ki Mrs Simeon in sorti koman Minis Ledikasyon finalman, La Rosière pou ganny son lekol.

Lekol La Digue, letan difikilte i avek bann Saoudyen, finalman Onorab Uranie atraver ou Mr Speaker, ti merit *acknowledge* sa.

(APPLAUSE)

HON GERVAIS HENRIE

E alor pou mwan nou merit vin la anndan e eksplik dimoun sa bann keksoz koumsa Mr Speaker.

Bokou keksoz in ganny dir, letan Onorab Grandcourt i demande oli larzan dan proteksyon lakot? Onorab Grandcourt i pran kont ki kantite larzan ki Gouvernman in ranmase atraver sa *tax levy*, *environmental levy* lo bann pti letablisman touristik i R183milyon, 490mil.

E regard sa byen, *the bulk of the money* sorti dan bann pti letablisman touristik ki laplipar zot i lo Praslin avek La Digue, e zot konnen ki zot Gouvernman pe al fer? I pe al tir sa, sa R25 apartir le 01 Zanvye. *Now*, get sa en touris ki vin Sesel, i reste li 4 nwit i bezwen pey li R25 par nwit i fer li R100, ki mannyer sa parti US i kapab servi en largiman sa i fer Sesel ser?

Come on, this is en largiman amater e mwan mon kont sa, mon kont sa konpletman. E mon pe dir avek bann pti letablisman annou rekonsidere sa.

Akoz partou kot nou ale dan lemonn, partikilyerman bann nou ki depans en pti larzan pou al voyaze ouswa sa ki ganny en sans al voyaz ler nou travay, lo nou *Bill* nou war i annan sa bann *environmental tax* ki tou lavil atraver lemonn i mete.

Get Au Cap ki mannyer pe fer en zoli *seawall*, be kote Onorab Larsen i krwar sa larzan pou sorti? Semen mon ki sorti Larivyer Angle ki pou bezwen pey zot *seawall*? Non be sa touris ki sorti *l'Allemagne* i napa problem li pou li pey R25 par nwit, alors annou rekonsider sa mon bann zanmi.

E Mr Speaker, Onorab Sopha, in demande ki mannyer rezerv pei i amelyor lavi Seselwa? Be ler nou parti *LDS* ti pe dir kit *airport*, annou ouver *airport*, e zot ti pe lager – “non fermen!” Zot Prezidan ti pe dekrir vaksen koman fek.

Nou, nou ti pe travay lebra kase pou tir Dolar lo R22 pou ariv R14, aköz sa in fer pou kapab stabiliz e grosi nou rezerv ki mannyer rezerv i amelyor lavi Seselwa? Aköz si ou aste sa *hand sanitizer* R14 ki ti pou valer \$1, be si nou napa ti met kontrol pou nou travay dir e amelyor sa rezerv ki ti pou arive? Be i ti pou aste sa 22, R30.

So, *US* i annan en obsesyon avek rezerv pei. Semenn pase mon'n asize mon'n regard deba *supplementary budget* an 2024, Onorab Gill atraver ou Mr Speaker, ti dir avek Minis Hassan be aköz zot pa pran en pe larzan rezerv pou sibvansyon lenportasyon, Onorab Loze ti dir, “Arr, zot

pran *loan* apre zot met dan rezerv.”

Wi, *loan* letan i vini dan pei la i vin an deviz i al dan rezerv dan Labank Santral, dan Labank Santral i repey Gouvernman an Roupi. Zot bezwen konpran ki mannyer sa i marse pou kapab eksplik dimoun dan kominote.

Akoz sa rezerv letan nou, nou lanbisyon sete pou anmenn li R1bilyon aköz nou ti anvi tir sa Dolar ankor lo R14 fer li desann R12, menm R10 pou nou kapab *strong* nou *currency*. E alor i fer Sesel vin konpetitiv. Alor, sa i bann keksoz ki nou bezwen eksplik bann dimoun.

Onorab Larsen in dir poudir Bidze sirplis ki in koz lo la i en ilizyon. Be dokiman ki'n prepare e sirkile par bann profesyonnel e teknisyen Minister Lasante- Minister Finans -(sorry)-. Letan i donn nou tou sa bann detay ki *LGB* in mansyonnen, ou apel sa en ilizyon?

If you call it an illusion pou mon *you are insulting the intelligence and capacity of* nou bann profesyonnel ki'n fer sa dokiman! E ki *IMF*, *World Bank*, *OECD* i rekonnet e ou, dan Lasanble Nasyonal ou apel sa en ilizyon? Non, nou pa kapab fer sa.

Mon pa kontan Mr Speaker, mon pa kontan ki Onorab Louise in fer en latak

lo *CEO SEYPEC* bomaten. 3an apre ki sa madanm in dan sa pozisyon i vin kestyonn son lapwentman pou dir *nepotism* aköz son frer ti *VP*, eski i pran kont poudir letan Mrs Romain ti *apply* sa dyob ti annan 12 aplikan, *SEYPEC* ti met *setup* en *Selection Committee* pou get tou bann laplikasyon.

E zot ti fran- fer seleksyon 4 dimoun ti reste, 4 dimoun apre 2, sa 4 dimoun ti bezwen fer sa ki ou apel en *psychometric exam* prepare par en lorganizasyon Sidafriken, pou asire ki Sesel i annan *the best*, be ki nou'n vwar depi sa madanm in vini? *SEYPEC is performing well and reporting profit.*

So why are we attacking dimoun? Mwan mon- konnen ki mon krwar? Aköz zot *Cabinet* pe asize, zot in dir piblikman zot *next* sa ki zot pe fer zot pe regard tou bann *CEO*, e mon krwar poudir i annan bann dimoun zot pe targete *and tomorrow I will not be surprised* si i enn bann viktim *US*. *I will not be surprised*, aköz nou war ki mannyer bann latak pe komanse isi dan Lasanble Nasyonal.

Ler Onorab Uranie i pe dir i pa pou pran *allowance* palto zot de Onorab Herminie, be dir nou alor ki *allowance* zot pou pran. Ozordi nou konnen poudir zot Prezidan i

pa pe reste se li pe reste dan en lakaz Eden Island, lekel ki pe peye sa? So, alor- kote ki pe peye sa, lekel ki pe peye?

Zot Vis-Prezidan, zot bann Minis napa ki pe reste dan lakaz ki pa pou zot? Lekel ki pe peye? Lekel *allowance* zot pou pran? Nou isi dan Lasanble Nasyonal, bann imsyé i ganny R10 mil *clothing allowance*, bann madanm i ganny R12mil, *this is what* nou *call*, nou apel sa larzan palto, be *clothing allowance* ki tou *public service*, *PSO* lekel ki ti pe koz labous plen taler, i gannyen.

Alor letan Minis ti ganny *clothing allowance* ki osi nou apel sa larzan palto ti en problem? Ler Lasanble Nasyonal ti donn nou *medical insurance*, apre ti koupe be sak fwa nou voyaze pa nou gannyen? Be pa sanmenm sa ki nou ape larzan linet, larzan ledan sa? Alor ki mannyer ou target en group Minis?

Solman nou, nou gannyen nou *behave in a hypocritical manner* nou pa kapab dir avek dimoun poudir osi nou gannyen. E tou *public servant*, tou *public servant when you are travelling* ou ganny en *clothing allowance*, parske ou sorti lo en zil tropik si ou pe al Lerop ou bezwen aste lenz lafreser. *It's called clothing allowance*; zot pe apel

larzan palto. Be tou dimoun pe gannyen dan servis piblik.

Alor Mr Speaker, letan Onorab Herminie i vin dir poudir "Arr, manrmay pa pe kapab al etidye akòz nou nou'n pran R3milyon nou'n fer lekonomi anba Ledikasyon.

Be Onorab Herminie zis eksplik ek dimoun Gouvernman in met *Educational Loan* koman en *scheme*, sa *Educational Loan* la si ou pa kalifye sa 18 pwen ki mandatwar pou ganny en *free scholarship* ek Gouvernman, ou kapab al kot en lenstitisyon finansyel en Labank Komersyal ou *borrow*, Gouvernman i sibvansyon ou lentere.

E sa akòz in annan en *cut* dan sa lokasyon akòz i pe napa telman demann *from Commercial Bank*, akòz Seselwa li menm pa pe vin devan pou *apply for the loan*, *but the service is there* pou Seselwa.

So si en Manm Lasanble pa pe konpran a simple such a *simple explanation* pou li donn son bann *constituents* Mr Speaker, nou dan gran difikilte.

E Mr Speaker, i annan en kantite dimoun in koz lo *recruitment*, *delay in recruitment*. Mon demann mon lekor konbyen zot ki'n pran en pe letan regard sa dokiman e kote konbyen *recruitment* ki

pa'n kapab reisir, lo sa dokiman mwan mon'n asize mon'n konte 232 *post*.

Akoz en Minis in vin la lot zour in dir nou mil, nou tou nou pe repet mil. Dir sa Minis *substantiate* ki mannyer mil. E sa bann pozisyon ki pe rode, *technical staff*, statistisyen, *Legal Counsel*, *Procurement Analyst*, *Nurse*, *Midwife*, *Audit Manager*, *CEO Business Analyst*, *Human Resources Officers*. Be sa la zis mon desann kot Kim Koon mon gannyen sa?

MR DEPUTY SPEAKER

1 minit Onorab.

HON GERVAIS HENRIE

Mersi Onorab Speaker. Be nou bezwen ankouraz nou bann zanfann pou dir annou kontinyen travay.

E lannen pase dan Bidze siplemanter mon'n fer en ekspoze la avek *panel* pou dir zot *this is a national issue that we need to approach on a bipartisan way* pou nou kapab ogmant kapasite nou bann Seselwa pou pran ban pozisyon kle ki nou lekonomi e marse lanplwa i bezwen. Alor annou aret fer politik lo la.

An konklizyon Mr Speaker, mon dakor avek *LGB* letan in dir ki Sesel koman nou pei nou bezwen defann e prezerv li, mon pou demann ou koudmen lo la Onorab. Nou

bezwen koman en nasyon rod bann solisyon bipartisan lo bann size ki nou pe konfronte koman en zenn pti nasyon e en nasyon Leta Zil.

Koman nouvo zenerasyon politisyen e la mon pe koz ou bann zenn, bann nouvo veni dan Lasanble Nasyonal, annou pran en lapros bipartisan pou nou demann e ankouraz Gouvernman pou eksplik son aksyon.

Pou dir Seselwa ki mannyer son larzan pe ganny depanse, mentenir disiplin fiskal, stabiliz to lesanz, agrandi, grosi rezerv pei, kre larises, diversifye lekonomi, prezerv la demokrasi ek laliberte e retir 'ek nou pa ek nou' e aret viktimiz bann dimoun ki deza nou tande pe arive dan nou pei.

E Mr Speaker, *I will be keeping an eye on you*, pou fer sir ki bann reform ki nou bezwen anmennen i marse, nou ansanm lo *Standing Orders Committee* koumsa nou pa ava santi nou koman *the minority* pe ganny *disenfranchise* dan Lasanble Nasyonal. Mersi bokou.

(APPLAUSE)

MR DEPUTY SPEAKER

Mersi Onorab Henrie. Mon asir ou ki travay *Standing Orders* i pou anliny avek sa ki

ti ganny diskite. on, nou'n ariv preski a lafen nou Mosyon. Mon pou demann loter Mosyon Onorab *LGB* pou fer son *right of reply*.

HON SYLVANNE LEMIEL

Mersi Mr Speaker. Mon ti a dir bonn apre midi tou bann dimoun ki a lekout. Premyerman Mr Speaker, mon ti a kontan dir mersi tou bann Manm Onorab ki'n partisip dan deba pou sa Mosyon.

Deba li menm pou en Mosyon si senp ki ti pe demann sa Lasanble pou li aprouv en Bidze Siplemanter 492milyon 246mil, 246.77sou e osi en sonm 969milyon 431.99sou larzan ki pa'n ti ganny depanse pou sa premye 6mwan e osi larzan ki'n ganny koupe savedir en *savings* 517milyon, 186-185.22sou in al dan diferan lanpler.

Sakenn in fer son politik ki in kapab lo sa Mosyon e ki'n anmenn nou ziska 5er36 ozordi swar. Parfwa Mr Speaker, i domaz ki ou anmenn en kosyon ki vin ek en bon lentansyon, me wi politik i fer isi dan Lasanble me selman Manm i deside amenn li dan diferan direksyon.

Sa ki'n vin koz lo lespri vanzans, selman ti a bon nou demann en kestyon, lekel ki'n anmenn lesfri vanzans dan sa dernyen 5an? Sa ki'n vin dir Per ki mannyer lo kwa ki i pou

prese, ki napa naryen pou fer avek sa Bidze siplemanter ki nou pe demande. Sa Bidze Siplemanter pe demande pou kouver depans ki Gouvernman presedan, Gouvernman avan in fer pou sa premye 6mwan.

So, ennler petet ti a bon nou serten Manm, ozordi nou pe dir pret ki mannyer i pou koze, ki mannyer i pou fer son lomeli dan legliz, me annou get byen i annan en *saying* ki dir *if you live in a glass house don't throw stones*, i danzere sa.

Mr Speaker, i normal pou nenport ki Gouvernman ki vini pou li annan sa kontinite, lakaz in ganny fer par ansyen Gouvernman mon pou koz avan 2020, ti annan lakaz ki ti pe ganny fer, nouvo Gouvernman ti vini, zot ti koup riban, i normal sa bann keksoz. Me sa ki nou bezwen regarde 2020 letan zot in vini, wi zot in koup riban bann lakaz ki zot in fer bann diferan proze ki zot in fer.

Eski sa letan la zot ti *acknowledge* zefor or kontribisyon ki Prezidan Faure ti fer ki ozordi zot pe dir napa *acknowledgement of* travay ki *LDS* in fer.

Ou konnen, parfwa la, mon toultan dir sa, zot ti dan sa soulye zot- zot pa ti ladan, zot in antre ladan, zot in konnen si i morde, si pa

morde, zot in tire sa soulye dan zot lipye e zot in konn son douler zot, e ozordi zot pe asiz dan Lopozişyon zot pe fer menm konplent ki nou, nou ti fer.

Ozordi Mr Speaker ou pe tann dir petet ou sez koman Speaker ou pe devret get parti minoriter, pou pe devret get Lopozişyon, menm keksoz ki'n nou osi nou ti demande letan nou ti laba e nou, nou ti pli pti git ki zot. Zot in anmenn nou lavi ki mannyer zot ti kapab. Ou pa ti kapab koze dan sa Lasanble, i domaz.

Ozordi mon war zot tou zot in dir sa ki zot kapab dir, pa'n koupe *micro*, ou'n les tou sa bann dimoun dir tou sa ki zot kapab dir menm si zot in al an deor topik ki'n ganny anmenn ozordi, menm si zot in al an deor sa Mosyon.

Alors Mr Speaker, nou'n tann osi koz lo efas, nou Gouvernman ki fe antre zot pe sey efas bann travay ki Gouvernman *LDS* in fer. Lekel ki ti komans efas travay ki *US* in fer letan zot in vin o pouvwar, en pti *maintenance* zot, zot met en nouvo plak. Tousala i bann keksoz ki zot ti pe sey efase ki zot pe fer dir zot ki'n fer.

Ou konnen, me tou sa bann keksoz ki'n ganny dir ozordi Mr Speaker, i bann sel keksoz ki nou nou'n sibir letan nou ti o pouvwar e ler *LDS* in

vin o pouvwar nou, nou'n sibir sa koman en Lopozişyon. E alor si nou pe get devan koman en nouvo direkşyon ki nou oule pran mon pou dakor avek lafason ki Onorab Henrie serten bout son lentervansyon in fer.

Nou devret koman en Lasanble pe get Sesel la, nou devret koman en Lasanble pe get devan, pe get *the future of* nou pei e non pa pou nou kontinyen lager sa bann lager dan setyenm Lasanble, in ler pou nou get keksoz avek en lot perspektiv.

E nou'n vwar ki en nouvo Gouvernman in ganny met an plas, sa nouvo Gouvernman li ki pou desid son striktir ki mannyer i pou fer son striktir. Nou'n tann en kantite konplent lo la, se sa Gouvernman ozordi li ki pou desid son striktir menm si *LDS* pou konplent me i bezwen annan li en striktir kot pou kapab fer son bann travay ki li in dir i oule fer.

I annan son bann program, Gouvernman ozordi i annan son bann program ki'n met an plas i pou bezwen *definitely* son Bidze Mr Speaker, pou li travay avek, e byento wi Lasanble pou gannnen en Bidze Siplemanter ki pou vini ki pou ki sa i ava ed Gouvernman fer son travay ki

in ganny mandate pou fer pou sa 5an.

Ki mon kontan nou'n tann Onorab LOTO in dir ki i pe mazine ki dan ankor 5an LDS a retourn o pouvwar, mon kontan in dir ankor dan 5an i pa 2027 in realiz sa byen e mwan mon pou dir annou travay ansanm. Akoz toultan mon dir, Mr Speaker, LDS pa kapab dir i pou retourn o pouvwar, US pa kapab dir i pou re ganny pouvwar.

Dernyen last i dan lanmen Lepep Seselwa, pep Seselwa ki deside lekel ki i oule met ou koman son reprezantan dan distrik, ou koman sa dimoun ki pou diriz Sesel. Alors annou travay dan en fason inifye, annou travay dan en fason byen wi Gouvernman in sanze nou bezwen donn Gouvernman sa Bidze Siplemanter pou kouver bann depans ki in deza fini ganny fer.

E se sa ki mon met devan nou Lasanble Nasyonal ozordi Mr Speaker, ki nou aprouv sa Bidze Siplemanter ki mon'n vin avek bomaten. Mersi Mr Speaker.

MR DEPUTY SPEAKER

Mersi LGB pou ou *right of reply*, avan nou pas lo vot zis pou met latansyon 25 Manm ozordi in entervenir lo sa Mosyon, nou ava prezan

soumet Mosyon devan Lasanble pou laprouvasyon.

Mosyon ki devan nou; -

*The National Assembly resolves to approve a supplementary estimate of SR *492,246,772.64, a budget cut of (SR 969,431,988.73) resulting to a net budget cut of (SR 517,185,216.08) for the year 2025 laid before the Assembly in accordance with Article 154(6)(b) of the Constitution.* Tou Manm ki vot pour?

HON SYLVANNE LEMIEL

Mersi Mr Speaker. Aparaman sa *supplementary estimate* ki ou'n nonmen ou a krwar sa sif i mal i pa menm parey avek lo *Order Paper*, i pa menm parey avek sa Mosyon. Ou'n nonm *492million, whereas it should be 452million, 246thousand, 772.64. Thank you.

MR DEPUTY SPEAKER

Koreksyon i *noted 452million, 246thousand, 772.64.* Bon, Mosyon in met devan Lasanble pou laprouvasyon, tou Manm ki vot pour? Okenn Manm ki vot kont?

Bon Mosyon pou laprouvasyon *supplementary estimate*, 16 Manm in vot pour, 0 Manm in vot kont e 11 abstansyon, ki fer ki Mosyon in ganny aprouve par Lasanble Nasyonal.

Avek sa- en pti kominikasyon, nou konnen poudir i annan bann *Bills* ki *ABC* in diskite lo la taler e son bann *order* osi bann presedans ki pou swiv, *Bills Committee* pou travay demen e kominikasyon in ganny fer demen ek Zedi pou zwenn bann *sponsors of the Bills* pou zot fer zot *scrutinization* e ki i ava pare a tan pou nou *sitting* prosen Mardi pou kapab fer *Second Reading*. Onorab?

(ADJOURNMENT)

HON SANDY ARISSOL

Mr Speaker, eskize mon ti pe zis osi notife ou poudir kekfwa pou anonse nou an zour travay pou semenn prosen an relasyon avek bann *Bills Committee* ki pe zwenn demen keksoz ki nou'n diskite dan *ABC*. Mersi.

MR DEPUTY SPEAKER

Wi, mersi Onorab Arissol. Travay ki *Bills Committee* pou fer sa semenn sa 2 zour i pou anmenn nou avek nou travay ki pou zwenn Mardi prosen lo *Order Paper* e Lasanble posibilite nou pou *sit* nou Mardi, Mercredi e Zedi pou *allow* nou pou kapab kouver sa bann *Bills* ki annan osi bann *time *sensitivity* ki annan avek.

So, avek sa Lasanble pou *adjourn* e i pou pran son travay Mardi prosen. Mersi.

